

O Le Liahona



**Musumusuga
mai le Soifuaga ma
Aoaoga a Peresitene
Lorenzo Snow, it. 12, 18**

O Le Sailiga o le Poto, i. 20


Meaoga ma Lau Misiona o le Olaga, i. 54

**Pe e I Ai se Taimi O Le a Avea
ai i Ta'ua Ma se Uo? i. 58**



*“A faatusa
atu i le Atua,
o le tagata o
le mea noa;
peitai o i
tatou o mea
uma ia i le
Atua.”*

Peresitene Dieter F.
Uchtdorf, Fesoasoani
Lua i le Au Peresitene
Sili, “E Taua Oe ia te
Ia,” *Liahona*, Nov.
2011, 20.



O SAVALI

- 4 **Savali a le Au Peresitene Sili: O Le Siufofoga o le Alii**
Saunia e Peresitene
Henry B. Eyring
- 7 **Savali a Faiaoga Asiasi: Galuega Faafaifeautalai**

TALA FAAALIA

- 12 **Piko [Pickles], Tunipa, ma le Molimau: Musumusuga mai le Soifuaga ma Aoaoga a Lorenzo Snow**
Saunia e Aaron L. West
O se folasaga i le kosi aoaoina a le Au Perisitua Mekisateko ma le Aualofa i le tausaga lenei.
- 20 **O Le Migao i le Atua o le Amataga lea o le Poto**
Saunia e Elder Neil L. Andersen
O le galufafati o faamatalaga o lenei vaitaimi, ua tatou matua manaomia ai lava le poto.

- 28 **Aoaoga Anoa i le Aiga**
Saunia e Darren E. Schmidt
- 32 **Tamaitai Talavou ma le Faaiuga e Faamisiona**
Ua faaaoga e nei tamaitai talavou matutua le fautuaga faaperofeta e tusa ai ma le galuega faifetautalai faamisiona
- 36 **O Le A Le Misiona Aupito Sili Ona Lelei?**
Tusa lava po o a outou tulaga o i ai, o loo maua avanoa faamisiona matutua mo outou.

I LE FAAVAA

Luma: Ata o Peresitene Lorenzo Snow na pueina e C. R. Savage, faaaloaloga mai le L. Tom Perry Special Collections, Potutusi a Harold B. Lee, Iunivesite a Polika Iaga; faaaloaloga a le Library of Congress, Washington, D.C. Tua: Atavali na saunia e John Willard Clawson © IRI. Faavaa pito i luma i totonu: Ata na pueina e Andrew Shumilin.

MATAGALUEGA

- 8 **Tusigāmanatu Konafesi Oketopa**
- 10 **Tatou te Talanoa ia Keriso: Ua Lava le Atoatoa**
Saunia e Michele Reyes
- 31 **Aoa Atu Mo Le Malosi o le Autalavou: O Le Taua o Aoaoga**
- 38 **O Leo o le Au Paia o Aso e Gata Ai**
- 74 **Tala Fou o le Ekalesia**
- 79 **Manatu mo Afiafi Faaleaiga**
- 80 **Seia Tatou Toe Feiloai: O Le Lesona i le Lima-Minute**
Saunia e Christopher J. Smith


AUTALAVOU MATUTUA



42 Faatuatua, Faamoemoe, ma Mafutaga

Saunia e Elder Michael T. Ringwood

O le ala na fesoasoani ai ia vaega e tolu o le faatuatua i lau aumoega ma le filifiliga ia faaiipoipo.



AUTALAVOU

18 Ia Iloa Lorenzo Snow

Saunia e Christopher D. Fosse
O nai tala musuia ia atomu e te le o iloa e uiga ia Peresitene Snow.

46 O Le Tusi a Mamona— Ia Faasoa Atu

Saunia e Elder Juan A. Uceda
O le faasoaina atu o le Tusi a Mamona i au uo e mafai ona taitaiina atu ai i ni aafiaga matagofie o le liua.

49 O Iea Mataupu ma Iea Mataupu: Mataupu Faavae ma Feagaiga 87:8

O le autu o le Mutuale i le tau-saga lenei o loo aoao mai ai ia i tatou ia nofoaga e tutu ai ina ia tatou saogalemu ai.

50 Autu o le Mutuale 2013

Saunia e le au peresitene aoao o Alii Talavou ma Tamaitai Talavou
O manatu i le auuala e mafai ai ona tutu i nofoaga paia.

52 O Mea Na Aoaina e Agung mai le Pateminitone [Badminton]

Saunia e Adam C. Olson
O le auuala e mafai ai ona faamanuia o tatou olaga i le aso i le i ai o se faamoemoe.

54 Mo Le Malosi o le Autalavou: Aoaoga

Saunia e Elder Craig A. Cardon

56 Aoao Pea [Ie Taina o le Piano]

Saunia e Willis Jensen
Ou te le'i mafaufauina lava o le a i ai se aso o le a fesoasoani ai a'u lesona o le piano ou te lagonaina ai le Agaga.

57 Pepa Lautele o I Ai se Savali: Tutu i Nofoga Paia

58 Vaaia o Uiga Lelei o Taili

Saunia e Karinne Stacey
Sa fautua mai Tina na pau lava le mea na manaomia e se tagata taufaafefe i le aoga o se uo.

TAMAITI



59 Molimau Faapitoa: E Mafai Faapefea ona Ou Maua se Molimau?

Saunia e Elder Robert D. Hales

60 O Se Fuafuaga mo lo Matou Aiga

Saunia e Marissa Widdison
Ina ua vave fanau mai le tuafafine o Levi, sa manaomia e ia ni tatalo ma ni faamanuiaga faaleperisitua.

62 I le Auuala: O Fale e Lua sa Nofo ai Iosefa Samita

Saunia e Jan Pinborough

64 Tala ia Iesu: Iesu Keriso ma le Uluai Faaliga

65 O La Tatou Itulau

66 Sauni e Faitau

Saunia e Merillee Booren
O le faauo ma le agalelei na fesoasoani ia Mele e foia ona popolega.

68 Aumaia o le Peraimeri i le Fale: E Alofa le Tama Faalelagi ia te A'u, ma O Loo I Ai Sana Fuafuaga mo A'u

70 Mo Tamaiti Laiti

81 Atatosi o le Perofeta: Iosefa Samita



Vaai pe mafai ona e mauaina le Liahona o loo natia i le lomiga lenei. Faaitete: "E mafai faapefea ona ou maua" se Liahona?

Susuga a le Au Peresitene Sili: Thomas S. Monson, Henry B. Eyring, Dieter F. Uchtdorf

O Le Korama a Aposetolo e Toasefululua:

Boyd K. Packer, L. Tom Perry, Russell M. Nelson, Dallin H. Oaks, M. Russell Ballard, Richard G. Scott, Robert D. Hales, Jeffrey R. Holland, David A. Bednar, Quentin L. Cook, D. Todd Christofferson, Neil L. Andersen

Faatonu: Craig A. Cardon

Fautua: Shayne M. Bowen, Bradley D. Foster, Christoffel Golden Jr., Anthony D. Perkins

Pule Faatonusili: David T. Warner

Faatonusili o le Lagolago mo Aiga ma Tagata o le Ekalesia: Vincent A. Vaughn

Faatonusili o Mekasini a le Ekalesia: Allan R. Loyborg

Pule o Mea Tau Pisinisi: Garff Cannon

Pule Faatonutonu: R. Val Johnson

Pule Faatonutonu Lagolago: LaRene Porter Gaunt

Lagolago o Lomiga: Melissa Zenteno

Au Tusitusi ma Faatonutonu: Susan Barrett, Ryan Carr, David Dickson, David A. Edwards, Matthew D. Flitton, Mindy Raye Friedman, Hikari Loftus, Lia McClanahan, Michael R. Morris, Richard M. Romney, Paul VanDenBerghe, Julia Woodbury

Pule Faatonusili Tusiata: J. Scott Knudsen

Faatonusili Tusiata: Tadd R. Peterson

Au Mamanu: Jeanette Andrews, Fay P. Andrus, C. Kimball Bott, Thomas Child, Kerry Lynn C. Herrin, Colleen Hinckley, Eric P. Johnson, Scott M. Mooy, Brad Teare

Faatonu o le Puletaofia ma Fatufatuga: Collette Nebeker Aune

Pule i le Gaosiga: Jane Ann Peters

Au Gaosi: Connie Bowthorpe Bridge, Howard G. Brown, Julie Burdett, Bryan W. Gygi, Kathleen Howard, Denise Kirby, Ginny J. Nilson, Ty Pilcher, Gayle Tate Rafferty

Tailolomi: Jeff L. Martin

Faatonusili Lolomiga: Craig K. Sedgwick

Faatonusili o le Tufatufaga: Evan Larsen

Mo le okaina o mekasini, alu i le store.lds.org po o le Faletusi Tutotonu i Pesega. Telefoni 64127. Totogi o le Mekasini: \$0.55 (Samoa) i le kopi. Totogi mo le Tausaga Atoa \$6.60 (Samoa).

Auina atu tusitusiga ma faafesili i luga o le initoneti i le liahona.lds.org: pe meli mai i le Liahona, Rm. 2420, 50 E. North Temple, Salt Lake City, UT 84150-0024, USA; po o le i-meli: liahona@ldschurch.org.

O Le Liahona (o lona uiga i le Tusi a Mamona o le "tapasa" po o se "faatonuuala") e lomia i le faa-Alepania, Aminia (Sasae), Pisilama, Palekeria, Kemupotia, Sepuano, Saina, Kalaotia, Sjekisolovakia, Tenimaka, Take, Igili, Esitonia, Fiti, Finelani, Farani, Siamani, Eleni, Hanikeri, Initu, Iselani, Initonesia, Italia, Iapani, Kiripati, Korea, Lativia, Litunia, Malakasa, Maseia, Monokolia, Nouei, Polani, Potukale, Romania, Rusia, Samoa, Saina (ua faafaigofieina), Silovenia, Sipaniolo, Suetena, Tagaloka, Tahiti, Tai, Toga, Iukureini, ma Urutu, ma Viatenama. (E eseese lava gagana.)

© 2013 Puletaofia e le Intellectual Reserve, Inc. Ua taofia aia tatau uma. Lomia i le lunaite Setete o Amerika.

E mafai ona kopi tala ma ata o le Liahona mo le toe faaogaina i lotu po o le aiga ae ia le faia ai ni pisinisi. E le tatau ona kopi ni tala po o ni ata pe afai o faasa mai i le laina o loo ta ua ai le e ona lea faatufugaga. Auina atu fesili e uiga i le puletaofia i le Intellectual Property Office, 50 East North Temple Street, Salt Lake City, UT 84150, USA; i-meli: cor-intellectualproperty@ldschurch.org.

For Readers in the United States and Canada: January 2013 Vol. 37 No. 1. O LE LIAHONA (USPS 311) Samoan (ISSN 1045-0947) is published monthly by The Church of Jesus Christ of Latter-day Saints, 50 East North Temple, Salt Lake City, UT 84150. USA subscription price is \$10.00 per year; Canada, \$12.00 plus applicable taxes. Periodicals Postage Paid at Salt Lake City, Utah. Sixty days' notice required for change of address. Include address label from a recent issue; old and new address must be included. Send USA and Canadian subscriptions to Salt Lake Distribution Center at address below. Subscription help line: 1-800-537-5971. Credit card orders (Visa, MasterCard, American Express) may be taken by phone. (Canada Poste Information: Publication Agreement #40017431)

POSTMASTER: Send address changes to Salt Lake Distribution Center, Church Magazines, PO Box 26368, Salt Lake City, UT 84126-0368.

Faaopoopoga o loo maua i le Initoneti Liahona.lds.org



MO TAGATA MATUTUA

O le tusiga o loo i le itulau e 12 o loo folasia atu ai le kosi o suesuega i le tausaga nei mo fonotaga i le Aso Sa a le Perisitua Mekisateko ma le Aualofa. Afai e sili ia te oe le faitau ai i le initoneti, e mafai ona maua i le **LDS.org** i le "Resources [Punaoa]."

MO LE AUTALAVOU

I le itulau e 50, o loo aoao mai ai e Elder Craig A. Cardon o le Fitugafulu, le ala e aafia ai lau misiona o le olaga ona o aoaoga. E mafai ona e aoao nisi mea e uiga i aoaoga i le vaega o le *Mo Le Malosi o le Autalavou* i le **youth.lds.org**.

I LAU GAGANA

O loo maua le *Liahona* ma isi tusi a le Ekalesia i le tele o gagana i le **languages.lds.org**.

AUTU I LENEI LOMIGA

E ta'u mai e numera le itulau muamua o le tusiga.

- Agaga Paia, 4**
- Faauo, 58**
- Samita, Iosefa, 42, 62, 64, 81**
- Agalelei, 58, 66**
- Faiaoga asiasi, 7**
- Snow, Lorenzo, 12, 18**
- Aiga, 28, 60**
- Faigata, 10**
- Suesue i tusitusiga paia, 28**
- Aoao atu, 28**
- Faitalia, 80**
- Talafaasolopito o le Ekalesia, 12, 18, 62**
- Aoaoga, 34, 54, 56**
- Galuega faafaifeautalai, 7, 32, 36, 38, 40, 41, 46**
- Tatalo, 4, 39, 60**
- Autu o le mutuale, 49, 50**
- Iesu Keriso, 10**
- Faailiga, 32**
- Malumalu, 65, 70**
- Faaiipoipoga, 42**
- Molimau, 39, 46, 59**
- Faamalologa, 10**
- Musika, 56**
- Faamanuiaga o le perisitua, 40, 60**
- Natura paia, 68**
- Faamoemoe, 42, 52**
- Poto, 20**
- Faatuatua, 42**



**Saunia e Peresitene
Henry B. Eyring**

Fesoasoani Muamua
i le Au Peresitene Sili



O LE SIUFOFOGA O LE ALII

Ua valaaulia e le Mataupu Faavae ma Feagaiga tagata uma i soo se mea ia faafofoga i le siufofoga o le Alii o Iesu Keriso (tagai i le MF&F 1:2, 4, 11, 34; 25:16). Ua faatumulia i Ana savali, lapataiga, ma fautuaga faamalosiāu o loo tuuina mai i faaaliga i perofeta filifilia. I nei faaaliga ua mafai ai ona tatou vaai i le ala e mafai ai e le Atua ona tali mai i a tatou tatalo o le faatuatua i savali o faatonuga, filemu, ma lapataiga.

I a tatou tatalo tatou te saili ai ia iloa po o le a le mea e finagalo le Atua tatou te faia, o le a le mea e tatau ona tatou faia ia maua ai le filemu ma le fiafia i lenei olaga ma le olaga a sau, ma pe o le a foi le mea o faatali mai mo i tatou. Ua tumu le Mataupu Faavae ma Feagaiga i tali i na fesili o loo fesiligia e tagata masani ma perofeta i le tatalo faatauvaa. E mafai ona aveā o se taiala taua e aoao ai i tatou i le ala e maua ai tali i fesili e uiga i lo tatou soifua manuia faaletino ma le faaolataga e faavavau.

O le lotomaulalo ma le faatuatua i le Alii o Iesu Keriso, o ki ia. Na maua e Oliva Kaotui se tali mai le Alii e tusa ai ma lona manao e fesoasoani i le faaliliuga o le Tusi a Mamona: “Ia manatua a auoa ma le faatuatua e le mafai ona e faia se mea; o lea ia ole mai ai i le faatuatua. Aua ne’i manatu faatauvaa i nei mea; aua le ole mai mo mea

e le tatau ona e ole mai ai” (MF&F 8:10).

E sautualasi i le Mataupu Faavae ma Feagaiga, ona manaomia e le Alii le faatuatua ma le lotomaulalo a’o le i tuuina mai e Ia Lana fesoasoani. O se tasi mafuaaga mo lena mea ona atonu e le oo mai Ana tali i le ala tatou te manatu ai. E le faigofie foi i taimi uma ona taliaina.

O loo faapupula mai i le talafaasolopito o le Ekalesia ma aafiaga o o tatou augatama le moni o lenei mea. Sa tatalo le tamā o lo’u tamāmatua o Henry Eyring ia iloa po o le a le mea e tatau ona ia fai ina ua faalogo o ia i le talalelei toefuataiina ua aoao mai i le 1855. Na oo mai le tali i se miti.

Na miti o ia sa faanofo o ia i se laulau faatasi ai ma Elder Erastus Snow o le Korama a Aposetolo e Toasefululua ma se faifeau e igoa ia William Brown. Sa aoao mai e Elder Snow ia mataupu faavae o le talalelei mo se taimi pe tusa ma le itula. Ona saunoa atu lea o Elder Snow, “I le suafa o Iesu Keriso ou te poloaiina oe ina ia e papatiso ma o le alii lea [Elder Brown] . . . o le a papatisoina oe.”¹ E faafetai lo’u aiga ona sa i ai ia Henry Eyring le faatuatua ma le lotomaulalo e papatisoina ai i le 7:30 i le taeao i se vailepa o timuga i St. Louis, Misuri, ISA, e Elder Brown.

E lei oo mai le tali i lana tatalo i se siufofoga na



Tauagavale: I lenei api o talaaga, na tusia ai e Henry Eyring (ata i le itu agavale) mea na tutupu ina ua mavae le tagatavaleina o Elder Parley P. Pratt (ata i lalo ifo o le ata o Henry Eyring). O le itulau agavale o le api talaaga o loo ta'ua ai le tagatavaleina. I lalo ifo o le api talaaga o se voluma i le 1890 o le Mataupu Faavae ma Feagaiga.

AOAO ATU MAI LENEI SAVALI

1. Faitau faatasi ia parakalafa e uiga i le tatalo i lenei savali. A o outou faitauina, fai i tagata o le aiga e faalogologo ma le toto'a pe faapefea ona tali mai le Atua i tatalo. Mafaufau e molimau atu i le taua o le tatalo.

2. Ua tumu le Mataupu Faavae ma Feagaiga i tali i fesili e fesiligia e tagata i le tatalo. O le a le mea e tupu pe a na faapea e le tusi faamaumauina lava tali (faaaliga) i a latou fesili? Uunaia le aiga e aoao ia iloa ma mulimuli i unaiga a le Agaga. Atonu e mana'ao e tusi faamaumau o latou mafaufauga e tusa ai ma tatalo, i a latou api o talaaga.

faalogoina mai le Alii. Na oo mai i se faaaliga ma se miti i le po, e faapei foi ona faia ia Liae (tagai i le 1 Nifae 8:2).

Na aoao mai i tatou e le Alii e mafai foi ona oo mai tali o ni lagona. I le Mataupu Faavae ma Feagaiga, na Ia aoao atu ia Oliva Kaotui, “Faauta, o le a Ou tau atu ia te oe i lou mafaufau ma lou loto, e ala i le Agaga Paia, lea o le a oo atu i ou luga ma lea o le a mau i lou loto” (MF&F 8:2).

Na Ia uunaia foi Oliva faapea: “Ou te lei tautala atu ea le filemu i lou mafaufau e uiga i le mataupu? O le a se molimau sili atu e mafai ona e maua mai lo lona mai le Atua?” (MF&F 6:23).

O le Mataupu Faavae ma Feagaiga, talafaasolopito o le Ekalesia, ma le talafaasolopito na tusia e Henry Eyring i lana misiona ina ua faatoa uma ona papatisoina o ia, ua aoaoina ai a'u e faapea o tali e mafai ona lagonaina o ni lapataiga po o le filemu.

I le masina o Aperila 1857, na auai atu ai Elder Parley P. Pratt o le Korama a Aposetolo e Toasefululua i se konafesi i le mea lea ua ta'ua

nei o Oklahoma, ISA. Na tusi faamaumauina e Henry Eyring faapea “na faatumulia le mafaufau o [Elder Pratt] i mafaufauga lofituina . . . , ua le mafai ona iloaitino le lumanai po o se ala e sola ese mai ai.”² Na tusi faamaumauina e Henry le tala faanoanoa i le taimi lava na faatoa maea ai ona tagatavaleina le Aposetolo. Na alu lava Elder Pratt i lana malaga e ui i lagona o le tulaga matautia, e faapei foi ona faia e le Perofeta o Iosefa Samita ina ua alu i Karefasi.

O la'u molimau e tali mai lava le Alii i taimi uma i le tatalo faamaulalo o le faatuatua. Ua aoao mai e le Mataupu Faavae ma Feagaiga ma mea tatou te oo i ai, le ala tatou te iloaina ai na tali ma taliaina i le faatuatua, pe o se faatonuga, faamautinoaga o le upumoni, po o se lapataiga. Ou te tatalo ia tatou faalogologo ma iloa i taimi uma le siufofoga alofa o le Alii. ■

FAAMATALAGA

1. “The Journal of Henry Eyring: 1835–1902” (unpublished manuscript in author's possession).
2. “The Journal of Henry Eyring: 1835–1902.”

ATA O PARLEY P. PRATT MA LE FAALALOGA A LE FALETUSI O LE TALAFASOLOPITO O LE EKALESA; API TALAAGA MA LE ATA O HENRY EYRING MA LE FAALALOGA A LE FALETUSI O LE UTAH MARRIOTT SPECIAL COLLECTIONS; ATA O ISI MEA NA PUENIA E DAVID STOKER

AUTALAVOU

Faalogologo mo Uunaiga

Saunia e María Isabel Molina

Se tasi po na sola ese mai ai lo'u tausoga mai le fale, o lea na ou faanatinati atu ai e su'e. A o alu la'u taavale, sa ou tatalo mo le Agaga ia fesoasoani mai ia te au. Sa ou iloina o le a tali mai le Atua ma taitai a'u, ma sa ou taumafai e faalogologo i uunaiga a le Agaga. Ae ina ua le mafai ona ou faalogoina se mea, sa amata ona ou le to'a, ma ua manatu ai e le o uunaia au e le Agaga.

E ui sa ou manao ou te alu mamao e saili ai, ae sa ou lagonaina e tatau lava ona ou sueina i le vaega o loo i ai

le fale o lo'u tausoga. O lea na tonu ai ia te au ou te toe faataamilo tasi lava i le vaega lena. A o ou tu i se magaalā, sa ou vaaia se tamaitai talavou o savali. Ua ou maua si o'u tei!

Ina ua ou oso i fafo o le taavale ma tamoe atu ia te ia, sa ou iloina sa taitai lava a'u e le Agaga i lenei taimi atoa, e ala i le fesoasoani ia ou lagonaina e tatau lava ona ou nofo ai pea i le vaega lenei. Ona sa ou faalogologo mo se leo lemu, toeitiiti lava a ou le amanaiaina uunaiga a le Agaga. Ona ou malamalama ai lea o le tele o taimi o le a tatou

le faalogoina ai se leo, ae o le a tatou lagonaina uunaiga i o tatou loto.

Sa ou matua faafetai i le taitaiga a le Agaga. E moni lava e i ai o la iina i taimi uma! Pei ona fai mai le mau, "O le a avea le Agaga Paia ma au soa e le aunoa" (MF&F 121:46).

Afai tatou te agavaa mo le taitaiga a le Agaga ma tatou nofouta i ai, e mafai ona avea i tatou ma meafaigaluega i aao o le Atua e agalelei ai i le tele o tagata. Faatasi ai ma le mafutaga faifai pea a le Agaga, o le a tatou iloa ai le ala e tatau ona tatou ui ai.

TAMAITI

O Se Mea Fou e Uiga i le Tatalo

Ua aoao mai e Peresitene Eyring e tele auala eseese e mafai ona tali mai ai tatalo. E mafai ona outou faia se mea fou e saili ai tusitusiga paia e sue ai nisi o na auala.

Faaoga le faafanua lenei e amata ai lau malaga sutesue. Sue mau taitasi o loo i luga o le faafanua. I luga o laina avanoa, tusi ai ni nai upu e faamatala ai le mea o loo ta'u mai e le mau e uiga i tali i tatalo.

A o faagasolo, e mafai ona e tusia i lau api talaaga mea o loo e aoaoina faapea foi ou lava aafiaga i tatalo e taliina mai.



1 Ioane 14:26

2

Mataupu Faavae ma Feagaiga 6:22-23

3

Mataupu Faavae ma Feagaiga 8:2

4

Mataupu Faavae ma Feagaiga 9:8-9



X

Faataoto 8:10-11



Suesue ma le agaga tatalo i mea nei, ma pe a talafeagai ai, ia talanoaina faatasi ma uso e te asia. Faaaoga fesili e fesoasoani ai ia te oe e faamalosi ai ou uso ma avea ai le Aualofa ma se vaega ola o lou lava olaga. Mo nisi faamatalaga, alu i le reliefsociety.lds.org.

Galuega Faafaifeautalai

Ua auina atu le Au Paia o Aso e Gata Ai “e galulue i le tovine [o le Alii] mo le faaolataga o agaga o tagata” (MF&F 138:56), lea e aofia ai ma le galuega faafaifeautalai. Tatou te manaomia se valaauga aloaia faamisiona e faasoa atu ai le talalelei. O isi o le a faamanuaina o latou olaga i le talalelei, o loo siomia ai i tatou, ma a o tatou tapenaina i tatou lava, o le a faaogaina i tatou e le Alii. E mafai e faiaoga asiati ona opogi o latou tiute-tauave faaleagaga ma fesoasoani ai “e faataunuaina le faaofuina o le tagata i le tino ola pea ma le ola e faavavau” (Mose 1:39).

Ina ua faatulagaina e le Perofeta o Iosefa Samita le Aualofa i le 1842, sa saunoa o ia, o tamaitai e le gata ina laveaiina e matitiva, ae faaolaina foi o latou agaga.¹ O lenei mea o loo avea pea ma o tatou faamoemoega.

“O le Alii . . . na te tuuina atu se molimau o le upumoni ia i latou o le a faasoaia atu i isi,” na saunoa ai Peresitene Dieter F. Uchtdorf, Fesoasoani Lua i le Au Peresitene Sili. “Ma le isi, ua faamoemoe le Alii i tagata o Lana Ekalesia e ‘tautala atu [o latou gutu] i aso uma, i le folafolaina o



[Lana] talalelei ma le leo o le olioli’ (MF&F 28:16). . . . O nisi taimi o se fuaiupu se tasi o le molimau e mafai ona faatulagaina ai mea e tutupu e aafia ai le olaga o se tagata mo le faavavau.”²

Mai Tusitusiga Paia

Mataupu Faavae ma Feagaiga 1:20–23; 18:15; 123:12

FAAMATALAGA

1. Tagai i le *Aoaoga a Peresitene o le Ekalesia: Iosefa Samita* (2007), 482.)
2. Dieter F. Uchtdorf, “Faatalitali i le Auala i Tamaseko,” *Liahona*, Me 2011, 76.
3. Tagai i le *O Afafine i Lo’u Malo: O Le Talafaasolopito ma le Galuega a le Aualofa* (2011), 101–102.



Faatuata, Aiga,
Toomaga

Mai lo Tatou Talafaasolopito

O le tala i a Olga Kovářová o Siekisolovakia, o se faataitaiga lea o le galuega faafaifeautalai a tagata o le au paia, mai le talafaasolopito o la tatou Aualofa. I le vaitau o le 1970, o Olga o se tagata a’oga faafomai ae sa matelaina i le fia taumafa i se olaga faaleagaga e loloto atu. Sa ia matauina Otakar Vojkůvka, o se tagata o le Au Paia o Aso e Gata Ai, ua 75 tausaga le matua. “Sa foliga mai ia te au ua fitusefululima ona tausaga, ae o lona loto e tusa ua sefuluvalu ma e tumu i le olioli,” na ia fai mai ai. “O se mea tulaga ese lea i Siekisolovakia i le taimi o le faitoi.”

Sa fesili Olga ia Otakar ma lona aiga pe na faapefea ona latou maua le olioli. Sa latou faafeiloaia o ia i isi tagata o le Ekalesia ma avatu ia te ia se Tusi a Mamona. Sa ia faitauina ma le naunautai, ma e lei pine ae papatisoia o ia ma faamauina. Talu mai lena taimi, na avea Olga o se uunaiga mo le lelei i se lalolagi o pulega faamalosi faaupufai ma sauaga i tapuaiga. Sa avea o ia ma peresitene o le Aualofa i la latou paranesi laitiiti ma sa fesoasoani e laveai agaga o isi e ala i le aumaia o i latou ia Keriso.³

O Le a se Mea e Mafai ona Ou Faia?

1. Pe ou te mulimuli i uunaiga a le Agaga Paia a o ou faasoa atu la’u molimau i uso ou te asia?

2. O faapefea ona ou fesoasoani i uso o loo ou vaaia ia aoao i le talalelei?

TUSIGĀMANATU KONAFESI OKETOPA

“O le mea ua fai atu ai A’u o le Alii, ua Ou fai atu ai; . . . pe i lo’u lava leo po o i le leo o a’u auaua, ua tutusa lava” (MF&F 1:38).

A o e suesueina le konafesi aoao ia Oketopa 2012, e mafai ona e faaogaina nei itulau (ma Tusigāmanatu o le Konafesi i lomiga i le lumanai) e fesoasoani ai ia te oe e suesue ma faaoga aoaoga talu ai nei a perofeta soifua ma aposetolo ma isi taitai o le Ekalesia.

TALA MAI LE KONAFESI

Pe O Se Mea Faafuaveta na Matou Fetauai Ai?

I se tasi po malulu naua o se Aso Toonai i le taumalulu o le 1983–84, na ma tietie atu ai ma Sister Monson i le tele o maila i le vanu maugā o Midway, Iuta, i le mea e i ai so matou fale. O le mauuluga o le fua o le ea i lena po o le 24 tikeri Faranaite i lalo o le selo (–31°C), ma sa ma mananao ia mautinoa o loo lelei mea uma i lo matou fale iina. Sa siaki ma iloa ai o loo lelei, o lea na ma tuua ai loa ae toe foi mai i le Aai o Sate Leki. E lei leva ona ma sopoia [ni nai] maila . . . ae pe loa le ma taavale. . . . Sa matuai o ma pa’ulia lava. . . .

Na amata ona ma savavali ma le musuā agai atu i le taulaga aupito lata ane, a o pasi saosasoa ane taavale. Mulimuli ane sa tu mai se taavale e tasi, ma sa ofo mai e se alii talavou



lana fesoasoani. . . . Na toe aveina i ma’ua e lenei taulealea agalelei i lo ma fale i Midway. Sa ou taumafai e toe totogi atu ia te ia e tusa ma lana auaua . . . , ae sa ia fai mai o ia o se Tama Sikauti, ma sa manao e fai se galuega lelei. Sa ou faailoa atu a’u lava ia te ia, ma sa ia faaalua foi lona agaga talisapaia mo le avanoa e fesoasoani mai ai. I le manatu ai pe tusa o le vaitausaga o se faifeautalai lona matua, sa ou fesili atu ai ia te ia pe o fuafua e faamisiona. Sa ia fai mai na te le o mautinoa po o le a tonu le mea e manao e fai.

I le taeao o le Aso Gafua na sosoo ai, sa ou tusia ai se tusi i le taulealea ma faafetai atu ia te ia mo lona agalelei. I le tusi sa ou fautuaina ai o ia e alu e faamisiona talai. . . .

Pe tusa ma se vaiaso mulimuli ane ai, sa telefoni mai ai le tina o le taulealea ma ta’u mai ai o lana tama o se alii talavou lelei tele, ae ona o ni uunaiga patino i lona olaga, o lea ua faaitiitia ai lona manaoga ua leva ona momoo i ai o le auaua atu i se misiona. Sa ia fai mai, na anapopogi ma tatalo o ia ma lona toalua ia suia le loto o le la tama. . . . Na manao [o ia] ia ou iloa, o loo vaavaai atu i le mea na tupu i lena afiafi malulu ia avea o se tali i a la’ua tatalo mo ia. Sa

ou fai atu, “Ou te ioe i lou manatu.”

Ina ua mavae ni masina ma ni mau fesootaiga ma lenei taulealea, sa ma matua fiafia ma Sister Monson e auai i le faamavaega ma lenei faifeautalai a o lei tuua mo le Misiona a Kanata Vancouver.

Pe o se mea faafuaveta ea na matou fetauai ai i lena po malulu o Tesema? Ou te le talitonu o se mea faapena. Ae, ou te talitonu o la matou feiloaiga, o se tali i tatalo faatauuanu a se tama ma se tina mo le atalii sa pele ia i la’ua.

Peresitene Thomas S. Monson, “Mafaufau i Faamanuiaga,” *Liahona*, Nov. 2012, 88.

Fesili e Manatunatu Loloto I Ai

- E mafai faapefea e le auaua atu i se misiona ona faamalosiā oe ma i latou e te aoaoina?
- O a mea e mafai ona e faia e saunia ai oe lava e auaua atu i se misiona?

Mafaufau e tusi ou mafauaiga i lau api talaaga pe talanoaina foi ma isi.

O isi punaoa mo lenei autu: *Talai La’u Talalelei: O Se Taiala i le Galuega Faafaifeautalai* (2004); Russell M. Nelson, “Fesili i Faifeautalai! E Mafai Ona Latou Fesoasoani Atu ia te Oe!” *Liahona*, Nov. 2012, 18–21.



Folafolaga Faaperofeta

“E silafia e lo tatou Tama Faalelagi o tatou manaoga ma o le a fesoasoani mai pe a tatou valaau atu ia te la mo se fesoasoani. Ou te talitonu, e leai se popolega o i tatou e itiiti tele nua pe faatauva. E popole le Alii i auililiga o o tatou olaga.”

Peresitene Thomas S. Monson, “Mafaufau i Faamanuia,” *Liahona*, Nov. 2012, 88.

TAIALA MO LE SUIGA O LE MATUTUA O FAIFEAUTALAI

I le konafesi aoao ia Oketopa 2012, na faasilasila mai ai e Peresitene Thomas S. Monson “O alii talavou uma e agavaa ma gafatia, o e ua faauu mai aoga maualuga pe o isi aoga e tutusa ma le maualuga

lena . . . o le a maua le avanoa lena e fautuaina atu ai mo le galuega faafaifeautalai e amata i le 18 tausaga, ae le o le 19. . . . O tamaitai talavou e gafatia, ma agavaa ma ua i ai le manao e faamisiona, e mafai

ona fautuaina atu mo le galuega faafaifeautalai e amata i le 19 tausaga, nai lo le 21” (“Susū Mai la ma Maliu Mai i le Konafesi,” *Liahona*, Nov. 2012, 4, 5).

TULIMANU E SUESUE AI

Faatusatusaga: Liua Moni

O nisi o autu e sili ona taua o loo talanoaina e le silia ma le toatasi le failauga i le konafesi aoao. O mea ia na saunoa i ai failauga e toafa e uiga i le liua moni. Taumafai e vaavaai mo isi aoaoga e tutusa a o e suesueina saunoaga o le konafesi.

- “O le liua moni . . . e aofia ai se tautinoga maua’i e ave a ma soo o Keriso.”¹ —Elder David A. Bednar o le Korama a Aposetolo e Toasefululua
- “I le papatisoga tatou te folafola atu ai e tauave i o tatou luga ‘le suafa o [Iesu] Keriso, ma maua [le] naunautaiga e auauna atu ia te ia e oo i le iuga.’ [Moronaē 6:3; faaopoopo le faamamafa.] O sea feagaiga e manaomia ai

se taumafaiga lototele, tuuto, ma le amiosao.”² —Elder Quentin L. Cook o le Korama a Aposetolo e Toasefululua.

- “O i tatou o soo o lo tatou Faaola, o Iesu Keriso. O lena liua ma le mautinoa, o le taunuuga lena o taumafaiga maelega ma le fuafuaina lelei. O le tagata lava ia. O le faagasologa i le olaga atoa.”³ —Ann M. Dibb, fesoasoani lua i le au peresitene aoao o Tamaitai Talavou.
- “Ua na o a tatou molimau lava o le a matua iloa sili ai mea o loo i o tatou mafaufau ma faalolotoina ai i o tatou loto, o le a ave a ai lo tatou naunautaiga e alolofa atu ma auauna atu e faapei o

le alofa o le Faaola.”⁴ —Elder M. Russell Ballard o le Korama a Aposetolo e Toasefululua

FAAMATALAGA

1. David A. Bednar, “Faaliliuina i le Alii,” *Liahona*, Nov. 2012, 107.
2. Quentin L. Cook, “E Mafai Ea Ona Outou Lagonaina Nei?” *Liahona*, Nov. 2012, 9.
3. Ann M. Dibb, “Ua Ou Iloa. Ua Ou Ola Ai. Ua Ou Alofa I Ai,” *Liahona*, Nov. 2012, 10.
4. M. Russell Ballard, “Ia Auai ma le Naunautai,” *Liahona*, Nov. 2012, 30.

Ina ia faitau, matamata, pe faalogologo foi i lauga o le konafesi aoao, asiase ane i le **conference** lds.org.

UA LAVA LE ATOATOA

Saunia e Michele Reyes

E mafai faapefea ona ou suia napekini, saunia se meaai o le afiafi, pe faanānā la'u fanau ae na o le tasi le lima?

I na ua 17 o'u tausaga, sa mutu le tele o lo'u lima agavale i se faalavelave tau taavale. O lenei aafiaga na suia ai lo'u olaga atoa. E ui sa i ai aso faigata ma taimi lu'itauina, ae o lenei afi faamama na ou maua ai le avanoa e molimauina ai le mana o le Togiola i se ala e tulaga ese.

O lo'u olaga atoa i le taimi nei ua faatatau i le avea o a'u o se ava ma se tina, o ni matafaioi se lua ua ou matua fiafia tele i ai. A o lei fananau mai la'u fanau, sa ou taumanatunatu i lo'u agavaa e avea o se tina. E mafai faapefea ona ou suia napekini, saunia se meaai o le afiafi, pe faanānā la'u fanau ae na o le tasi lo'u lima? I le sefululima tausaga mulimuli ane, sa ou i ai i le totonugalemu o lo'u tulaga faatina ma se fanau lelei e toalima. Sa lelei ona ou fetuuna'ia, ma sa toetoe lava ina le matauina e la'u fanau se eseese o a'u mai i isi tina. Ua le toe avea le leai o le isi o'u lima o se papupuni ae o se faailoga o le alofa. O se punavai o le mafanafana e mau ai la'u fanau pe a fetagisi pe fia momoe i le po. Atonu e tele ni mea e faasino i ai, ae ou te vaai i ai o se faamaoniga o le mafai e le Alii ona fatuina se mea lelei mai se mea matautia.

E le mafai ona ou faamatalaina le

suamalie ou te lagonaina i le mafai e lena vaega o a'u ona aumaia se mafanafana faapena i la'u fanau. O le tulaga faatina ua aumaia ai se vaaiga taua i lo'u tulaga tapulaa faaletino, ma ua ou lagona ai ua amata ona faamaloloina au e le Togiola.

O tiute i aso taitasi o le tulaga faatina, o nisi taimi e faigata. O taimi faigata ou te maua ai le mafuaaga e manatunatu ai i le moni o le Toetu ma le gafatia e le Faaola ona faamalolo a'u. O le mea lea, o faataitaiga o le faamalologa e siitia ai le faatuatua o loo maua i tusitusiga paia, e i ai lona uiga faapitoa ia te au. O

se tasi o faataitaiga ou te fiafia i ai, o le taimi lea na asiasi ai le Faaola i Amerika ma faamalolo i e mama'i. Na ou mafaufau pe faape'i pe ana o a'u o se tasi o i latou sa faamaloloina e le Faaola. E amata le tala i Lana valaaulia alofa:

“E i ai ea ni isi o ia te outou ua mamai? Ia aumai i latou iinei. . . . E i ai ea ni isi o outou ua pipili, pe ua tauaso, pe ua setu, pe ua manua, . . . pe ua puapuagatia i soo se ala? Ia aumai i latou iinei ma o le a ou faamaloloina i latou, ona ua ou agaalofa tele ia te outou; ua tumu lou loto i le alofa mutimutivale. . . .”



MALOSIAGA E OLA AI MA O OUTOU LUITAU

“O nisi o lu'i o le soifuaga o le a le foiaina iinei i le lalolagi. Sa faatolu ona aoi atu Paulo ina ia aveesea 'le mea matuitui i le tino'. Peitai na tali mai le Alii, 'O lo'u nei alofa tunoa e lava lea e fesoasoani ia te oe' (2 Korinoto 12:7, 9). . . . Sa la tuuina mai ia Paulo le malosia ina ia mafai ai ona ia ola i se olaga sili atu ona aoga. Ua finagalo le Alii ia e aoao le ala e faamaloloina ai pe afa'i o lona finagalo lena, ma le ala e maua ai le malosia e te ola ai e tusa ma le lu'i ua ia te oe, pe a la finagalo ia avea lenei lu'i ua ia te oe ma mea e te alualu ai i luma. Po o le a lava le tulaga, o le a lagolagoina lava oe e le Togiola.”

Elder Richard G. Scott o le Korama a Aposetolo e Toasefululua, “Ina Ia Faamaloloina,” *Liahona*, Iulai 1994, 8.



“. . . Aua ua ou iloa ua lava lo outou faatua-
tua ou te faamaloloina ai outou.

“. . . Ma sa oo ina ua uma ona fetalai mai
o ia faapea, sa o atu faatasi uma le motu o
tagata, ma o latou tagata mamai ma o latou
tagata puapuagatia, ma o latou pipili, ma o
latou tauaso, ma o latou gugu, ma i latou
uma o e na puapuagatia i soo se ala; ma sa
ia faamaloloina i latou uma taitoatasi” (3 Nifae
17:7–9).

Ia te au lava ia, o se tasi lenei o mea aupito
ootia o loo faamatala mai i tusitusiga paia.
Peitai ua suia la’u vaaiga ina ua ou faataua-
ina lo’u tulaga faatina ma lo’u lima e tasi. Sa
ou mafaufau i se tasi taimi, o a’u o se tasi o
tagata ua sili ona sagisagi atu i le Toetu ma le
manatu o le a faaatoatoaina ai. Peitai, ou te le
o toe popole i ai. Ae ua faateleina lo’u lagona
ua aoga le Togiola i lo’u olaga i le *taimi nei*.
Ua ou iloa e le tau amatalia le mana faamalolo
pe a tulai mai le Toetu. O lea lava ua amata le
atoatoa pe a, uuina ma le le gaoia, i po uma,
e se tasi o la’u fanau le toega o lo’u lima ma
faagaugau ifo ai. Ua tutusa lava le ‘anoa o
lenei iloa ia te a’u e faapei o soo se vavega o
le faamalologa. Ua tonu ia te au e faapea, mo
le taimi nei, ua ou atoatoa lava e pei ona ou
manaomia ai. ■

*Ua le toe avea
le leai o le isi
o’u lima o se
papupuni ae
o se faailoga o
le alofa. O se
punavai o le
mafanafana
e mau ai la’u
fanau pe a fia
momoe i le po.*

AISEA NA TUPU AI LENEI MEA IA TE AU?

Na tali e Elder Ronald A. Rasband o le Au Pere-
sitene o Fitugafulu le fesili lenei i lana saunoaga
i le konafesi aoao ia Aperila 2012, “O Lesona
Faapitoa”:

“O le olaga lenei o le aoaoga faamasani mo
le faaeaga e faavavau, ma o lena faagasologa o
lona uiga o suega ma tofotofoga. O le tulaga lava
lena sa i ai, ma e leai se tasi e sao mai ai.


“O le faatuatua ina o le finagalo o le Atua e
totonugalemu i lo tatou olaga i le tino. Faatasi ai
ma le faatuatua ia te la, tatou te utuvai mai ai i
le mana o le Togiola a Keriso i na taimi pe afai ua
anoanoai le mau fesili ae ua tau leai ni tali. . . .

“E ui o le a tatou fetai ai ma tofotofoga,
mafatiaga, lē atoatoa, lototiga, ma ituaiga uma
o puapuaga, ae o le a i ai pea iina lo tatou Faaola
agalelei ma agaalofa mo i tatou. Ua la folafola mai:

“‘Ou te le tuua outou o matuaoti: ou te sau ia
te outou. . . .

“‘Ou te tuuina atu ia te outou le manuia; o
lo’u manuia ou te avatu ai ia te outou; ou te le
avatu ia te outou faapei ona avatu e le lalolagi.
Aua e atuavale o outou loto, aua foi tou te
matatau’ (Ioane 14:18, 27).”

***O a auala e mafai ai ona e sailia le mafanafana
ma le filemu o le Faaola i ou tofotofoga?***



Piko [Pickles], Tunipa, ma le Molimau

MUSUMUSUGA MAI LE SOIFUAGA
MA AOAOGA A LORENZO SNOW

A o outou suesueina aoaoga a Peresitene Lorenzo Snow i lenei tausaga, o le a outou iloa ai o ia o se perofeta, tagatavaai ma se tali-faaaliga ua matua talafeagai lelei ana fautuaga ma le taimi nei.

A fai ua e vaai i se ata o Lorenzo Snow, le Peresitene lona lima o Le Ekalesia a Jesu Keriso o le Au Paia o Aso e Gata Ai, atonu e te manatua lana soesa uumi ma ona foliga agalelei. Ma afai e te nofo mo ni nai minute ma vaiiili lelei lenei ata, atonu e tosina atu oe i fofoga [mata] o Peresitene Snow—ua lē lava ae lē vaivai, ua afu le soifua ae tumu i le malamalama ma le malosi.

Atonu na outou faalogo na musuia Peresitene Snow e talai atu e uiga i le sefuluai, atonu foi tou te manatua le faitau i se mea e uiga i se aafiaga paia sa ia maua i le Malumalu i Sate Leki.

Ae tou te silafia le mea na tau atu ai i lenei aafiaga i le malumalu ma le mea na tulai mai ai? Pe tou te fia iloa le tala e uiga i le faaaliga na ia mauaina e uiga i le tulafono o le sefuluai?

Ae o le a se tala i ona fofoga ma ona foliga? Ina ua maea se fonotaga ma Peresitene Snow, sa tusia e se faifeau o se isi faatuatuaga:

“O lona foliga o se mana o le filemu; o lona faatasi ai o se tatalo mo le filemu. I le filemu loloto o ona mata, sa le gata o le ‘nofoaga o le tatalo le leoa’, ae o le apitaga o le malosi faaleagaga. . . . ma le lagona ese na segia ai a’u, faapea sa ou ‘tu i luga o nofoaga paia.’”¹ Pe e te fia iloa e uiga i mea uiga ese, o tofotofoga, o manumalo, faanoanoaga, olioliga, ma faaaliga na tuufaatasia e fatufatu ai na ituaiga o foliga?

O le tausaga nei, o le a aoaoina ai e tuafafine o le Aualofa ma i latou e umia le Perisitua Mekisateko ia *Aoaoga a Peresitene o le Ekalesia: Lorenzo Snow*. A o outou aoaoga mai i aoaoga a Peresitene Snow ma talanoaina i le lotu ma le fale, o le a outou iloa ai o ia e sili atu i lo na o se alii foliga agalelei i se atavali ua leva. O le a outou iloa ai o ia o se tagata o le Atua—o se perofeta, tagatavaai,



FAAMATALAGA O LE TALAAGA O LE SOIFUAGA

Na soifua mai Lorenzo Snow i le aso 3 Aperila, 1814, i Mantua, Ohio, ISA. O ona tuua, o Rosetta ma Oliver Snow, na tausia o ia ma nai ona tei e toaono i se aiga sa faapaiaina i le faatuatua, galue malosi, auauna atu, ma a’oa’oga. O nei mataupu faavae na saunia o ia e taliaina le talalelei toefuataiina. O luni 1836 na ia auai ai i Le Ekalesia a Iesu Keriso o le Au Paia o Aso e Gata Ai i Katelani, Ohio, na uunaia e musumusuga a le Agaga Paia ma nai tuualalo mālū mai lona tuafafine o Eliza lea ua auai i le Ekalesia. A o lei atoa se tausaga mulimuli ane, sa tofia o ia e avea o se faifeautalai faamisiona.

I le isi 12 tausaga na sosoo ai, sa auauna atu o ia i nisi misiona i le lunaite Setete, ma sa ia taitaia foi se vaega o paionia o le Au Paia o Aso e Gata Ai i le Vanu o Sate Leki. O ia o se faifeautalai tuuto, malosi, sa galue i Italia, Atumotu o Hawaii, ma le lunaite Setete i sisifo. Sa faauuina o ia o se Aposetolo i le aso 12 Fepuari, 1849. Sa i ai foi o ia i isi vaega o le Ekalesia i tulaga faaletā’ita’i, e aofia ai le silia ma le 5 tausaga na avea ai ma uluai peresitene o le Malumalu o Sate Leki. I le aso 10 Oketopa, 1898, sa vaetofia ai o ia e avea ma Peresitene o le Ekalesia. Na maliu o ia i le aso 10 Oketopa, 1901, i le Aai o Sate Leki, luta.

ma se talifaaaliga ua matua talafeagai lelei lava ana fautuaga ma le taimi nei.

Tau lava ina faaosofia lou naunau, o nai faataitaiga nei o aoaoga ma tala o le a e maua-ina i suesuega o lenei tausaga. I parakalafa nei, o numera o mataupu ma itulau e faasino i *Aoaoga a Peresitene o le Ekalesia: Lorenzo Snow*.


Atonu e te manatua se saunoaga manaia i le konafesi aoao lea na faatusa ai e Elder David A. Bednar o le Korama a Aposetolo e Toasefululua le faagasologa o le liua i le faagasologa o le tuuvinekaina o se kukama.² O Elder Bednar e le o se Aposetolo muamua lea ua faia lenei faatusatusaga. Na faamatala mai e Peresitene Snow se silafia faapena i le 150 tausaga na muamua atu:

“Ia tuu se kukama i totonu o se paelo vineka ma o le a e iloa ai e itiiti se aafiaga e tulai mai i le itula muamua, e faapea foi i le 12 itula muamua. Toe vaavaai i ai, ma o le a e iloaina, o le mea ua tupu ua na o le pa’u ua aafia, aua e manaomia se taimi umi e faasaoina ai meaai e le vineka. O se tagata ua papatisoina i le ekalesia ua i ai se aafiaga ia te ia, ae le o le aafiaga e faasaoina ai loa lava o ia. E le faatuuina ai le tulafono o le aia tatau ma le tiute mo ia i le 12 po o le 24 itula muamua; e ao ona ia tumau i le ekalesia, e pei o le kukama i totonu o le vineka, seia mafai ona faatumuina o ia e le agaga sa’o.”³

Pe a talanoa mai Peresitene Snow e uiga i le liua, e na te talanoa mai mai aafiaga. E masani lava ona ia faamatalaina ni mea se lua na tutupu—e tasi na tupu ae e le i auai i le Ekalesia ma le tasi na tupu ina ua faatoa uma lona papatisoga ma le faamauga—lea na fesoasoani ia te ia e “faatumuina e le agaga sa’o.” E mafai ona faitau i tala o nei aafiaga i itulau e 1, 3, 59, ma le 61–62.

“Aisea e valaauina ai [se] alii e galue o se peresitene o se nuu?” Sa fesili Peresitene Snow i se tasi taimi. “Pe ina ia maua ai se malosiaga, ona faaaogaina lea o lona malosiaga mo lona lava viiga? E leai, ae i le isi itu, ua valaauina





*Sa folafola atu e Peresitene Snow e faapea, o le totogi o le sefuluai e mau mai ai faamanuiaga. Sa masani ona taliaina sefuluai i ofisa e pei o lea e faali atu i i (Aai o Sate Leki, 1880).
Tauagavale: I tapenapenaga e talimalo i ni uo, sa faia ai e Peresitene Snow ni tuugalamepa mai tunipa e faamalamalama ai lona fale ogalaau.*

o ia e galue i se tofiga lea e ogatasi ma le aoaoga faavae, lea e pei ona sa faia e le Alo o le Atua ina ua tuuina atu le perisitua ia te Ia, e tatau ai ona Ia faia osigataulaga. Mo ia lava? E leai, ae mo le manuia o tagata lea ua ia pulefaamalumu ai. . . . Ia avea ma auauna mo ona uso, e le o lo latou matai, ae ia galue mo lo latou lelei ma le manuia.”⁴



I le avea ai ma se taitai o le Ekalesia, sa faataitai e Peresitene Snow lenei mataupu faavae, ma o nisi taimi na te maua ai ni auala fatu e faia ai. Mo se faataitaiga, na ia faaogaina ai i se tasi taimi ni tunipa, ie moega, ma lauvaro e siitia ai agaga o se vaega pagatia o le Au Paia. O loo maua lenei tala i le mataupu e 7. Ina ia faitau i nisi o ana aoaoga e uiga i le taitaiga o le Ekalesia, tagai i le mataupu e 18.

O Peresitene Snow o se taitai mamana, fatufatua’i, ma mataalia aua sa ia silafiaina le Taitai moni. Sa ia aoao mai, “O le galuega tele ua faataunuina nei—le faapotopotoina o tagata mai malo o le lalolagi, e le’i tupu mai i se mafau-fau o soo se tagata, po o se vaega o tagata; ae na tupuga mai i le Alii Silisili Ese.”⁵ I le tali atu i se faapotopotoga o tagata o le Ekalesia sa faamamaluina o ia i lona aso soifua lona 85, na ia saunoa ai, “Ou te lagonaina faapea, o le a lava se mea ua ou ausiaina, e le faapea ona o Lorenzo Snow, ma mea na tutupu na aumaia ai a’u i leni tofiga

o le avea ma Peresitene o le Ekalesia, —e le o Lorenzo Snow, ae o le Alii na faia.”⁶

Sa ia aoao atu leni upumoni i lana auaunaga atoa, peitai na faamanatu atu ia te ia i se ala paia ma le patino ae le o toe mamao ona avea lea ma Peresitene o le Ekalesia. Sa avea o ia ma Aposetolo sinia i le Ekalesia ina ua maluu Peresitene Uilifoti Uutilafi i le aso 2 Setema, 1898. I lona manatu ifo o ia lava e le agavaa e tauave leni tiutetauave, sa alu ai na o ia i se potu i le Malumu i Sate Leki e tatalo ai. Sa ia augani atu mo se taitaiga ae sa ia lei mauaina se tali i lana tatalo, o lea ina ua mavae sina taimi, sa ia tuua le potu ma ulu atu ai i se faapaologa lautele. O iina na oo mai ai le tali. Sa tu atu le Faaola toetu i ona luma, pe tusa ma le tolu futu (1 m) i luga a’e o le fola, ma ta’u atu ai ia te ia e alu ma taitai le Ekalesia. Ina ia iloa atili e uiga i leni aafiaga, tagai i le mataupu e 20.

Ua lauiloa Peresitene Snow i le taliaina o se faaaliga e uiga i le tulafono o le sefuluai. Mo tagata o le Ekalesia i le 1899, na amata leni faaaliga i se tautinoga lototoa: “Ua oo mai le taimi mo tagata taitasi o le Au Paia o Aso e Gata Ai, o e ua fuafua e saunia mo le lumanai ma tutu malos i luga o se faavae tatau, e faia le finagalo o le Alii ma totogia ma le atoatoa lana sefuluai. O le afioga lena a le Alii mo outou.”⁷



Sa i ai se aafiaga paia o Lorenzo Snow na vaai ai le Alii toetu i le Malumalu o Sate Leki.

Sa tali atu ma le faatuatua le Au Paia o Aso e Gata Ai i le fautuaga a lo latou perofeta, ma o le taunuuga sa faamanuiaina i latou e le Alii e le gata i tagata taitoatasi ae o se faalapotopotoga foi. O loo faaauau pea le uuniga o lena faaaliga i ona po nei, a o mauaina e tagata o le Ekalesia i le lalolagi ato ia faamanuiaga faaletino ma faaleagaga i le lalolagi ato e ala i le usiusitai i le tulafono o le sefuluai. Ina ia faitau e uiga i le aafiaga na afua ai lenei faaaliga ma faamanuiaga na mulimuli mai ai, tagai i le mataupu e 12.

E faapei foi o perofeta uma, na tuuina mai e Peresitene Snow se molimau mamana e uiga ia Iesu Keriso. “Tatou te faalagolago uma lava ia Iesu Keriso, i lona afio mai i le lalolagi e tatala le auala lea e mafai ai ona faamausali le filemu, fiafia, ma le faaeaga. Ma a na ia le faia

nei taumafaiga, semanu e le mafai lava ona tatou maua nei faamanuiaga ma avanoa ia ua faamautu mai ia i tatou i le talalelei.”⁸ Na ia molimau mai e uiga i le soifua mai o le Faaola, o Lana auunaga i la le tino, Togiola, o Lona auai patino i Lana Ekalesia toefuataiina, ma le Afio Mai Faalua. Mo nisi tala e uiga i le molimau ia Iesu Keriso, tagai i le mataupu e 24.

E moni, o lenei tusiga puupuu e mafai ona e maua ai na o se tofo i le soifuaga ma le auunaga a Peresitene

Snow. I lau suesuega o *Aoaoga a Peresitene o le Ekalesia: Lorenzo Snow*, o le a e maua ai le tele o isi tala musuia, e aofia ai tala o lona uluai avanoa faafaiaoga a o avea o se faifeautalai, o lona matuai ofo tele i le valaauina i le Korama a Aposetolo e Toasefululua, o ona lagona i le taimi na i ai i luga o le Vasa Atelani i se afa matautia, ma isi taimi e fa na laveaiina ai tagata (e aofia ai ma Lorenzo Snow lava ia) mai le oti, i le mana o le perisitua. E tele mea e mafai ona e aoaoina mai i ana aoaoga e uiga i ni mataupu eseese, e aofia ai le lotogatasi, lotomaulalo, fea-gaiga, galuega i le malumalu, sootaga faaleaiga, taumafai ia atoatoa, perisitua, Aualofa, ma le olioli i le faasoaina atu o le talalelei.

Afai e te faaaluina se taimi e faitau ai ma manatunatu loloto i tala ma aoaoga o loo ta'ua i lenei tusiga—pe ua e fuafua foi o le a e faitauina i se taimi lata mai—e mafai ona faamautinoaina oe o le a fiafia Peresitene Snow i au taumafaiga. O ia o se tagata na aoao i lona olaga atoa, ma sa ia aoao mai e tatau ona tatou “faaaogaina e i tatou lava” ina ia mafai ai ona “agaigai i luma [lo tatou iloa] i mataupu faavae o le upumoni” ma “faateleina le malamalama faalelagi.”⁹ Sa ia fautua malosi mai, “O aso mulimuli taitasi, po o vaiaso faaii, e tatau ona avea ma taimi sili e mafai ona tatou mauaina, o lona uiga, e tatau ona tatou agai teisi atu i luma i aso uma, i le malamalama ma le potu, ma, i le agavaa e ausia ai le lelei.”¹⁰

Ia faatamaoigaina lou soifua i lenei tausaga e ala i lou suesueina o *Aoaoga a Peresitene o le Ekalesia: Lorenzo Snow*. A o e suesue, e mafai ona e maua se aafiaga e pei foi o lona faifeau lelei na feiloai fesagai ma Peresitene Snow. O le vaai i luga atu o na foliga agalelei ma na fofoga toafilemu, e mafai ai ona e lagoina o loo e tu i luga o se nofoaga paia—e le faapea e te silafia Lorenzo Snow, ae ona ua e latalata atili atu i lou Tama Faalelagi ma Iesu Keriso, lea na avea ai o ia ma molimau. ■

FAAMATALAGA


1. Reverend Prentiss, ta'ua i le *Aoaoga a Peresitene o le Ekalesia: Lorenzo Snow* (2012), 32.
2. Tagai David A. Bednar, “E Ao Ina Toe Fanau Mai Outou,” *Liahona*, Me 2007, 19–22.
3. *Aoaoga: Lorenzo Snow*, 72.
4. *Aoaoga: Lorenzo Snow*, 237.
5. *Aoaoga: Lorenzo Snow*, 165.
6. *Aoaoga: Lorenzo Snow*, 159.
7. *Aoaoga: Lorenzo Snow*, 169–170.
8. *Aoaoga: Lorenzo Snow*, 297.
9. *Aoaoga: Lorenzo Snow*, 69.
10. *Aoaoga: Lorenzo Snow*, 111–112.

ELEMENE O AOAOGA A PERESITENE O LE EKALLESIA: LORENZO SNOW


O lenei tusi o le isi lea faaopoopoga i lau lava potutusi ma lou aiga o *Aoaoga a Peresitene o le Ekalesia*. Ua 11 nei tusi o le volumna, lea e aumai ai le malamalama musuia i le tele o autu faale-talalelei.

O nisi nei o elemene autu o lenei tusi:

- Faamatalaga musuia mai ia Peresitene Snow i le silia ma le 75 autu faale-talalelei.
- Faiva alofilima fou ma atapue mai le soifuaga o Lorenzo Snow, ia e toatele tagata o le au paia e lei vaai i ai.
- O ituaiga e tolu o fesoasoani mo le aoao atu ma le aoao mai i mataupu taitasi: o fesili faatupu manatu, o mau e faatatau i le autu o le mataupu, ma fesoasoaniga faafaiaoga e faaleleia atili ai le auai o le vasega i le faatinoina ma talanoaga.
- O itulau e tolu o faatonuga e fesoasoani ai i tagata o le au paia e faalatele lo latou suesueina o le tusi, ma aoao atu ma musumusuga i le fale po o le lotu.



O loo maua foi le tusi i le initoneti i le LDS.org ma le Gospel Library app (i le faa-Peretania) i le mobile.lds.org.



IA ILOA LORENZO SNOW

Saunia e Christopher D. Fosse

O le tausaga lenei, o le tusi lesona mo vasega a le Aualofa ma le Au Perisitua Meki-sateko e taulai atu i le soifuaga ma aoaoga a Peresitene Lorenzo Snow (1814–1901). Peitai, talu ai atonu o la outou vaega e le faaogaina leni tusi, e le faapea ai o le a le mafai ona outou aoaoina se mea pe lua e uiga ia te ia. Na soifua Peresitene Snow i se soifuaga ofoofogia sa tumu i faigata ma manumalo.

O Se Siamupini mo le Talalelei

Na uluai faafofoga Lorenzo Snow e uiga i le Ekalesia a o laititi lava o ia. O le taimi muamua, sa leai sona manao e papatiso, e ui o lona tuafafine o Eliza (le Eliza R. Snow lava lea e tasi na tusia le tele o viiga a le Au Paia o Aso e Gata Ai ma avea ma peresitene aoao lona lua o le Aualofa)

na taliaina ma le naunautai le talalelei. Peitai, na ia manatu e manaia tele le aoaoga faavae o le Ekalesia. Ina ua amata ona auai Lorenzo i le kolisi i Oberlin, Ohio, e tele taimi na te faa-soa ai talitonuga faale-Lotu i tamaiti aoga o ē na aoaoina e avea ma faifeau Porotesano. E ui e lei tautino atu lava o ia e papatiso, ae sa matua lelei lona tu atu mo le talalelei ma o lea sa toatele ai tamaiti aoga i Oberlin, na ioe e ono tataua ona moni le Ekalesia toefuataiina.

I lona malosi o se faifeautalai e pei foi ona i ai a o le'i ona taliaina le talalelei, e leitioa atili tuuto atu Lorenzo i le galuega ina ua uma ona papatiso. I ona uluai tausaga o le avea ai ma tagata o le Ekalesia, na tofia ai o ia e avea ma faifeautalai faamisiona. Na muamua talai i Ohio, sosoo ai ma Misuri, Kentucky, ma

Ilinoi, ISA. Na auina atu mulimuli ane o ia i Peretania Tele e fesoasoani i le faatulagaga o le Ekalesia i Egelani. A o i ai o ia iina, na ia tuuina atu kopi o le Tusi a Mamona i le Tupu Tamaitai o Victoria ma Perenise Alapati. Na faamisiona mulimuli ane i misiona i Italia, Suitiselani, ma nofoaga ia na avea mulimuli ane ma Atumotu o Hawaii.

Vavega i le Vasa

Ina ua tuua e Elder Snow ia Egelani e toe foi i Navu, Ilinoi, sa ia aumaia se vaega toatele o tagata faatoa papatiso. Sa tofogi uma o latou pasese i le vaa o le *Swanton* ma saunia ai mo le malaga umi i Amerika i Matu.

E ui e lei agaleaga le kapeteni o le *Swanton* i le Au Paia o Aso e Gata Ai i luga o lona vaa, ae sa le'i matuai

Auauna atu i ni misiona i le lunaite Setete.

Auauna atu i se misiona i Hawaii.

Aoao maia mataupu faavae o le talalelei e auaina ai i tamaiti a'oga.

O nai mea ia atonu e te le o iloa e uiga i le Peresitene lona lima o le Ekalesia.

agalelei foi. Sa masani ona taumamao ese lava o ia mai ia i latou. Peitai, ina ua tusa ma le lua vaiaso ua mavae i luga o le vasa, sa i ai se mea na tupu. Sa matua manu'a tuga le soatau a le kapeteni i se faalavelave. Sa leai se tasi na manatu e aulia e le soatau le ao.

Peitai sa i ai se fautuaga a se tuafafine faatuatua sa fesoasoani i le seila ua tigaina. Sa ia fai atu i le soatau e mafai e Elder Snow ona tuuina atu ia te ia se faamanuiaga ma e ono laveaiina ai lona ola. Sa ioe atu ma le naunau le soatau—o lē sa faigaluega e tausi ai lona toalua ma lana fanau e toalua o loo i —Siamani.

I le tulua o po ma ao, sa fafaguina ai Elder Snow ma sa talosagaina e sau i le potu o le alii lea ua tigaina. Ina ua taunuu mai o ia, sa la fetaia'i ma le kapeteni o le vaa. Sa faafetai atu le

kapeteni i lona sau, ae sa ia faailoa atu ua leai se faamoemoe. Sa mafai ona iloa atu e Elder Snow sa tagi le kapeteni.

Sa alu atu o ia i le potu, tuu ona lima i luga o le ulu o le soatau, ma avatu ia te ia se faamanuiaga faaleperisitua. O le taimi lava na uma ai le faamanuiaga a Elder Snow, sa nofo ai i luga le tamaloa ma alu ese mai lona moega. Sa matua faamaloloina atoa le soatau, ma sa toe foi atu o ia i ona tiute i le aso na sosoo ai.

O Le Tauga o Agaga

O le faamaloloina o le soatau na suia ai mea i luga o le *Swanton*. Na amata ona faaalu e le kapeteni le tele o ona taimi sa mafai ona faaavanoa i le Au Paia, ma sa ia suesue foi i le talalelei ma auai i sauniga lotu a le Ekalesia. Na faapena foi ona maofa

ia isi seila. Ina ua taunuu le vaa, sa faatofa atu ma le alolofa le auvaa i le Au Paia. E ala i le mana o le perisitua, e le gata ina sa laveaiina ai le ola o se tamaloa, ae e toatele foi isi na tepa ai i le mana ma le alofa o le Atua. Na iu ina papatisoina le soatau ma le toatele o le auvaa.

E tele isi mea ofoofogia na tutupu i le soifuaga o Peresitene Lorenzo Snow. O lea, o le tausaga lenei, a o suesueina e le au matutua *Aoaga a Peresitene o le Ekalesia: Lorenzo Snow*, o le a le mea tou te le mulimuli ai foi? I Aso Sa pe a i ai sou taimi avanoa, e mafai ona e faitauina nisi o aoaga a Peresitene Snow. O le a mafai ona tele sou sao i talanoga faaleaiga o le talalelei, ma a o faagasolo o le a e iloa ai se tamalii ofoofogia lea na avea ma se perofeta a le Atua. ■

Faamaloloina le soatau a le kapeteni i se malaga toe foi i Amerika i Matu.



Na tuuina atu kopi o le Tusi a Mamona i le Tupu Tamaitai o Victoria ma Perenise Alapati.





**Saunia e Elder
Neil L. Andersen**

O Le Korama a
Aposetolo e
Toasefululua

O LE MIGAO I LE ATUA O LE AMATAGA LEA O LE Poto

O le poto o le lalolagi, e sili ona taua pe a uunaia ma mulimuli i le poto o le Atua.

Ua tatou ola i se lalolagi ua matua anoanoai ai faamatalaga. Atonu e pei o se faatusa i le lalolagi le Wikipedia, le tusifafau [encyclopedia] aupito sili ona tele i le initoneti. Ina ia e maua sona aotelega, e oo mai i le 2012 ua silia ma le 2.5 piliona upu i le na o le faa-Peretania lava ia ma le silia ma le 22 miliona tusiga mai gagana pe 284. Ua silia ma le 70 lomiga o gagana o le Wikipedia ua tofu ma tala e le itiiti ifo i le 10,000. E silia ma le 4 miliona tusiga i le lomiga faa-Peretania.¹

Ua faamaonia le anoanoai tele o tatou faamatalaga faapea foi i le matuai faateleina o saite faaagafesootai o uepega fesootai e pei o le Facebook, na amatalia i le 2004 ma ua silia ma le 1 piliona tagata o loo faaaogaina nei i le lalolagi atoa i le 2012,² po o le YouTube, lea na faalauiloa mai i le 2005, lea ua lipotia mai ai ni ata faavitio ua maimoaina i le silia ma le 100 miliona taimi.

O le i ai o lenei galufafati o faamatalaga, ua tatou matua manaomia ai lava le poto, poto e faavasega ai ma iloaitino le auala e faaoga ai mea o loo tatou aoaoina. O T. S. Eliot, o se Kerisiano talitonu na tusia i le tele o tausaga ua mavae se solo, ma o loo saunoa mai i lo tatou lalolagi i ona po nei:

*Oi le lalolagi e o le tautotogo,
e fotu mai ma mou atu!
Le li'o e le i'u o manatu ma faatinoga,
O fatufatuga e le uma, suesuega e le uma,
E aumaia le silafia i gaoioiga,
ae le o le mateloloa;
Le silafia i le faiva o le tautala,
ae le o le gugū;
Le silafia o upu, ma le le iloa o le Upu.
O lo tatou iloa faalelalolagi e tauau ai
ina le iloa se mea faalelagi,
O lo tatou valea uma e lata ai ina oti,
Ae o le lata i le oti ae le iloa le Atua.
O ifea le Ola faaleagaga ua galoma atu
i le ola faalelalolagi?
O ifea le poto ua galoma atu i le
malamalama faalelalolagi?
O ifea le malamalama ua galoma atu
i faamatalaga?
O taimi ua pasi o le Lagi i seneturi
e luasefulu
Ua atili mamao ese ai i tatou mai le
Atua ae lata atu i le Efuefu.³*

O le a le tele o lou iloa i le poto? Atonu e manatua e nisi le tamaitai talavou, sa sagisagi fiafia i lana faaiipoipoga ua lata mai, ma sa fai atu i ona matua, "Oi, o le a ou faaiipoipo.



Ua ou i ai nei i le pito o o'u faafitauli." Ma sa musumusu atu lona tina i lona tama, "Ioe, ae na te le o iloa po o le fea pito."

O le tele o lo'u aoao i le poto o le Atua, o le tele foi lena o lo'u talitonu o lea faatoa ou i ai i le pito amata o le poto. E faalotomauualalo ai au i lo'u iloaina le tele o mea e tatau ona ou aoaoina. O le taimi nei, ua ou faamoemoe e faatele lo'u naunau ia maua le poto aemaise lava o le poto o le Atua.

O Faamanuiaga o le Poto

Ou te manao e faamamafa atu le tele o mataupu faavae o le poto. Muamua, i lo tatou vaitau o faamatalaga ma le malamalama, e tatau ona tatou saili i le poto. O le poto e tele ituaiga ma e felanulanui. O le poto e vave ona maua e aumaia ai faamanuiaga maoae. O le poto i se isi itu e le mafai ona feavea'i atu mai se tasi i se isi. Ma le mea mulimuli, o le poto o le lalolagi, e ui o le tele o taimi e taua ai, ae e sili ona taua pe a uunaia ma mulimuli i le poto o le Atua.

O loo faamatala mai e tusitusiga paia ni ituaiga se lua o le poto: o le poto o le lalolagi ma le poto o le Atua. O le poto o le lalolagi e i ai uma itu e lua o le lelei ma le leaga. I se faamatalaga e sili ona leaga, e mafai ona faamatalaina o se afa upumoni, e fefiloi ma le atamai ma le faaaimamago, e faataunuu ai faamoemoega manatu faapito ma faatiapolo.

O se faataitaiga mai le Tusi a Mamona o le tagata o Amiliki. Fai mai le mau "sa i ai se tasi tagata, sa igoa ia Amiliki, o ia o se tagata faitogafiti tele, ioe, *o se tagata poto tele e tusa ma le poto o le lalolagi na . . .* [taitaiese] e ia le toatele o tagata." Na faamatala mai foi e le mau ia Amiliki o se "tagata amioleaga, . . . [o lona] faamoemoe [o le] faaumatiaina lea o le ekalesia a le Atua" (Alema 2:1–2, 4; faaopopo le faamamafa). Tatou te le fia mananao i lea ituaiga o poto.

E i ai le ituaiga poto o le lalolagi e le leaga tele. O le mea moni, e lelei lava. O le poto lea, e maua lava e ala i le suesue, mafaufau loloto, mataitu, ma le galue malos. E taua

tele ma fesoasoani tele i mea tatou te fai. I tagata lelei ma tausafia, e oo mai a o tatou feagai ma mea tutupu i o tatou olaga.

Atonu tou te manatua le faamatalaga a le tusitala Amerika o Mark Twain: "A o ou tamaitiiti ua 14 tausaga, sa matua le iloa e lo'u tamā se mea, ma sa ou matua le fia i ai lava i se mea e i ai lo'u tamā. Ae ina ua 21 o'u tausaga, sa ou ofo i le tele o mea na ia aoaoina i le 7 tausaga."⁴ Afai tatou te matauina mea, afai tatou te magafagafa, e oo mai le taimi e mafai ona tele naua mea e aoaoina ai i tatou.

Ou te manatua le taimi o lo'u faauuga mai le kolisi. Sa ou alu atu mai le Iunivesite o Polika Iaga i Preston, Idaho, ISA, i le mea sa nofo ai lo'u tinamatua o Mary Keller. O le taimi lena ua 78 ona tausaga le matua ma ua olomatua lava. Sa maliu o ia i le lua tausaga mulimuli ane. O ia o se tamaitai ofoofogia, ma sa ou iloaina afai ou te faalogo ma aoao mai ona poto masani, e mafai ona ou aoaoina mai ai le poto o le a fesoasoani ia te au.

E mafai ona tatou tulioso i luga atu o le tele o aafiaga faanoanoa e oo mai i nisi i le olaga e ala i le vave mauaina o le poto—poto e i talaatu o tausaga o lo tatou matua. Saili i le poto lea—ia mafaufau loloto, mataitu ma le toto'a, mafaufau i mea e te oo i ai i le olaga.

E mafai foi ona tatou aoaoina le poto i a tatou tulimataiga patino faalematātā ma faaletagata lava ia. Sei ou tuuina atu ni faataitaiga se lua.

O Dr. DeVon C. Hale o se fomai faapitoa i le Aai o Sate Leki ma sa soifua ae i Idaho Falls, Idaho. Ou te maofa lava i lona silafia ma le poto e faatatau i faama'i masani i vaega o le teropika. E le na o le silafia e Dr. Hale ae faapena foi i lona malamalama i le auala e faaoga ai lena silafia, e faavasega ai ia atulaina o faamatalaga ma fefaatusatusaa'i. O se faamanuiaga le i ai o lena ituaiga o poto mo faifeautalai i le salafa o le lalolagi.

O se faataitaiga lona lua: Ina ua amata le aoga tulagalua a lo ma atalii matua i lo matou nuu i Tampa, Florida, ISA, sa ma naua lava e feiloai atu i le faiaoga o le aoga

E mafai ona tatou tulioso i luga atu o le tele o aafiaga faanoanoa e oo mai i nisi i le olaga e ala i le vave mauaina o le poto.



faata'ita'i, o Mrs. Judith Graybell. O se tamaitai ua 50 ma ona tupu tausaga, ma e maoae foi lona tomai i tamaiti laiti. Sa ia iloa lelei le auala e faaosofia ai i latou, iloa le taimi e faaviivii ai i ai, ma le taimi e pāū ai. Sa ia te ia le silafia e aoao ai i latou, ae e anoanoai isi tomai sa ia te ia. Sa ma galulue malosi ina ia ave le ma fanau uma i lana vasega faata'ita'i.

Ua faaalua e nei tagata e toalua le poto moomia i le lalolagi. O lo la'ua poto o se fesoasoani i le toatele, ma ua mafai ai e i la'ua ona manuia i a la'ua matata.

Ae peitai, e tataua ona tatou iloa tapulaa o lenei poto. O le poto i se tasi vaega, atonu e le aoga ona tauave atu i le poto i le isi. Mo se faataitaiga, atonu ou te le manao ia Mrs. Graybell e taulimaina faama'i o le teropika, atonu foi ou te le manao ia Dr. Hale e faiaoga i le vasega faata'ita'i a lo'u atalii.

O le mea e sili atu ona taua, o le poto e aumaia ai le manuia i le lalolagi, e tataua ona naunau e la'a i tua o le poto o le Atua ma aua nei mafaufau e mafai ona ia sui ai.

Manatua: e lei foafoaina tutusa le poto uma.

Fai mai le Fai Salamo, "O le mata'u ia Ieova o le amataga lea o le poto" (Salamo 111:10). O le uiga o le mau o le "migao

a'ia'i"⁵ mo le Alii o le amataga lea o le poto. O lenei migao a'ia'i e oo mai aua o lo tatou Tama Faalelagi "ua ia te ia le poto uma, ma le mana uma, i le lagi ma le lalolagi" (Mosaea 4:9). E atoatoa lona poto. E mama a'ia'i. E le manatu faapito.

O lenei poto, e i ai taimi, o le a faafeagai ai ma le poto o le lalolagi, o lona uiga, o le poto o le Atua ma le poto o le lalolagi o le a matua feteenai lava le tasi ma le isi.

O manatua upu a le Alii ia Isaia?

"Aua o o'u manatu e le o outou manatu, o o'u ala e le o outou ala, ua fetalai mai ai Ieova.

"Aua e pei ona sili ona maua o le lagi i le lalolagi, ua faapea ona sili ona maua o o'u ala i o outou ala, ma o'u manatu e sili i o outou manatu" (Isaia 55:8-9).

O le a le oo mai le poto o le Atua ia i tatou e ala i aia tataua; e tataua ona tatou naunau e sailia. "Ae afai ua leai se *poto* i so outou, ina *ole* atu ia i le Atua, o le foai tele mai i tagata uma ma le le toe tautaua; ona foaiina mai ai lea ia te ia" (Iakopo 1:5; faaopoopo le faamamafa).

O le poto o le Atua o se meaalofo faaleagaga. "*aua le saili mo oa ae mo le poto*, ma faauta, o le a fofola atu ia te oe mealilo a le

O le poto e aumaia ai le manuia i le lalolagi, e tataua ona naunau e la'a i tua o le poto o le Atua ae aua le mafaufau faapea e mafai ona sui ai.

Atua, ona faamauoaina ai lea o oe” (MF&F 6:7; faaopoopo le faamamafa).

O le saili mo le poto o le Atua e o faatasi i taimi uma ma le usiusitai i poloaiga.

O le mea masani lava, o le meaalofa faaleagaga o le poto e oo mai i lea laasaga ma lea laasaga, a o tatou sailia ma le faamaoni ma le maelega. “Ou te tuu atu i le fanauga a tagata lea fuaitau i luga o lea fuaitau, ma lea mataupu i luga o lea mataupu . . . ma e manuia lava i latou o e e faalogologo i a’u mataupu, . . . ona o le a latou aoaoina le *poto*; ona o ia o lē na te taliaina o le a Ou tuu atu atili i ai” (2 Nifae 28:30 faaopoopo le faamamafa).

Na saunoa Iosefa Samita: “O mea a le Atua e matuai taua tele; ma e na o le taimi, ma le poto masani, ma le faaeteete ma le mafaufau loloto ma mafaufauga paia, e mafai ai ona maua.”⁶ E le faamalieina nei lava le sailiga mo le poto o le Atua.

O le mea mulimuli, o le puna o le poto o le Atua e ese mai le puna o le poto o le lalolagi. O le poto o le Atua e maua i tusitusiga paia, i aoaoga a perofeta (e pei o taimi o konafesi aoao), ma le, ioe, i a tatou tatalo (tagai MF&F 8:1–2). Ma o taimi uma lava, *taimi uma* o lenei poto e tuuina mai ia i tatou e ala mai i le Agaga Paia. Fai mai le Aposetolo o Paulo:

“Po o ai foi se tagata ua iloa mea a le tagata, ua na o le agaga o le tagata o loo i totonu ia te ia? E faapea foi ona le iloa e se tasi mea a le Atua, ua na o le Agaga o le Atua. . . .

“O ia mea foi matou te tautala atu ai, i upu e aoaoina mai e le Agaga Paia, a e le o upu e aoaoina ai i le poto o tagata, o loo faamatalaina mea faaleagaga i upu faaleagaga” e le o upu e aoaoina ai i le *poto o tagata*, ae aoaoina mai e le Agaga Paia” (1 Korinito 2:11, 13; faaopoopo le faamamafa).

O le i ai o le poto o le Atua, tatou te vaai atu ai i luga atu o o tatou tulaga o i ai nei, aua e pei ona fai mai le mau, “e tauala mai le Agaga . . . i mea e pei ona i ai moni lava, ma mea e pei o le a i ai moni lava” (Iakopo 4:13).

O le poto o le Atua o le poto lea e alagata ai le tuuto atu i ai o la tatou gauai.

Poto ma le Sefuluai

Atonu o le itu aupito taua o le, e lei fatufatuina le poto uma ia tutusa. E tatau ona tatou iloa, a oo ina i ai se feteenaiga i le va o le poto o le lalolagi ma le poto o le Atua, e tatau ona faamatuu atu o tatou mana'o i le poto o le Atua.

O i tatou o atalii ma afafine o le Atua. O i tatou o ni tagata faaleagaga o loo i ai i se misi-ona i la le tino. O i tatou o ē ua tuuto atu i le aoaoina o le poto o le lalolagi ma le poto o le Atua, e le tatau ona fenunia'i pe o le fea poto e sili atu ona taua.

Sei ou faamatalaina se mea na oo i ai se tamaitai o le Au Paia o Aso e Gata Ai i São Paulo, Pasila. Na ia faamatalaina lana tauiviga pe totogi lana sefuluai po o lona pili a'oga. O ana upu nei:

“O le iunivesite . . . e faasa ai tamaiti aoga sa nofo aitalafu (pe lei totogiina o latou pili) ona sue i suega.

“Ou te manatua se taimi sa ou . . . feagai ai ma faigata o mea tautupe. O se Aso Tofi, ina ua maua mai lo'u totogi. Ina ua ou tago e faavasega la'u paketi faalemasina, sa ou vaaia o le a le lava se tupe e totogi ai la'u sefuluai ma la'u aoga. Sa tatau ona ou filifili i mea e lua.

O suega e ta'ilua masina ma fai, o le a amata i le vaiaso e sosoo ai, ma afai ou te le su'e ai o lona uiga, e le aoga atoa le tausaga o le aoga. Sa ou matua mafatia lava. . . . Sa tiga lo'u loto.”

O se feteenaiga tonu lava lea i le va o le poto o le lalolagi ma le poto o le Atua. E ui lava ina e lelei tele ma amiotonu, ae o le a e oo i se taimi o lou olaga, afai e te faamaoni ia te oe lava, o le a tiga lava lou loto a o e lagonaina nisi o nei feteenaiga pe a oo mai ia te oe.

O le a ou toe foi i lana tala. Muamua, sa ia totogiina lana sefuluai i le Aso Sa. O le Aso Gafua na sosoo ai, sa ia faamatalaina le mea na tupu:

“O le a uma le taimi faigaluega, ae sau lo'u pule e aumai faatonuga mulimuli o le aso. . . . E le i umi, ae tu ma tilotilo mai ia te au ma fesili mai, ‘O a mai lau aoga?’ [Sa ia faamatalaina [lona pule] o se tagata faigata, ma na pau lana tala na mafai ona fai atu o le:] ‘O loo lelei mea uma!’”

O le poto o le Atua e maua i tusitusiga paia, i aoaoga a perofeta (e pei o le taimi o konafesi aoao), ma, ioe, i a tatou tatalo.

Ona alu lea. Na faafuasei ona ulufale atu le failautusi i le potu. Fai mai, “Faatoa uma nei ona fai mai le pule e amata atu i le aso, ona totogi atoa e le kamupani lau aoga uma ma au tusi. Ae e te lei alu, sau i lo’u ofisa e ta’u mai le totogi, ina ia oo atu taeao ua mafai ona ou avatua le siaki.”⁷

Afai e te matauina, o le a e iloaina lou fetai ai ma nei ituaiga o tofotofoga i le tele o taimi i le gasologa o lou olaga. O fea o le a e tuu i ai lou faatuatuaga? Faalogo i le lapataiga a le Alii o tuusao mai ia i tatou:

“E, le fiatagata e, ma vaivaiga, ma le valelea o tagata! Pe a aoaoina i latou [i le poto o le lalolagi] ua latou *manatu* ua popoto *i latou*, ma latou le faalogologo ai i le fautuaga a le Atua, ona ua latou tuueseina, i le manatu ua latou iloa mo i latou lava [le poto o le lalolagi], o le mea lea, o lo latou *poto* o le valea lea, ma o le a le aoga ia te i latou. Ma o le a fano i latou.

“Peitai e lelei le aoaoina [i le poto o le

lalolagi] pe afai latou te faalogologo i fautuaga a le Atua” (2 Nifae 9:28–29; faaopoopo le faamamafa).

O upu a Paulo:

“Po o ifea le tagata poto? . . . e le ua avea ea e le Atua le poto o lenei lalolagi ma valea?” (1 Korinito 1:20).

“Aua ne’i ai se tasi e faaseseina o ia e ia. Afai ua ia te outou se tasi o manatu e poto ia i lenei lalolagi, ia avea ia ma vale, ina ia poto ai o ia.

“Aua o le *poto o lenei lalolagi* o le valea lea i luma o le Atua” (1 Korinito 3:18–19; faaopoopo le faamamafa).

E masani lava o le suega pe o le a tatou faatagaina le poto o le Atua e avea ma o tatou taitaiala pe a faafeagai ma le poto o le lalolagi.

O le auega a Amona, “Ona latou te le saili le poto [le poto o le Atua], pe latou te mananao foi e pulea i latou e le poto” (Mosaea 8:20). Pe a mafaufau ia i latou o e ua naunau e pulea i latou e le poto o le Atua, ua ou

Mafaufau i le poto o le Atua e uiga i tupe faaletagata lava ia. Tatou te tuuina tupe i lana matafaioi sa’o e ala i le totogiina o se sefuluai faamaoni ma limafoai i a tatou taulaga.



mafaufau ai i sau uo mai le atunuu autu o Saina, o Xie Ying, lea sa na ia faia ni osigataulaga tetele ina ia auai ai i le Ekalesia ma faia se misiona i Niu Ioka. Ou te mafaufau i lau fanau teine e toalua, e matuai atamamai ma e tofu ma faailoga o le matuaofaiva, peitai ua la filifilia faamanuiaga faatina ma fanau. Ou te mafaufau i se uo mai Amerika i Saute lea na ia tuua lana galuega e lelei le togi ina ua ia iloaina o loo taumafai le pule e aloese mai le togiina o lafoga. Sa tuuina e i latou uma nei le poto o le Atua i luga atu o le poto o le lalolagi.

O le mea e faanoanoa ai, e mafai e le poto o le lalolagi ona faaseseina ia tagata malolosi. Na saunoa mai ai Iosefa Samita: “E toatele alii sili ma le atamamai faapea foi ma tamaitai o loo i lo tatou lotolotoi ua atamamai tele mo le toe aoaoina; o le mea lea e tatau ona oti ai i latou ma lo latou valea, ma i le toe tutu o le a latou iloa a latou mea sese.”⁸

Poto ma Mea Tautupe

Faatasi ai ma taimi faigata o lo tatou tamao-aiga, ou te fia talanoa atu e uiga i le mataupu o mea tautupe patino. O tatou tulaga o i ai nei ua sili atu lo tatou faamaualalo ma aoaoina—peitai, sei toe mafaufau i tua i nai tausaga ua mavae atu.

O loo aoao e le lalolagi faapea afai tatou te mananao i se mea, e tatau ona tatou maua-ina. E le tatau ona tatou faatali i ai. E mafai e le aitalafu ona aumaia lena mea ia i tatou i le taimi lava lena. E mafai foi ona faia i kata fai faatau faaaitalafu, atonu e mafai foi ona nono mai se tupe mai le faletupe ae faamau i lou fale. E mafai ona tatou faamauina mea o tatou maua, e oo lava i a tatou aoga. O le a agai pea i luga le tau, ma o le a faamanuiaina i tatou. O le poto o le lalolagi e faapea o le aofaiga o le tupe e togi i le aitalafu faale-masina o le a sili atu le taua nai lo le aofaiga o le nonogatupe. O le a mafai lava ona tatou faafoeina a tatou tuutuuga tautupe, ae pe a le mafai ona togiina, o le gau lava la tatou filifiliga mulimuli.

Sei o tatou mafaufau i le poto o le Atua e uiga i tupe faaletagata lava ia, o loo aoao mai pea e ala mai i perofeta. O le faavae o le ola

faalagolago lea o le tagata ia te ia lava ma le galue. Tatou te tuuina tupe i lana matafaioi sa’o e ala i le togiina o se sefuluai faamaoni ma limafoai i a tatou taulaga. Ia tatou ola i mea e itiiti ifo nai lo mea tatou te maua, ma ia tatou filifili ma le atamai i le va o mea tatou te manaomia ma mea tatou te mananao i ai. Ia tatou aloese mai aitalafu sei vagana ai o ni mea taua e sili ona manaomia. Ia tatou ola i se paketi. Ia i ai se tatou tupe o teu. Ia tatou faamaoni i a tatou tuutuuga tautupe uma.

Pe tusa o le 14 tausaga ua mavae, sa lapatai mai ai Peresitene Gordon B. Hinckley (1910–2008) faapea: “O loo ou fautuaina atu, ua oo mai le taimi e faatulagaina lelei ai o tatou aiga. Ua toatele naua o tatou tagata e faaoga uma a latou tupe maua e ola ai. O le mea moni, o nisi o loo ola i tupe nono. . . . O loo i ai se faailoga o le tau matagia o loo i luma, ma e tatau ona tatou manatunatu i ai.”⁹

I le tele o tausaga ua mavae ma i le fautu-mutumuga o loo tatou tulaga manuia, sa saunoa ai Peresitene Thomas S. Monson:

“Ou uso e ma tuafafine, aloese mai le filosofia e faapea o mea na soona fai ananafi ua avea ma mea manaomia i aso nei. E le o ni mea e manaomia sei vagana ua tatou avea ma ni mea manaomia. E toatele ua oo atu i ni aitalafu mo se taimi umi ina ua faatoa iloa e i ai suiga e tutupu mai: e mama’i tagata po o le le toe mafaia o se mea, e faaletonu pe tapuni le kamupani, le toe maua ni galuega, o le oo mai o faalavelave faalenatura ia i tatou. O le tele lava o mafuaaga, e masani lava ona le toe togiina ni aitalafu tetele. E avea a tatou aitalafu e pei o se pelu a Damocle o loo tau-tau ifo i o tatou luga ma faamata’u mai e faaumatia i tatou.

“Ou te uunaia outou ina ia outou ola i mea ua outou maua. E le mafai e se tasi ona faa-auau pea ona faaalu e sili atu nai lo mea na te maua ma tumau ai pea le sologa lelei. Ou te folafola atu ia te outou o le a sili atu lou fiafia nai lo le tulaga e te oo i ai pe afai e te popole pea lava pe o le a faapefea ona toe togi atu nisi tupe i se aitalafu e le talafeagai.”¹⁰

Pe o mafai ona e vaai i le auala e mafai ai ona feteenai le poto o le Atua ma le poto o

E tele naua e mafai ona tatou aoaoina i le taimi nei e uiga i le poto. Ou te folafola atu o le a e maua faamanuiaga a le Alii pe a e saili atu mo le poto—le poto o le Atua.



le lalolagi? Sa *le'i* matua iloagofie le filifiliga a o foliga lelei mea uma. E toatele tagata o le Ekalesia e moomoo maimau pe ana latou faalogo lelei.

O le poto lenei o le Atua.

Ou te fautuaina oe e vaai ni faafitauli o loo oulua feagai. Tusi se laina mai luga i lalo i le ogatotonu o se fasipepa. Lisi le poto o le lalolagi i le itu tauagavale ma le poto o le Atua i le itu taumatau. Tusi faafitauli e feteenai le tasi ma le isi.

O a filifiliga o e faia?

I le vaega e 45 o le Mataupu Faavae ma Feagaiga, lea o loo talanoa i mea e tutupu e tau atu i le Afio Mai Faalua o le Faaola, o loo toe faamatala mai ai foi e le Alii le tala i tau-pou e toasefulu ona ia tuu mai ai lea o upu nei ia i tatou: “Aua o i latou o e e popoto ma ua latou talia le upumoni, ma ua latou ave le Agaga Paia mo o latou taiala, ma sa lei faase-seina—e moni Ou te fai atu ia te outou, o le a le tatuuina i latou i lalo ma lafo i le afi, ae o le a latou gafatia le aso” (MF&F 45:57).

Ia tatou saili atu i le poto o le Atua. O loo tatou i ai nei i taimi faigata o le tamaoauga i le lalolagi atoa, ma ua aumaia ai ni atuga-luga a o tatou fuafua mo galuega, matata,

ma tupe maua. Ae e tele aso lelei ma le manuia o i luma. E tele naua e mafai ona tatou aoaoina i le taimi nei e uiga i le poto. Ou te folafola atu o le a e maua faamanu-iaga a le Alii pe a e saili atu mo le poto—le poto o le Atua. ■

Mai se saunoaga o se faauuga na fofogaina i le aso 10 Aperila, 2009, i le Iunivesite o Polika Iaga-Idaho. Mo le saunoaga atoa i le Igilisi, asiati ane i le <http://web.byui.edu/DevotionalsAndSpeeches>.

FAAMATALAGA

1. Tagai Andrew Lih, *The Wikipedia Revolution* (2009), xv–xvi; tagai foi http://en.wikipedia.org/wiki/Wikipedia:Size_comparisons; <http://wikimediafoundation.org/wiki/FAQ/en>; http://en.wikipedia.org/wiki/History_of_Wikipedia.
2. Tagai Ramona Emerson, “Facebook Users Expected to Pass 1 Billion in August: iCrossing,” *The Huffington Post*, Jan. 14, 2012, www.huffingtonpost.com/2012/01/13/facebook-users-1-billion-icrossing_n_1204948.html.
3. “Choruses from ‘The Rock,’” in *T. S. Eliot: The Complete Poems and Plays, 1909–1950* (1980), 96.
4. *Mark Twain Laughing: Humorous Anecdotes by and about Samuel L. Clemens*, ed. P. M. Zall (1985), xxii.
5. Tagai Marion G. Romney, “Converting Knowledge into Wisdom,” *Ensign*, Iulai 1983, 5.
6. *Aoaoga a Peresitene o le Ekalesia: Iosefa Samita* (2007), 285.
7. In Gordon B. Hinckley, “O Le Faatuatua Ua Matou Savavali Ai,” *Liahona*, Iulai 2002, 82–83.
8. *Aoaoga: Iosefa Samita*, 215.
9. Gordon B. Hinckley, “Mo Tama Talavou ma Tamā,” *Liahona*, Ian. 1999, 65.
10. Thomas S. Monson, “Faamaoni i le Faatuatua,” *Liahona*, Me 2006, 19.

Vaai ni faafitauli o loo oulua feagai. Tusi se laina mai luga i lalo i le ogatotonu o se fasipepa. Lisi le poto o le lalolagi i le itu tau-agavale ma le poto o le Atua i le itu taumatau. Tusi faafitauli e feteenai le tasi ma le isi.

AOAOGA Anoa | LE AIGA

*O auala e
fa tatou te
aoao atu ai a
tatou fanau
i lesona taua
o le olaga.*

**Saunia e
Darren E. Schmidt**

O le faaaogaina o taimi e aoao atu ai le ma fanau e toavalu, sa faigata ma sa tauia. Peitai o le iloa ai “o le aiga o le nofoaga muamua lea ma le sili e aoao ai e fanau lesona o le olaga,”¹ na ma taumafai ai ma lo’u toalua e faia mea uma ma te mafaia e fesoasoani ai i le ma fanau e aoao na lesona. O nai mataupu faavae ia sa fesoasoani ia i ma’ua.

Fai Mea Silisili

Ina ua aofia ai le ma fanau i le tele o gaoioiga, sa oo ina ua faateleina le tatau ai ona faatulaga mea e faamuamua. Na faamanatu mai e Elder Dallin H. Oaks o le Korama a Aposetolo e Toasefululua e faapea “e le faapea a *lelei* se mea, ona lava ai lea o se mafuaaga e faia ai. . . . O nisi mea e lelei tele nai lo le lelei, ma o mea na e tatau ona matuai taulai atu i ai le faamuamua i o tatou olaga.” Na ia toe saunoa mai: “E tatau ona gaoioi matua ina ia faasaoina le taimi mo tatalo faaleaiga, suesueina o tusitusiga paia e le aiga, afiafi faaleaiga, ma isi faatasiga taua ma taimi e feiloai taitoatasi ai lea e fusia faatasi ai se aiga ma fesoasoani ai i fanau e faataua mea na e faavavau le aoga. E tatau ona aoao atu e matua mea e faamuamua o le talalelei e ala i mea latou te faia faatasi ma a latou fanau.”²

Ua faamaonia le lelei o lenei fautuaga mo lo matou aiga. Ina ua ma faia ma lo’u toalua ia gaoioiga i fafo atu o le fale, o se mea e mafaufau loloto i ai ma tatalo ai, sa avea nisi o mea sa ma manatu e taua ma ni mea e le

talafeauga. Sa sili ona ou ofo ina ua ou fesili i le ma fanau pe fia i ai i se ‘au pasiketipolo ae ou faiaoga ai. O la latou tali o le, “Ailoga,” ma le “Tama, o la e i ai le tatou mama i luma, ma e matou te fia taaalo ai ma oe ma fai ai foi a tatou taaloga ma o tatou tuaoi. E tele ai le taimi matou te maua ai le polo!”

Suesue ma Faatino Tusitusiga Paia

E tele se eseesega i le va o le *faitauina* o tusitusiga paia ma le *suesueina*. Na aoao mai e le perofeta anamua o Iosua e faapea, o le faamanuiaina i le suesueina o tusitusiga paia e maua pe a tatou “mafau fau i ai i le ao atoa ma le po” ma le “anaana ina ia *faia e tusa ma mea uma ua tusia* ai” (Iosua 1:8; faaopoopo le faamamafa). I taimi o a matou suesuega o tusitusiga paia, sa sili ona faamanuiaina pe a ma tuu atu i le fanau le taimi e mafaufau loloto ai i ni fesili patino, ona tuu atu lea ia i latou o se valaaulia e “faia ai e tusa ma mea uma ua tusia ai.”

I se tasi afiafi sa ‘ai a matou sukalati i fafo ma faitau le Tusi a Mamona e uiga i le pau o sa Nifae. Sa uunaia au e fesili i le fanau pe aisea na matua amioleaga ai sa Nifae. Fai mai Celeste e ono ona tausaga, sa manatu o ia ua le toe faia tatalo a sa Nifae ma sa Lamana i aso taitasi. Sa matou ioe uma lava na amata le pau o sa Nifae i le galo ona tatalo ma isi mea laiti naua. I lenei taimi, na oo mai se manatu ia te au e valaaulia le fanau e tatalo ma le mafaufau atili ma lagona.

O le aso na sosoo ai sa ou fesili ai i ai pe na faapefea



a latou tatalo. O iina na maua ai se avanoa latou te faasoa mai ai o latou aafiaga ma ou maua ai se avanoa e saga faasoa atu ai la'u molimau i le tatalo. E le faapea na faapea le lelei o aafiaga uma o suesuega i tusitusiga paia, ae a fai a matou talanoaga ma valaaulia e faatino e avea o se vaega o la matou suesuega, e sili atu ona anoa ia tusitusiga paia.

Fesoasoani i Tamaiti ia Avea ma o Latou Tiute

Ua ma iloaina le mana tele i le tuuina atu o tofitofigi i le ma fanau ma tuu latou te mafau-fauina le faiga mo i latou lava. A ma faaaofia-ina le ma fanau e faia nisi o faaiuga faaleaiga, e sili atu la latou faatinoga. Latou te atiina ae foi se lagona o i latou e ona, ma o latou foi e tali atu, ma ua latou aoao ai e “faia mea e tele i lo latou lava loto malie, ma faataunuaina ai

I le taimi o la matou suesuega o tusitusiga paia, sa sili ona faamanu- iaina pe a tuu atu i le ma fanau le taimi e mafau-fau loloto ai i fesili, ona tuu atu lea i ai o se valaaulia e faatino ai.

le amiotonu tele” (MF&F 58:27). O nai mea nei ua fesoasoani i le ma fanau ia atili ai ona avea ma o latou tiute:

- Mo afaifi faaleaiga, fesoasoani ia i latou e saunia se lesonea, mau, po o se taleni e filifilia lava e i latou.
- Tuu atu ia i latou e filifili se viiga mo tagata uma e pepese ai i le taimi e suesue ai faaleaiga ia tusitusiga paia, ona valaaulia lea o se tamaitiiti e faia le tatalo.
- Tuu atu ia i latou e fesoasoani e fuafua ma avea ma tiute se vaega o se malaga faaleaiga.
- Fai se fonotaga faaleaiga ma i latou e uiga i mataupu tautupe ma tuu i ai latou te fesoasoani i le faiga o faaiuga e uiga i faatauga.
- Aoao i latou i le faiga o se galuega



patino, ma tuu i ai latou te vaaia lena galuega mo se vaiaso.

- Fai se galuega fesoasoani faaleaiga i masina taitasi, ma tuu latou te filifili po o ai le aiga e fesoasoani i ai.
- Feauaua'i i latou e piki se tagata e asiase i ai i se Aso Sa.
- Tuu latou te pikiina se gaioioiga faaleaiga mo se afiafi faapitoa o le masina.

Taiala i Latou

Sa i ai taimi ma te manatu ai ma lo'u toalua ma te faamalosi le ma fanau mo tatalo po o le susesueina o tusitusiga paia. Ae o isi taimi, sa ma lagonaina ai se agaga matagofie e maua mai a o ma taialaina moni ma tausia si a ma'ua lafu laiti. A ma le faaeteete, e faigofie lava ona ma le mauaina nei taimi e taialaina ai.

O se tasi o na taimi na oo mai, a o ou faataootoina la'u fanau i o latou moega o le a momoe. Sa fesili mai se tasi o o'u atalii, "Papa, o le a se mea e faasoosoina ai oe?"

Sa ou te'i i le fesili.

Ona ia fai mai lea, "Sa matou talanoa i mea e faasoosoina ai i matou, ma sa matou taumanatunatu pe o a ni mea e faasoosoina ai oe."

Sa ou iloa o se taimi lelei tele lenei e aoao ai i latou, ae sa ou matua vaivai mai se aso umi sa faigaluega ai. Sa ou lei manatu e faia se talanoaga loloto ma atalii e toalua i le tuneva o le po, aemaise o le po o le aso a'oga.

Peitai, na oo mai i lo'u mafaufau le tala i le Faaola i le vaieli. E ui lava ina sa savali i le 30 maila (48 km) pe sili atu foi, ae sa Ia faaavanoaina lava se taimi e aoao ai le fafine Samaria (tagai i le Ioane 4). Sa tonu ia te au atonu o se tasi lea o na taimi i le "vaieli", o lea sa ou nofo ifo ai i lalo ma fesili pe la te manatu o se agasala pe a tofofoina. Sa umi se taimi o leai se tala, ona amata lea ona matou talanoa ma faalogo le tasi i le isi. Sa ou aoaoina i la'ua i le fetai'iga a le Faaola ma Satani (tagai i le Mataio 4) ma tuuina atu la'u molimau i faamanuiaga e maua mai le teenaina o faasoosoga.

O se tasi o na taimi faapitoa i le avea ai o se matua. Sa fai si tuai ona matou momoe, ae o le olioli na ou oo i ai sa

sili atu ona tauaogaina ai le ositaulagina o le moe.

"O se tasi o o tatou avanoa faanatinati e tali atu ai i se tamaitiiti, o le taimi e fesili naunau mai ai, manatua latou te le fesili i *taimi uma*, e le aoao gofie i *taimi uma*, e le faalogo foi i *taimi uma*," na aoao mai e Elder Richard L. Evans (1906–71) o le Korama a Aposetolo e Toasefululua. "Ma e tele taimi

e tatau ai ona tatou tali atu ia i latou i o *latou* tulaga, i o *latou* taimi, ae le faapea o taimi uma i o *tatou* tulaga, ma o *tatou* taimi. . . . Afai latou te iloa e mafai ona latou faatuatuaina i tatou i nai a latou fesili laiti, e mafai ona latou faatuatuaina i tatou i a latou fesili e sili atu ona ogaoga i se taimi mulimuli ane."³

Filifilia ma Lagolagoina e le Alii

O le tiutetauave o le vaavaaia o le fanau a le Atua e mamafa. Soo se taimi lava ou te lagonaina ai lo'u le agavaa o se matua, ou te faamanatuina lava ia te au se mea na saunoa i ai Elder Neal A. Maxwell (1926–2004) o le Korama a Aposetolo e Toasefululua: "O le Atua lava e tasi na tuuina le fetu i se siosiomaga patino i le afe tausaga a o lei alia'e mai i Peteleema i le faamanatuga o le soifua mai o le Pepe, ua tuuina mai ai le gauai lava e tasi i le faatulagaga o i tatou taitoatasi i siosiomaga o tagata ina ia mafai ai, pe afai o le a mafai, ona tatou malamalama i o tatou olaga taitoatasi, ina ia le gata e taitaiina ai isi e lo tatou malamalama, ae faamafanafanaina ai foi i latou."⁴

E faagaetiaina lava au i lenei saunoaga, pe a ou lotovaivai. E maua ai e i ma'ua ma lo'u toalua le lototele i o ma'ua gafatia o ni matua, i le iloa ai ua tuuina le ma fanau i totonu o lo ma'ua "siosiomaga" mo se mafuaaga ma ua talitonuina i ma'ua e le Tama Faalelagi.

Ia faamanuia e Ia lo outou aiga a o outou aoaoina faatasi le talalelei, fesoasoani i lau fanau ia avea o se tiutetauave, ma faaoga na taimi taua e aoao atu ai. ■

FAAMATALAGA

1. Tavita O. MaKei, i le *Tusi Lesona o Afiāfi Faaleaiga* (1968), iii.
2. Dallin H. Oaks, "Lelei, Lelei Tele, Lelei Silisili," *Liahona*, Nov. 2007, 104, 105.
3. Richard L. Evans, "The Spoken Word," *Ensign*, Me 1971, 12.
4. Neal A. Maxwell, *That My Family Should Partake* (1974), 86.



O LE TAU A O AOAOGA

O aoaoga o se vaega taua o le talalelei ma le saunia e auai i tulaga o tagata lautele ma le tausiga o le tagata lava ia ma lona aiga.¹ Sa saunoa Elder Craig A. Cardon o le Fitugafulu e uiga i le taua o aoaoga i itulau e 54–55 o le lomiga lenei.

“I lenei lalolagi ua faateteleina le faigata, o le aoaoina o se tasi lea o ausiaga aupito taua o le olaga,” sa tusia ai. “Ma e ui ina moni e faapea o le tele o le aoaoina o le mea masani o le a taitai atu ai i avanoa mo le faateleina o tau faalelalolagi, ae o le taua sili atu o le malamalama faateleina, o le avanoa lea tatou te maua e ave ai ma faatosinaga sili atu i le ausiaina o faamoemoega a le Alii.”

O loo ta’u mai i le *Mo Le Malosi o le Autalavou*: “O lau aoga e tatau ona aofia ai aoaoga faaleagaga. Suesue i tusitusiga paia ma upu a perofeta o aso e gata ai. Ia auai i seminare ma inisitituti. Ia faaauau pea ona aoao i lou olaga ato e uiga i le fuafuaga a le Tama Faalelagi. O lenei aoaoga faaleagaga o le a fesoasoani ia te oe e maua ai tali i luitau o le olaga ma o le a valaaulia ai le mafutaga a le Agaga Paia.”²

Fautuaga mo le Aoao Atu o le Autalavou

- Faitau le vaega i le a’oga i le *Mo Le Malosi o le Autalavou*. Faasoa atu ou lava aafiaga lelei i le suesue i le aoga ma le talalelei. O lenei mea e mafai ai ona e talanoaina lenei tulaga

faatauaina faatasi ma lau tama o le autalavou ma tali soo sana fesili e ono i ai.

- Fesoasoani i lau talavou e faatulaga ni sini faalegaluega ma faaleaoaoga e faavae i ana taleni ma mea e fiafia i ai. Fesoasoani ia te ia e faailoa nisi o sitepu e amata galue ai i nei sini.
- Mafaufau e fai se afaifi faaleaiga i le taua o aoaoga (o se punaoa lelei o se tusiga mai ia Elder Dallin H. Oaks ma Kristen M. Oaks, “Aoaoina ma le Au Paia o Aso e Gata Ai,” *Liahona*, Ape. 2009, 26–31).
- Alu i le youth.lds.org ma kiliki i le “For the Strength of Youth” i lalo o le Lisi Youth. I lalo o le “Education,” o le a e maua ai mau e faatatau i aoaoga, vitio (tagai, mo se faataitaiga, “Surfing or Seminary?”), polokalama leitio o Alaleo a Mamona, fesili ma tali, ma tusiga e aofia ai saunoaga mai le Au Pulega Aoao.

Fautuaga mo le Aoao Atu o Tamaiti

E malie le aoaoina o ni mea fou, ae o le aoaoina e mafai foi ona faigata. O le lomiga o le masina lenei o loo aofia ai se tala e ta’ua “Sauni e Faitau” (itulau e 66). O le tala o loo faamatalaina ai se teineitiiti e faaletonu lona tomaiti e malamalama ai i le gagana tusitusi o le sa taumafai e faitau leo-tele ma le auala sa uunaia ai o ia e tamaiti Peraimeri e fai le mea sili na

MAU E UIGA I LE AOAONA

Faataoto 4:7

2 Nifae 9:29

Alema 37:35

Mataupu Faavae ma

Feagaiga 88:77–80

te mafaia. Mafaufau e faitau atu lenei tala i lau fanau ma talanoa faatasi e uiga i fesili nei:

- O le a se lagona o Mele a o tau-mafai e fai se mea faigata? Aisea e taua ai le aoao pea e tusa lava pe faigata?
- O a mea na fai e isi tamaiti e fesoasoani ai ia Mele? O le a se mea e mafai ona e faia e fesoasoani ai i isi e aoao i le fale, i le lotu, ma i le aoga? ■

FAAMATALAGA

1. Tagai i le *Mo Le Malosi o le Autalavou* (tamaitusi, 2011), 9.
2. *Mo Le Malosi o le Autalavou* 9–10.



Tamaitai Talavou ma le Faaiuga e Faamisiona



I le konafesi aoao o Oketopa 2012, na faasilasila mai ai e Peresitene Thomas S. Monson e faapea “o tamaitai talavou e gafatia, ma agavaa ma ua i ai le manao e faamisiona, e mafai ona fautuaina atu mo le galuega faafaifeautalai e amata i le 19 tausaga, nai lo le 21.” Sa ia faapea mai e ui o tamaitai talavou “e le o i lalo o le poloaiga e tasi e auauna atu e pei o alii talavou,” ae latou te “faia se saofaga taua o ni faifeautalai, ma e matou te talisapaia la latou auaunaga.”¹

E faapefea ona filifili se tuafafine pe auauna atu? O tala nei o loo faasoa mai ai ni auala sa taialaina ai e le Agaga ni tuafafine i le filifiliina po o le a le ala sa sa’o mo i latou.

O Le Sooga o Loo Misi

Pe a fesili mai se tasi ia te au a o ou laitiiti pe ou te alu i se misiona, ou te fai i ai e lei. Sa faamalūlūina lou loto i lena manatu a o faasolo ina ou matua, o se vaega o lea mea ona sa ou vaaia ou tei matutua o auauna atu. Ae sa ou le manatu mamafa pea lava i ai o se mea o le a ou faia.

Ina ua atoa lou 21, sa amata ona ou mafaufau pe tatau ona ou alu i se misiona, ae sa ou le tatalo faamaoni e uiga i ai. A o faagasolo pea le taimi, sa amata ona ou lagonaina se mea o loo misi. Sa ou tau atu i lou tina ou lagona, ma sa ia fautua mai ia ou toe mafaufau i se misiona. Sa ia fai mai a o pei lona matua o au, sa ia lagonaina foi lagona lava ia e tasi o loo ou lagonaina. O le auauna atu i se misiona o le tali lena mo ia, atonu foi la o le tali lea mo au.

Sa ou fefe ou te tatalo e uiga i se misiona. Se tasi

O le auala na faaoga ai e nei tamaitai talavou matutua le fautuaga faaperofeta e tusa ai ma le auaunaga faafaifeautalai faamisiona.

mafuaaga sa ou le mafaufauina ai lava se misiona muamua ona sa ou manatu e le lava sou malosi e faia ai. le a ou tuua ou tulaga mafanafana ma masalo e aoao se gagana fou. Ao le isi, ou te lei manatu sa lava lelei sou iloa o le talalelei e aoao atu. A o ou tatalo faatasi ma le faamoemoega, sa ou lagonaina le mou ese atu o lou fefe. O le tali sa ou mauaina sa matua mamana lava: e alofa le Alii ia te au, ma sa Ia finagalo ou te auauna atu i se misiona.

Sa ou maofa i le talitonuga sa ou lagonaina ina ua ou mauaina la’u tali. Sa ou le toe lagonaina se popole po o le le agavaa. Ae sa ou fiafia e faasoa atu le talalelei, ma sa amata loa ona ou galue i au pepa o le misiona. Sa mulimuli ane valaauina au i le Misiona a le Lotoa o le Malumalu i le Aai o Sate Leki Iuta.

Rebecca Keller Monson

O Se Olaga Faafaifeautalai

Ina ua 17 ou tausaga, sa amata ona tuufesili mai tagata ia te au pe o le a ou auauna atu i se misiona. Ou te lei filifili lava i ai, o lea sa ou aloese ai lava mai le tali sao atu ia i latou.

Ae a o latalata mai lo’u aso fanau lona 21, sa amata ona ou mafaufau i ai. Sa ou faitau lou faamanuiga faapeteri-aka, talanoa i ou matua, ma tatalo.

Sa oo mai le manao; sa ou le lagonaina lava na manao-mia ona ou auauna atu. Sa ou mafaufau i le fautuaga a Peresitene Gordon B. Hinckley (1910–2008), lea na saunoa mai e ui e taliaina faifeautalai tamaitai, ae “e le o



O LE AGAGA O FAAALIGA

“Pe a faia e se filifiliga se eseesege moni i o tatou olaga . . . ma pe afai o loo tatou ola e tusa ma le Agaga ma saili atu i lana taitaiga, e mafai ona tatou mautinoa o le a tatou maua le taitaiga tatou te manaomia e ausia ai la tatou sini. O le a le tuua lava i tatou e le Alii e le lagolagoina.”

Elder Dallin H. Oaks o le Korama a Aposetolo e Toasefululua, “Revelation,” i le *Brigham Young University 1981–82 Fireside and Devotional Speeches* (1982), 26.

faamalosia i latou e o i ni misiona.”² Sa faamanatu mai foi ia te au le fetalaiga a le Alii i le Mataupu Faavae ma Feagaiga: “Afai ua ia te outou le manao e auauna atu i le Atua, ua valaaulia outou i le galuega” (4:3).

Sa fesoasoani lena mau ia te au e filifili ai e aua nei auauna atu i se misiona. Ina ua ou tau atu i le Alii i le tatalo e uiga i lau faaiuga, sa ou lagonaina le filemu ma se faamautinoaga o loo i ai foi nisi ala e mafai ona avea ai au ma se faifeautalai e aunoa ma se auaunaga faamisiona. Talu mai lena taimi ua ou iloa ai lava e mafai ona ou faasoa atu lau molimau i le tele o ala—e auala i se talanoga e uiga i le alofa mutimutivale agamalu o le Alii, i taimi e fai ai asiasiga faalefaiaoga asi, po o le faia o galuega o talafaasolopito o aiga ma malumalu. Ua ou tuuto atu au lava ia i le galuega faaifeautalai e ala i le taumafai e ola i le talalelei ma mulimuli i musumusuga a le Agaga.

Amy Simon

Ia Lototele

I le amataga o le 2010, sa ou tauivi ma nisi o tofotofoga ma sa ou savalivali ai e faasoloto lou mafaufau. A o ou savalivali, sa ou lagonaina le musumusua mai o le Agaga e le tatau ona ou popole i le tuanai; ae, e tatau ona ou mafaufau i lou lumanai. A o amata ona ou iloiloina lau sini o le faamaeaina o le aoga, sa uunaia au e mafaufau e uiga i le auauna atu i se misiona. Ou te lei mafaufau muamua lava i se misiona, ae a o taa’ina atu i le manatu, sa faapena foi se fiafiaga ma se manao e auauna atu. Peitai, sa ou filifili ou te fia manao i sina taimi e mafaufau ai i se faaiuga tele faapea.

O isi masina na sosoo ai sa faatumulia i uunaiga e auauna atu i se misiona. A o ou lagonaina pea lena lava manao ma le fiafia i taimi sa oo mai ai uunaiga, sa faapena foi ona oo mai ai ma masalosaloga ma le fefe. Sa ou iloina e uunaia tamaitai e auauna atu pe afai latou te manano i ai ae e le faamalosia e fai. I le taimi lea, sa ou maua ai ni faamanu-iaga faaleperisitua na tau mai ai ia te au o le a fiafia le Alii e tusa lava po o le a le mea ou te filifilia.



I le taumafanafana na sosoo ai sa ma potu faatasi ai ma se uo ua maea lana misiona. Sa ia fai mai sa ia lagonaina foi le fefe a o lei faia lana faaiuga e oo foi ina ua ia filifili e faamisiona. Sa ia fesoasoani mai ia te au e malamalama e le fetalai mai le Agaga e ala i le masalosalo ma le fefe (tagai 2 Timoteo 1:7). A o ma talanoa, na pai mai le Agaga ia te au. Sa ou toe foi atu i lou potu ma faitau se tusi mai se uo sa auauna atu i se misiona. Sa uunaia au e le tusi e faitau le Iosua 1:9, ma sa ou lagonaina le uunaiga a le Agaga ia te au e toe sue i ai.

Na tuiia e upu lou agaga: “Ia e faamalosi ma lototele; aua e te fefe, aua e te matau: aua o Ieova lou Atua o loo ia te oe i mea uma e te alu i ai.” Sa ou lagonaina e pei o loo fetalai tuusao mai le Alii ia te au. Sa ou iloina e mafai ona ou auauna atu i se misiona. Sa le manaomia ona ou fefe—Na tuiia e upu lou agaga: “Ia e faamalosi ma lototele; aua e te fefe, aua e te matau: aua o Ieova lou Atua o loo ia te oe i mea uma e te alu i ai.” Sa ou lagonaina e pei o loo fetalai tuusao mai le Alii ia te au. Sa ou iloina e mafai ona ou auauna atu i se misiona. Sa le manaomia ona ou fefe.

E tasi le masina mulimuli ane sa maua ai lou valaauga i le Misiona a Filipaina Iloilo, lea na avea ai le Iosua 1:9 ma autu a le misiona. Kristen Nicole Danner

O Se Misiona Ese

Sa ou fuafua i lou olaga atoa e auauna atu faamisiona. Ae ina ua ou alu i le Iunivesite o Polika Iaga (Iuta, ISA), sa amata ona ou popole. E mafai faapefea ona ou iloa pe tatau

moni ona ou auauna atu i se misiona? Sa alu le tausaga a o lumanai lou aso fanau lona 21 i le aioi atu i le Tama Faalelagi e tau mai ia te au pe tataua ona ou auauna atu. Ona saunoa lea o se tasi o au polofesa o mataupu faalelotu i se mea na suia ai lou olaga: “E le mafai ona taialaina e le Alii lou olaga pe afai e leai sau galuega o faia.” Sa ou filifili e galue.

Sa auina atu ou pepa, maua lou valaauga, faatau lava-lava faifeautalai, ma tietie atu i le fale mai luta i Carolina Matu—o nei mea uma ona o le saunia mo lau misiona faatasi ma le tatalo faatauana, suesue, ma le anapogi.

Ina ua ou foi atu i le fale i Carolina Matu, sa lele atu se alii talavou sa ma feiloai i le aoga e asi au, ma sa ma talanoa moni e uiga i le ma mafutaga.

Sa toe oo foi ina matuai tatalo atu ma le faatauana ma le augani, ae sa faaauau pea ona ou lagonaina le faatua-tuaina o au e le Alii e faia au lava faaiuga. Sa ou lagonaina le mamafa o le tiutetauave ae faapena foi le faamautinoaga matagofie lea pe afai ou te filifili i le faatua-tua, o le a lagonaina lava e le Alii lau faaiuga.

Toe sefulu aso ou tuua loa [mo le misiona], ae talosaga mai lau uo e fia faaiipoipo ia te au. Sa toe tolopo lau misiona ia ou maua ai se taimi e mafaufau ai. Ina ua ou filifili e faamau ia te ia, sa faamautu mai e le Agaga ia i maua ma la’u manamea o le mea sao lea.

E ui ou te lei auauna atu faamisiona, ae o le saunia mo se misiona na suia ai lou olaga. O le faalatalata atu i le Alii na fesoasoani ia te au e avea ma tagata na finagalo o Ia e avea ai au mo lau misiona o se ava ma se tina.

Cassie Randall

O Aafiaga o se Olaga Atoa

Sa faamanuiaina au i se molimau malosi ma le alofa mo le talalelei a o talavou, ae ou te le manatua se taimi se tasi na manino mai ai lou iloina o le auauna atu i se misiona sa sao. Sa ou iloa lava i taimi uma o le a ou alu. Sa ou vave faatu se sini e ola i se ala o le a ou agavaa ai e auauna atu i se misiona.

Ina ua ou amata ona saunia lau talosaga mo se misiona, sa ou anapogi, tatalo, ma auai i le malumalu. A o ma galulue ai ma lou epikopo, sa faaauau ona ou lagonaina le filemu lea na ou lagonaina i lou olaga atoa e uiga i le auauna atu i se misiona.

Sa faigata le faagasologa i nisi taimi: sa foliga mai na faafuasei lava ona taugata tele le olaga, ma faasolo ina faigata tele le aoga ma le galuega. Sa ou alu i se kolisi na mamao ese mai lou aiga, ma sa foliga mai e pei o le a faaiipoipo uma au uo. Sa taufaamatau le iloina o tagata sa ou popole i ai o loo faaauau pea ona suia a o ou alu ese ai.



Ona sa ou lei mauaina se mea faaleagaga se tasi na tupu e faamautu ai lau faaiuga e auauna atu, o lea sa faigofie ai ona masalosalo pe a oo i ni mea faigata. Ae na faamanuiaina au e le Alii ina ua maua lou valaauga i le Misiona a Chile Santiago East e atiae se alofa mo tagata i lau misiona, e oo lava i le taimi ou te lei tuua ai. Ua i ai nei sou olaga o aafiaga na maua ai se faamaoniga o se misiona o se filifiliga lelei lea mo au. ■

Madeleine Bailey

FAAMATALAGA

1. Peresitene Thomas S. Monson, “Susu Mai Ia ma Maliu Mai i le Konafesi,” *Liahona*, Nov. 2012, 4–5.
2. Gordon B. Hinckley, “I Epikopo o le Ekalesia,” *Fonotaga Faaleaoaoga a Taitai i le Lalolagi Atoa*, iUNI 2004, 27.

TALIINA O FESILI

Pe manaomia uma e le Au Paia o Aso e Gata Ai ona auauna atu i se misiona? Leai, o auaunaga faafaifeautalai uma e ofo fua atu. Ua faamoemoeina alii talavou e auauna atu, e taliaina foi tamaitai talavou, ua uunaia foi ulugalii matutua ma faaiipoipo e auauna atu pe afai o malolosi. E mafai ona amata le auaunaga a alii talavou i le 18 tausaga ma auauna atu mo le lua tausaga. E mafai ona amata tamaitai talavou i le 19 tausaga ma auauna atu mo le 18 masina. O ulugalii matutua ua litaea ma faaiipoipo e mafai ona auauna atu i le tele o tofiga eseese mai le 6 i le 23 masina.

Ua mafaufau i ai tagata o le Ekalesia o se avanoa e faaalai ai lo latou alolofa mo tagata ma le Alii e ala i le mulimuli i Lana poloaiga: “O lenei, ia outou o atu e fai nuu uma lava ma soo” (Mataio 28:19).

Mo nisi faamatalaga, tagai mormon.org/faq ma kiliki i le autu e uiga i faifeautalai.

Mo nisi faamatalaga
e uiga i avanoa
mo misiona a tagata
matutua, asiasi i lou
taitai perisitua ma
alu i le [lds.org/service/
missionary-service](https://www.lds.org/service/missionary-service).

O Le A Le Misiona



Aupito Sili Ona Lelei?

Po o a lava ou tulaga o i ai, o avanoa mo faifeautalai matutua o loo maua mo oe.

	Faifeautalai faamisiona	Misiona o auauunaga faale-Ekalesia	Volentia mo se taimi umi
O ai e mafai ona auauna atu?	Ulugalii matutua, tuafafine matutua	Ulugalii matutua, uso matutua, tuafafine matutua	Soo se tasi
E tatau ona avea ma se tagata agavaa o le malumalu?	loe	loe	Leai
Tautinoga o taimi	Sili atu ma le 32 itula i le vaiaso	Mai le va o le 8 ma le 32 itula i le vaiaso	Itiiti ifo ma le 8 itula i le vaiaso
O le umi o le tautinoga	6–23 masina	6–24 masina (e mafai ona umi atu ona auauna i le faamaoniga a le peresitene o le siteki)	Soo se umi lava
Tulaga o le galuega	Ua litaea	Mafai ona litaea po o le faigaluega pea	Mafai ona litaea po o le faigaluega pea
Nofoaga	Ese mai le fale	Latalata i le fale po o le [nofo] i le fale	I le fale
Tupe	E tatau ona mafai ona gafataulimaina le misiona ua valaau i ai. E tatau ona totogi le fale (e oo atu i le \$1,400 tupe Amerika i le masina mo ulugalii), inisiua faafomai ma fomai nifo, femalagaiga i le taimi e i ai i le misiona, ma tupe faaalu patino	E tatau ona mafai ona gafataulimaina le misiona ua valaau i ai. E tatau ona totogi le fale, inisiua faafomai ma fomai nifo, femalagaiga, tupe faaalu patino	E tatau ona saunia mo tupe faaalu a le tagata lava ia

FAASOAINA ATU O LO’U MALAMALAMA

Sa o se aso ese lea i Kalefonia i Saute, ISA, i faititili, feemo o uila, mamafa o timuga ma le ogaoga o le vevela. Sa ou tulimatai atu i se malologa ma le matamataina o se ata tifaga i totonu o lo’u fale ea-malulu. Ae o le taimi lava o le a ou saofai ane ai, ae ou lagonaina e tatau ona ou telefoni atu i la’u uo o Sherrill.

Ina ua ou valaau atu, sa ou iloaina

ai sa le’i ola lana paoa talu mai lena taeao. Sa popole o ia ina nei vaivai ana meaai faafulisa ma ne’i leaga ana susu, o lea sa ma lauina mai ai ana meaai i la’u pusaaisa.

O le afiafi na sosoo ai sa ma tutu ai ma Sherrill i luma o lona fale. O fale uma lava sa i le latou ituauala sa matuai pogisa uma, ae o fale sa i le isi ituala sa ola lava. O se tasi o fale sa faapitoa ona ou tosina atu i ai. E faafeagai sa’o lava mai le isi ituala, sa susulu le fale i le malamalama a o saofafai tagata i le pito i luma o le fale e talanoa ma talie ma fiafia ai lava.

I aso na sosoo ane ai, sa le mafai

ona aveese mai lena vaaiga mai lo’u mafaufau. Sa maoae le eseese: o le matuai pouliuli o le isi itu o le auala ae susulu moli o le isi itu; o tagata sa saofafai i le pogisa ae o o latou tuaoi sa fiafia i le malamalama.

O le vaaiga sa ou manatunatu ai le tele o taimi e avea ai au e pei o tagata o loo i le isi itu o le auala—fiafia i le malamalama o le talalelei ae o isi o loo nonofo i le pogisa. Sa ou vaai faa-lemafaufau ia te a’u lava o o’u saofai i le pito i luma o le fale ma ni nai uo mai le lotu, o fiafia i le malamalama o le talalelei ae le faasoaina atu i isi.

E fananau mai tagata uma i le

A o o’u tu i le pogisa, sa ou mafaufau i le tele o taimi sa ou faapei ai o tagata sa i le isi ituala—fiafia i le malamalama o le talalelei ae o loo saofafai o’u tuaoi i le pogisa.



lalolagi ma se malamalama—o le Malamalama o Keriso. I le avea ai ma tagata o le Ekalesia, ua tatou maua le avanoa o le faaopoopo atu i lona malamalama e ala i le faasoa atu o le talalelei. Na aoao mai le Faaola:

“Faauta, pe tutu ea e se tagata se lamepa ma tuu i lalo o se pusa fua saito? E leai, ae latou te tuuina i luga o se tuugalamepa, ma o le a susulu atu ai lona malamalama ia i latou

uma o e o i totonu o le fale;

O lea ia faasusulu atu ai lo outou malamalama i luma o lenei nuu,

ina ia latou vaai ai ia outou galuega lelei ma viia lo outou Tama o i le lagi” (3 Nifae 12:15 16).

I le avea ai ma ni tagata o le Ekalesia, ua ia i tatou le tiutetauave e faasusulu atu a tatou molimau ia Keriso ina ia iloa e tagata uma—aemaise o i latou o loo i le pouliuli faaleagaga. Ina ua uma lenei aafiaga, sa ou nau nau loa ia avea au ma ituaiga tagata e mafai e le Tama Faalelagi ona faatuatua e aluese mai le lagolelei o le faapaologa o lo’u fale ae ave atu le malamalama o le talalelei i o’u tuaoi o e o loo i le pogisa. ■

Dolores Sobieski, Kalefonia, ISA

O LA’U TATALO MUAMUA E UIGA I LE ULUAI FAAALIGA

I na ua ou filifili e papatiso, sa mafua lona sa foia nisi o o’u faaifitauli a o fai a’u lesona. Sa le mafua ona sa ou tatalo ma maua se molimau e moni le Tusi a Mamona pe sa vaai Iosefa Samita i le Tama ma Lona Alo o Iesu Keriso. Sa valaaulia au e faifeautalai ou te tatalo e uiga i nei mea, ae ou te le’i faia lava. Sa na ona ou talitonu lava i mea sa aoao ai a’u e faifeautalai.

O le tolu o tausaga talu ona uma lo’u papatisoga, sa tu ai se tamaitai i le pulelaa o le falesa ma faasoa mai lana molimau e uiga i le Tusi a Mamona ma Iosefa Samita. Sa fai mai o ia i tagata uma e mafaufau loloto i le fesili lenei: “Pe ua tatou tatalo moni ea e uiga i le moni o le Tusi a Mamona ma e uiga i le mea na tupu

ia Iosefa Samita?” Sa matuai taia au i lenei fesili, ma ou mafaufau ifo ai ia te a’u lava, “Ou te le’i tatalo lava e uiga i nei mea, ae e tatau ma o le a ou faia.”

Sa faaosofia au e faatino ona o lo’u faatuatua i lona taimi sa vaivai ma sa papa’u foi la’u molimau e uiga i tusitusiga paia. O lona po sa ou tatalo ai i lo’u Tama e uiga ia Iosefa Samita ma le moni o le Tusi a Mamona.

Ou te le’i lagonaina se mea i le taimi muamua sa ou tatalo ai, po o le taimi lona lua. Ina ia ou le lotovaivai, sa ou susueina ai tusitusiga paia i le Iosefa Samita—Talafaasolopito 1:14–17, lea o loo faamatala mai ai le ala na alu atu ai Iosefa i le vao e fai sana tatalo patino:

“Na ou vaaia ai se malamalama faaniutu i luga a’e tonu lava o lo’u ulu, ua sili atu le pupula i le la, ua alu ifo malie lava seia oo mai i o’u luga.

“Sa le’i pine lava ona oo mai ae ou faalogoina ua laveaiina a’u. . . . Ina ua oo mai le malamalama i o’u luga, sa ou vaaia ni Tagata e toalua.”

A o ou faitau i upu, sa amata ona ou gatete e pei ua sao se galu o le eletise i totonu o lo’u tino atoa. O le taimi lava lona sa ou iloina ai sa vaai moni Iosefa Samita i le Tama Faalelagi ma Lona Alo Pele o Iesu Keriso. Ua ou iloina ua tatou maua le Tusi a Mamona ona sa faaliliuina e le Atua e ala i Lana perofeta.

Ou te faafetai ona sa tuuina mai e le Tama Faalelagi lenei molimau ia te a’u i le moni o le Uluai Faaaliga. Ua ou iloina ana faapea e le toefuataiina mai le talalelei, semanu ou te le iloa lo’u Togiola. Ua ou iloa e moni le atoatoaga o le talalelei, ma ua ou iloa o le a ou maua folafolaga a le Atua pe afai ou te tumau e oo i le iuga. ■

Jing-juan Chen, Taiuani

E MAFAI ONA FAI SO’U FAAMANUIAGA?

Oni tausaga se tele ua mavae sa ma o atu ai ma se uso sa fai a’u ma ona faiaoga o aiga, o Uso Schaaf, i le falemai e fai se faamanuiaga faaleperisitua o lona toalua a o le’i faia lona taotoga. Sa potu faatasi ia Tuafafine Schaaf ma se tamaitai e igoa ia Annie Leddar, o se gasegase ua leva ona ma’i i le kanesa ua ui o lē sa leai se faamoemoe e umi se taimi e soifua ai.

Sa ou aapa atu e toso le pupuni e vavae ai le va o moega e lua o le falemai a o lei amataina le faamanuiaga, peitai sa ou toe taofia. O lo’u le manao e vavaeese ia Annie, o lea sa ou faamalamalama atu i ai le mea sa

ma fuafua e fai ma fesili atu i ai pe manao e molimauina le faamanuiaga. Sa fai mai o ia e fia matamata mai. O lana tane o le ua maliu, sa avea ma se faifeau o se isi ekalesia, ma sa ia fiafua o tatou talitonuga. Sa ma faaauau loa ma Uso Schaaf i le faiga o le faamanuiaga a o faalogologo mai Annie.

O ni nai aso mulimuli ane, a o le’i foi mai Tuafafine Schaaf i le fale mai le falemai, sa talosaga ane Annie pe mafai ona maua foi sona faamanuiaga faaleperisitua. Sa ma foi atu ma le fiafia ma Uso Schaaf i le falemai e tuuina atu lona faamanuiaga. Sa le’i te’a le kanesa o Annie, ae sa tele se suiga

manuia o lona soifua maloloina.

Sa manao o ia e aoao atili e uiga i le talalelei, o lea sa ou talosagaina ai faifeautalai e afe ane i le falemai e aoao o ia. Sa faalogo o ia i le savali o le talalelei ma se loto matala ma filifili ai e papatiso. O vaiaso uma talu ona uma lona papatisoga ma te o mai ai i le falemai e ave Annie i le lotu i lona nofoafaataavalevale.

Ona sa gasegase Annie, o lea sa faigata ai ia te ia ona feosofai, ae sa le’i umi ae ona maua lona lava auala e auauna ai i le Alii. Sa matou aveina atu ia te ia se masini lomitusi, ma sa ia faaaluina le tele o itula i aso uma i le falemai i le faiga o galuega o tala-faasolopito o aiga. Sa soifua Annie i isi tausaga e tolu mulimuli ane nai lo le mea sa faamoemoeina ma saunia le faitau selau o igoa o aiga mo le malumu a o le’i maliu o ia.

Ina ua maliu Annie, sa fai e Tuafafine Schaaf ia galuega sui i le malumu mo le toatele o tuua tamaitai o Annie.

O le mea ua ou iloa, o Annie na o le pau lea o le tagata o lona aiga na auai i le Ekalesia. Sa le’i naunau lava lona aiga o loo ola i lona aafia ai i le Ekalesia, ae ou te mautinoa o le toatele o ona aiga ua maliliu sa fiafia mo le galuega sui sa faia mo i latou.

Tatou te le iloa lava pe ua sauni tagata tatou te feiloai i ai e maua le talalelei. Ou te faafetai ona sa mafai ona ou iloa se fatu—sa totoina i le loto o Annie ina ua mavae lona molimauina o se faamanuiaga faaleperisitua—ua fuga ma faamanuiaina ai le faitau selau o fanau a le Tama Faalelagi. ■

Art Crater, Niu Ioka, ISA

Sa ou aapa atu e toso le pupuni e vavae ai le va o moega e lua o le falemai a o lei amataina le faamanuiaga, peitai sa ou toe taofia, sa ou le manao e vavaeese ia Annie.



MOOMOOGA O LO'U ASO FANAU


Na ua ou taliaina le talalelei i le 18 o'o'u tausaga, sa ou iloina ua ou tofo i le fua ua sili ona suamalie o fua uma. Sa ou lagonaina le olioli tele, ae sa ou mafaufau i tagata o lo'u aiga, o e sa leiloloa ma se ese. Sa ou lagonaina le faanoanoa tele e na o au le tagata o lo'u aiga e auai i le Ekalesia, ae sa ou le iloa pe faapefea ona ou tatalaina o latou mata ma taliga i le upumoni.

Sa tele ni auala sa ou taumafaia e tauanau ai lo'u aiga ia faalogo i faifeautalai. Ae o le tele o lo'u taumafai, o le tele foi lena o lo latou mumusu.

Sa oo ina ou lotovaivai, o lea sa ou mafaufau ai o le a ou le toe alu i le lotu. Ae sa ou tatalo, sa oo mai i lo'u mafaufau se mau: "Ma a mavae lea ae [e] faafitia a'u, sa sili ona lelei ia te outou pe a na outou le iloina a'u" (2 Nifae 31:14). Sa atili ai ona ou tatalo malosi, faitau i tusitusiga paia, auai i a'u sauniga a le Ekalesia, ma taulai atu i faamanuiaga i lo'u olaga. O le tau-nuuga, sa amata ona mou ese le tiga.

A o latalata mai lo'u aso fanau, sa ou lagonaina le musuia o a'u e fai se pati o lo'u aso fanau i lo'u fale ma valaaulia ai a'u uo uma o le Ekalesia, e aofia ai ma faifeautalai faamisiona. Sa ou manao ia maua e lo'u aiga se fegalegaleaiga vavalalata ma tagata o le Ekalesia, o e sa foliga mai ia te a'u o tagata aupito sili ia ona fiafia i le lalolagi. Ia te a'u, o le pati sa pei uma lava o se afiafi faaleaiga.

Ina ua uma lena aso, sa suia mea [i totonu o lo'u aiga]. Sa talia faifeautalai i totonu o lo matou fale ma avea



A o latalata mai lo'u aso fanau, sa ou lagona le musuia o a'u e fai se pati o lo'u aso fanau i lo'u fale ma ia valaaulia uma ai a'u uo o le Ekalesia, e aofia ai ma faifeautalai faamisiona.

ma ni uo lelei a lo'u aiga. I se tasi aso sa faasilasila mai ai e lo'u tama, ua manao e ta'u mai i lo matou aiga ia faalogo i faifeautalai ma ia o i le lotu. Sa faateia a'u.

O le tolu o tausaga talu ona uma lo'u papatisoga na papatisoina uma ai lo'u aiga. I le sauniga o le papatisoga, sa tuuina atu ai le molimau a lo'u tina, ma sa faafetai atu lo'u tama i faifeautalai. Sa maofa tagata o le uarota i lo latou liua.

Na faapefea ona tupu lena mea?

O o'u loimata uma sa maligi ma sini sa ou faatutuina sa faia ai se latou vaega. Ae o le mea sili lava, sa faamaluluina le loto o lo'u tama ona o le alofa ma le faauo o faifeautalai ma tagata o le uarota. Sa avea le au paia atoa ma ni faifeautalai ona o a latou faataitaiga o le ola i le talalelei a Iesu Keriso. Ou te faafetai mo i latou ma mo le fuafuaga a le Tama Faalelagi, lea e mafai ai ona faatasia aiga e faavavau. ■

Angelica Carbonell Digal, Filipaina



Saunia e Elder
Michael T.
Ringwood
O Le Fitugafulu

Faatuatua, Faamoemoe, ma Mafutaga

*O le manao, talitonu, ma le faamoemoe e tatau ona faa-
osofia i tatou e atiina ae ni mafutaga lea e taitai atu ai i faaipoipoga.*

Sa e faia mo'i lava se lisi o mea e aoga ma mea e le aoga?" O le fesili sa fai mai e lo'u atalii i se leo e te'i, sa faatatau i se lisi sa ia mauaina i totonu o se tasi o a'u api o talaaga. Sa le na o soo se lisi o mea e aoga ma mea e le aoga; o se lisi na ou faia i le 30 tausaga ua mavae, ae ou te le'i fai i lona tina ma te faaipoipo. Ou te le iloa pe toafia ni alii e faia se lisi e pei o la'u lisi, ae ina ua ou mafaufau loloto i le manatu e uiga i le faaipoipoga a o avea au ma se alii e 24 tausaga le matua sa aoga i le kolisi, sa foliga mai o le mea tonu lea e fai.

Ou te le manatua nisi lava fesili a lo'u atalii i lena aso e uiga i le ma feoaiga tumau; sa matuai taulai atu lava o ia i le lisi. O loo mafai lava ona ou vaai faalemafaufau ia te ia, o valaau atu i nai ona tei, "Sa fai e Tama se lisi e uiga ia Tina! O mai e vaai i ai!" Ae peitai, a o ou toe tepa i tua, e mafai ona ou manatua le tele o fesili e mafai ona ia fesiligia.

E te le'i alofa ia te ia? O lana fesili muamua lenei e tatau ona i ai. O la'u tali i ai o le ioe; o le mea lena sa ou faia ai le lisi. Sa matuai ou alofa lava ia te ia, ma sa ou *manao* e sili atu nai

lo se isi lava mea ina ia fiafia o ia. O le lisi sa sili atu ona faatatau i le pe mafai ona ou faafiafiaina o ia nai lo le pe sa ou alofa ia te ia pe leai.

E te lua le'i maua faatasi ni taimi fiafia? Ma, o la'u tali foi i ai o le ioe; o le mafuaaga lena sa ou faia ai le lisi. O se auala e iloa ai pe mafai ona tupu lo'u *faamoemoega* ia ona maua i taimi uma se taimi fiafia pe a ma faatasi.

Pe e te le'i manatu o ia tonu lea? Atonu o le fesili aupito malie lea o fesili uma. Semanu ou te tali atu ioe; sa ou *talitonu* o ia "tonu lava lea," ae sa ou manao ia mautinoa o lo'u talitonusa o le a musuia ai le faatinoga o la'u vaega ina ia tutupu ia mea e pei ona sa tatau ona i ai.

E masalo ou te le'i iloaina lelei i lena taimi le mea na faia e aafiaga o aoaoga a lo'u peresitene o le misiona e uiga i le faatuatua ma ona vaega o le manao, talitonu, ma le faamoemoe i la'u aumoega tumau. Faatasi ai ma se vaaiga manino atu i le aluga o taimi, ou te matuai faafetai ai lava ia Peresitene F. Ray Hawkins mo lana faatosinaga ia te a'u. O loo ia te a'u lava ia faamatalaga sa ou tusia a o



avea au ma se faifeautalai e 20 tausaga ina ua tatala e lo'u peresitene talavou o le misiona ia tusitusiga paia ma faamatala mai elemene o le faatuatua lea o le a i ai se aafiaga ia te a'u a o ou faia le filifiliga aupito sili ona taua o lo'u olaga.

Aoaoga a Alema e uiga i le Faatuatua

O mea sa faasoa mai e Peresitene Hawkins e uiga i le faatuatua o aoaoga a Alema i tagata matitiva o sa Sorama. Sa faailoa e Alema le manaomia ona i ai o se faatuatua itiiti, lea sa ia faamatalaina o le *manao* (tagai i le Alema 32:27). O se manao mo mea ia tupu o se faatosinaga malosi lea mo i tatou e faatino ai laasaga talafeagai e faateleina ai lo tatou faatuatua.

O se vaega lona lua o le faatuatua o le mea sa aoaoina atu e Alema lea e sau mai le manao: *talitonu*. Sa ia aoaoina sa Sorama ina ia faataga le manao e galue ia i latou seia oo ina latou talitonu i se faiga lea e mafai ona latou faaavanoa o latou loto mo ana upu (tagai i le fuaiupu e 27). O le tuufaatasiga o le manao ma le talitonu e amata ona tupu i totonu o o tatou loto, ma tatou te iloa o se mea lelei. E amata ona faateleina ai o tatou agaga ma faamalamalamaina ai o tatou malamalamaaga. E amata ona avea ma mea suamalie. (Tagai i le fuaiupu e 28.)

O le *faamoemoe* o le tasi vaega taua lea o le faatuatua. Sa ta'u atu e Alema ia sa Sorama lotomauualalo e faapea, o le faatuatua e le o se malamalama atoatoa lea o mea. Sa o se "*faamoemoe* mo mea e le vaaia a e moni" (Alema 32:21; faaopoopo le faamamafa). Na faapena foi ona aoaoina e Mamona le faamoemoe o


se vaega manaomia o le faatuatua ina ua fai atu ia Moronae, "E mafai faapefea ona outou maua o le faatuatua, vagana ai ua ia te outou le faamoemoe?" (Moronae 7:40). O le faamoemoe e mafai ona faamatalaina o le mafai ona vaai atu i se mea e lelei atu i le lumanai.¹ O la'u lisi o la'u auala lea o le vaai atu i le lumanai ma se mata o le faatuatua ma, e pei o Aperamo, sa filifili sa "i ai se fiafia tele atu ma se filemu" (Aperaamo 1:2) mo a'u i lo'u faaipoipo atu i lo'u toalua.

O le i ai o le vaega o le *manao* o le faatuatua, sa ou manaomia ai le *talitonu* ma le *faamoemoe* e faaatoa ai lo'u faatuatua, sa manaomia lo'u faia o se faatinoga e ala i le talosaga atu ia Rosalie ma te faaipoipo. O le lisi—o la'u faaaliga o le manao, talitonu, ma le faamoemoe—sa taua i le tuuina mai ia te a'u o le lototele e fai ai le faatinoga talafeagai e faaatoa ai lo'u faatuatua. Na aoao mai Iakopo e mate le faatuatua pe a leai se galuega (tagai i le Iakopo 2:17). E leai se tele o le manao, talitonu po o le faamoemoe e ono fesoasoani ia te a'u i le mauaina o le fiafia ma le filemu sili atu ua ou mauaina i le faaipoipoina pe ana le taitaiina atu a'u e na vaega e fai atu le fesili tele. (O le mea e faanoanoa ai, o le taimi muamua sa ou fai i ai ma te faaipoipo, sa tali mai Rosalie e leai, ae o le isi lena tala mo se isi taimi. I tulaga faapena—pe a le ogatasi ia tulaga e tusa ai ma a tatou fuafuaga po o le taimi—e i ai lava se vaega taua e fai a le faatuatua i o tatou olaga.) Sa manaomia ai sina faapalepale ma le onosai mo i ma'ua uma, ma sa iu lava ina ma faaipoipo mulimuli ane i se aso kiona ia Tesema o le 1982.

E taua le faatuatua i mea uma tatou te faia, e aofia ai tafaoga faamasani



ma aumoega. O le manao, talitonu, ma le faamoemoe e faapea o loo i ai se fiafiaga ma se filemu sili atu o loo faatalitali mai mo i tatou, e tatau ona faaosofia ai i tatou e faagaioi e atiina ae ni mafutaga lea e oo atu ai i faaipoipoga. E te *manao* e mulimuli i le fuafuaga o le fiafia? E te *talitonu* o le mulimuli i le fuafuaga o le a oo atu ai i le fiafia ma le filemu sili atu? (Talitonu mai pe a ou fai atu ia te oe o le mulimuli i le fuafuaga ma le faaipoipo i le malumalu e oo moni atu ai i le fiafia ma le filemu sili atu.) O e faamoemoe mo se faaipoipoga fiafia? Pe o faatagaina e lou faamoemoe oe e te vaai atu ia te oe lava i se tulaga lelei atu i le lumanai? Afai o au tali i nei fesili o le ioe, ona tataua lea ona e faaatoatoaina lou faatuatua e ala i le fai o le faatinoga. Fai atu i se tagata lua te o e eva faamasani! Talia se valaaulia e o e eva faamasani! Tuu oe lava i ni tulaga e mafai ona taitai atu ai i le feiloai atu i isi talavou matutua e tutusa o outou mafaufau. I se faapuupuuga,



ia tulituliloa se ala o le a oo atu ai i le fiafia ma le filemu sili atu.

Faaitaiga a Iosefa Samita o le Faatuatua

Sei o tatou tagai ia Iosefa Samita e fai ma faaitaiga o le faatuatua ma le faaalua o vaega o le manao, talitonu, ma le faamoemoe.

Sa fia iloa e Iosefa le Ekalesia moni a Iesu Keriso. Sa malosi lava lona manao o lea sa taitai atu ai o ia i tusitusiga paia, lea tatou te faitau ai, “Ae afai ua leai se potu i so outou, ina ole atu ia i le Atua” (Iakopo 1:5). Sa mafaufau o ia i lenei mau. Sa *manao* o ia ia ona maua le potu, ma sa ia *talitonu* e mafai ona ia mauaina pe afai e ole atu i le Atua. Sa ia faia le mea talafeagai e tasi: sa ia tatalo ma ole atu i le Atua. Ia mafaufau i lenei mea mo sina taimi. Sa i ai ia Iosefa le manao e iloa le upumoni. Sa talitonu o ia i upu a Iakopo. Sa faamoemoe o ia mo se tali. Ae ana faapea e gata ai iina, semanu tatou te le o faapenei i le aso.

O le faaaogaina o le faatuatua o lona uiga sa tatau ona alu atu i le vao ma tatalo ai. Ou te talitonu ina ua alu atu Iosefa i le vao e tatalo, sa mafaufau o ia o le a savali ese mai e aunoa ma se tali. Atonu na te le'i manatu e vaai i le Tama Faalelagi ma Iesu Keriso, ae sa ia mafaufau i se tali. O se faaitaiga maoae lava o le faatuatua! Sa i ai lona manao, sa ia talitonu, sa ia faamoemoe, ma sa ia faia le faatinoga.

O le faatuatua o se tamaitiiti e 14-tausaga na suia ai le lalolagi. Ona o le tatalo a Iosefa i le Vao Paia, na matala ai le lagi ma toe fetalai mai le Atua i Lana fanau e ala i se perofeta.

O Se Tasi o Ou Avanoa e Faali Ai le Faatuatua

O loo faaauu pea ona fetalai mai le Alii e ala i Lana perofeta i aso nei. I le na o se tausaga ma le afa ua mavae, sa saunoa mai ai Peresitene Thomas S. Monson:

“O loo i ai se vaipanoa lea e tatau ona i ai se taimi e mafaufau loloto ai

e uiga i se faaiipoipoga ma le sailia o se soa e te fia manao e faatasi i ai i le faavavau. Afai e te fili ma le atamai, ma afai e te tautino atu i le manuia o lau faaiipoipoga, e leai ma se isi mea o lenei olaga o le a aumaia ia te oe se fiafiaga sili atu.

“Pe a e faaiipoipo, o le a e manao e faaiipoipo i le Maota o le Alii. Mo outou o loo umiaina le perisitua, e le tatau lava ona i ai se isi filifiliga. Ia faaeteete, ina nei e faaumatiaina lou agavaa e te faaiipoipo ai. E mafai ona oulua tausia le lua mafutaga i totonu o tuaoi talafeagai a o oulua maua se taimi fiafia.”²

O lou manao, talitonu, ma le faamoemoe atonu e le faaalua i se lisi, e pei ona sa i ai mo a'u, ae po o le a lava le ala e faali ai nei uiga, o le a fesoasoani ia te oe e faaatoa lou faatuatua e ala i le mulimuli i le perofeta a le Alii i le sailia o se soa e mafai ona e maua ai le fiafia sili atu. O lou manao, talitonu, ma le faamoemoe o le a fesoasoani foi ia te oe e te filifili ai ma le potu.

O faamanuiaga o le filifili e tulituliloa ma faafailele faaiipoipoga e faavaau o le a taitai atu ai i tatou e tofo i fua o le talalelei, lea sa faamatalaina e Alema ua “sili ona pele, . . . ua sili ona suamalie i luga o mea uma ua suamalie, ma . . . mama i luga o mea uma ua mama.” Sa ia faaauu, “O le a outou taumamafa fiafia i [nei fua] seia oo lava ina outou maoota, o le a outou le fia aai, pe fia feinu ai” (Alema 32:42). Nai lo le fefe i le lumanai, ia faaoga le faatuatua lea o le a mafai ai ona e maua folafolaga a le Alii. ■

FAAMATALAGA

1. Tagai Dennis F. Rasmussen, “What Faith Is,” in Larry E. Dahl and Charles D. Tate Jr., eds., *The Lectures on Faith in Historical Perspective* (1990), 164.
2. Thomas S. Monson, “Mana o le Perisitua,” *Liahona*, Me 2011, 66.



Saunia e Elder Juan A. Uceda
O Le Fitugafulu

O LE TUSIA MAMONA— IA FAASOA ATU

Sa ou iloa e moni le Tusi a Mamona ona o mea e tolu sa ou lagonaina i le taimi sa ou faitauina ai.

Ao 18 ou tausaga, sa ou nofo i Lima, Peru, lea sa ou fanau ma ola ae ai. O le taimi lena sa fetau ai lo’u tama i sana uo lelei ua leva e le’i toe vaai i ai.

Sa faagaetia lo’u tama ona sa foliga laititi lava lana uo ma sa laei lelei. Sa ia fesili atu i lana uo pe o le a le mea na tupu ia te ia na mafua ai lenei suiga. “Na faatoa e malo i se lulu?” na ia fesili ai. Sa tali le uo, “Ia, o se mea e sili atu le lelei nai lo lena. O lea ua avea nei a’u ma Mamona, ma ou te manao e faasoa atu le talalelei ia te oe ma lou aiga.”

Sa faapea lo’u tama sa tausua mai lana uo, o lea sa ia fai atu ai, “Ua lelei, afai e te manao e auina mai au faifeautalai, ia fai.” Peitai sa mo’i lava

O Elder Uceda (lona lua mai le taumatau) faatasi ma lona aiga i Lima, Peru, a o le’i leva ona auai o ia i le Ekalesia.



ATA PUE O LE AIGA MAI FAALOLOGA A EIDER UCEDA; ATA NA TUSIA E BRIAN CALL

lenei alii, ma i totonu o ni nai aso na o mai ai faifeautalai ma tuitui mai i lo matou faitotoa. O le amataga lena o se aafiaga matagofie.

Sa aoaoina i matou e faifeautalai e uiga i le Tusi a Mamona ma tuu se kopi matou te faitau ai. O lenei mea sa tupu i le vaitaimi o le taumafanafana, ma sa ou faimalologa mai mo ni masina se lua ina ua uma lo'u tausaga muamua i le iunivesite. O lea sa ou aveina ai le tusi i lena aoauli ina ua uma le lesona ma amata loa ona faitau.

Na uma lea itulau ma lea itulau ae sa ou faitau ma faitau pea, ma sa le mafai ona taofi. Sa i ai se faatosinaga sa sau mai le tusi. Ou te fiafia tele e faitautusi ma sa ou faitauina ni tusi se tele, ae sa ese lava le mea lenei. Sa pu'evae a'u e le tusi, ma ina ua uma ona ou faitau mo ni nai itula, sa fai mai lo'u tina, "Juan, tape le moli! Ua fia momoe ou uso." Ma sa ou fai atu, "Ia, toeitiiti, toeitiiti a," ma sa faaauau pea ona ou faitau. E ui i le tele o itula sa ou faitau ai, ae sa leai so'u fiaai, leai se fiainu, ma leai se manao e moe.


A o le'i uma ona ou faitauina le tusi, sa ou iloaina sa i ai se mea faapitoa i totonu. Sa i ai sa'u molimau aua e tolu ni aafiaga na ou maua a o ou faitauina le tusi mo le taimi muamua lava.

O le mea muamua na tupu ia te a'u i na itula o se lagona o'oo'o o le toafilemu lea sa ese mai mai soo se mea sa ou oo muamua i ai. O lenei lagona o le toafilemu sa tumau lava ia te a'u mo ni nai itula.

O le mea lona lua sa ou oo i ai a o ou faitau o se lagona o le olioli. Sa le o le fiafia lea sa masani ona ou maua i taimi matou te faatasi ai ma a'u uo po o le taimi sa ou faatauina ai se mea sa sili ona ou manao i ai. Sa le o se lagona o le fiafia; sa o se lagona o le olioli. A o ou faitau, sa amata ona ou tagi ma sa ou manatu, "Oka, ou te fiafia i lenei lagona!"

Ma le mea lona tolu sa ou mauaina o le faamalamalamaina. O le taimi muamua na amata ai ona ou faitau, sa faigata ona malamalama aua sa i ai upu e pei o le *Nifae* ma le *Togiola* sa ou le masani ai. Ae ina ua tuanai ni nai itula o faitau, sa tatalaina lo'u mafaufau, ma sa pei sa i ai se sulu i lo'u mafaufau ma sa mafai ona faateleina ma faateleina lo'u malamalama a o faaauau ona ou faitauina le tusi.

Sa ou iloaina mulimuli ane o na aafiaga e tolu o nisi ia o auala e



faailoa mai ai e le Agaga ia i tatou. Sa ou mauaina le Agaga, ma sa ou saunia e papatiso, ae sa manaomia lo'u faatali mo le isi vaega uma o lo matou aiga ina ia maua a latou lava molimau. Mulimuli ane i le aso 6 o Aperila, 1972, na papatisoina ai i matou ma lo'u tina, ma lo'u tuafafine. Sa i ai lo'u tamā ma isi o'u tei e toalua ma sa latou matauina ma le totoa mea sa matou faia, ma o ni nai masina mulimuli ane, sa papatisoina ai foi i latou.

Na fetui lelei le taimi na oo mai ai le Ekalesia ma le talalelei i lo'u olaga. I lo'u tausaga muamua i le iunivesite, sa ou faalogo ai i le tele o filosofia a tagata ma manatu ma auala fou o le olaga sa matuai ese lava mai mea sa ou masani ai. O le tele o tulaga faatauaina sa ou aoaoina i la'u lotu a o ou laitiiti sa lu'iina e manatu fou sa tuu mai i o'u luma.

Sa faigata ia te a'u aua sa ou le

mautonu. Sa tele naua ni mea fou sa ou lagonaina e le sa'o, ae sa pei lava o ni mea masani i isi tagata. Ma sa le lava le pote sa ia te a'u e puipui ai o'u tulaga faatauaina.

Ina ua uma ona ou papatiso, sa o se mea na ese ia te a'u le toe foi i le iunivesite. O le taimi nei ua i ai sa'u tala e fai atu e tali atu ai ma le alofa i isi. Ua mafai ona ou fai atu ma le to'a, "Leai, faafetai, ou te iloa e le o se mea lena mo a'u." Ma o lenei ua ou iloina le mafuaaga na tatau ai ona ou fai atu faapena. Sa oo mai le Ekalesia ma le Tusi a Mamona ia te a'u i le taimi sa'o lava. Ou te matuai faafetai aua ua suia ai lo'u olaga.

Sa faamanuiaina au ona o la'u filifiliga e auai i le Ekalesia. I totonu o le Ekalesia sa ou feiloai ai i a'u uo sili ona lelei. Sa ou matamuli lava, ma sa sili atu ia te a'u le nofo, suesue, ma faitau toatasi a'u tusi, ma ou fiafia ai lava na o a'u. Ae ina ua oo mai le Ekalesia i lo'u olaga, ua ou aoaoina ai le mea e ta'u o le uo moni. Sa ou maua se tamaitai talavou lelei lava i le Ekalesia o le ua avea ma o'u toalua. Sa ou maua ni taitai perisitua ma ni tagata o e sa popole mo a'u. I le

Ekalesia a le Alii, sa ou maua ai le mea sa ou manaomia.


E toatele tagata o le a maua mea o loo latou manaomia i totonu o le Ekalesia. Aua le fefe e tautala atu i au uo ma fai atu, "Ou te talitonu i le mea lenei. Ou te manao e faasoa atu le mea lenei ia te oe." O nisi taimi e te faalogo ai o tautatala tagata matutua i mea sa'o ma mea sese, ae a i ai sau uo e te lua tupulaga e tautala foi i lena mea e tasi, e te mulimuli atu i lena tagata. Mo ni mafuaaga, o leo o a tatou uo e malolosi atu nai lo leo o tagata matutua. O lea ia fai oe ma faataitaiga lelei aua e te le iloa lava pe o faatalitali ai iina se Juan Uceda. E le mafai ona e iloa seiiloga e tatala lou gutu ma fai atu, "Juan, ou te manao e valaaulia oe e sau i la'u lotu. Ou te manao e te faitau i le tusi lenei." Afai e te faia lena mea faigofie, e te ono suia ni olaga. ■

Ina ua uma ona auai i le Ekalesia, sa maua e Elder Uceda ni avanoa se tele e faasoa atu ai lana molimau e uiga i le Tusi a Mamona a o avea ma se faifeautalai faamisiona i Peru. Tauagavale, i luga: Elder Uceda (taumatau) o loo tutu ma se aiga liliu mai sa ia aoaoina. Tauagavale, i lalo: O Elder Uceda (laina pito i tua, taumatau) o loo faatasitasi ma isi faifeautalai i fafo o se faletapu ai o le ekalesia.



Mataupu Faavae ma Feagaiga 87: 8.

O le autu o le Mutuale i le tausaga lenei o loo aoao mai ai ia i tatou ia nofoaga e tutu ai ina ia tatou saogalemu ai.



Ia Outou Tutu Ai

Ua valaauina i tatou e le Alii, “Faalatalata mai ia te au ma o le a Ou faalatalata atu ai ia te outou; saili mai

ia te au ma le filiga ma o le a outou maua ai au” (MF&F 88:63). A o tatou faia lea mea, o le a tatou lagonaina Lona Agaga i o tatou olaga, ma tuuina mai ia i tatou le manao ma le lototele e tutu ai ma le malosi ma le mausali i le amiotonu—ia ‘tutu . . . i nofoaga paia, ma aua le masi’i ese.’”

Peresitene Thomas S. Monson, “Tutu i Nofoga Paia,” *Liahona*, Nov. 2011, 84.

Aso o le Alii

Aso o le Alii—O Le Afio Mai Faalua o Iesu Keriso

8 O le mea lea, ia outou “tutu ai i nofoaga paia, ma aua le masi’i ese, seia oo mai le aso o le Alii; aua faauta, e “vave lava ona oo mai, ua fetalai mai ai le Alii. Amene.”

Aua Le Masi’i Ese

O nisi nei o auala e mautinoa ai o le a le masi’i ese se mea:

- *O se taula*—“Faamoemoe . . . e fai ma taula i agaga o tagata” (Eteru 12:4).
- *O se faavae mautu*—“O luga lava o le papa o lo tatou Togiola, o Keriso lea, le Alo o le Atua, e aoina oulua atinae ai lo oulua faavae . . . , o le faavae mautinoa lea” (Helamana 5:12).
- *O se tulaga mausali e tu ai*—E le mafai ona e tu vae tasi i totonu o Siona ae tu le isi vae i le lalolagi, aua “o le tagata faalotolotolua e faaletumau ia i ona ala uma” (Iakopo 1:8).
- *Fao o le faleie*—O fao o le faleie o Siona e fesoasoani i le Ekalesia ia tu maua ma mauaa, a o tuuina mai le malutaga mo i tatou: “[O] le faapotopotoina faatasi i luga o le laueleele o Siona, ma i luga o ona siteki, mo se puipuiga ma mo se sulufaiga mai le afa” (MF&F 115:6).

E Vave Lava Ona Oo Mai

“E tatau ona tatou vaavaai mo faailoga [o le Afio Mai Faalua], e tatau ona tatou ola faamaoni i le mafai tatou te mafaia. . . . Ae e le tatau ona tatou nofoai ona o lena aafiaga e faataau i ai o loo i luma atu o i tatou i se mea. E le mafai ona taofi lo tatou ola i le olaga. E moni, e tatau ona tatou ola i le olaga i se tulaga e sili atu le atoatoa, nai lo se isi taimi na tatou ola ai. Pe a mafaufau atu i ai, o le tisipenisione lenei o le atoaga o taimi.”

Elder Jeffrey R. Holland o le Korama a Aposetolo e Toasefululua, “O Lenei, e Silisili i Tisipenisione Uma,” *Liahona*, Iulai 2007, 20.

I Nofoga Paia

“O a . . . ‘nofoga paia’? E aofia ai le *malumalu* ma ona feagaiga e tausia ma le faamaoni. E aofia ai se *aiga* o i ai fanau e faatauina ma matua e faaaloologia. O nofoaga paia e aofia ai o tatou *valaauga* na tofia ai e taitai perisitua, e aofia ai misiona ma valaauga e faataunuuna ma le faamaoni i paranesi, uarota, ma siteki.”

Elder Dallin H. Oaks o le Korama a Aposetolo e Toasefululua, “Sauniuniga mo le Afio Mai Faalua,” *Liahona*, Me 2004, 10; faapoopo le faamamafa.

O le faamatalaga a le faatonu: O lenei itulau e le o se faamalamalama atoa o mau na filifilia, ae ua na o se amataga mo au lava suesuega.

AUTU O LE MUTUALE 2013



TUTU I TULAGA MAUALULUGA ATU

Saunia e David L. Beck

O Le Peresitene Aoao o Alii Talavou

O le autu o le Mutuale i le 2013 ua aumai mai le Mataupu Faavae ma Feagaiga 87:8: “O le mea lea, ia outou tutu ai i nofoaga paia, ma aua le masi’i ese, seia oo mai le aso o le Alii.” O le fesili ou te faamoemoe o le a mafaufau loloto i ai alii talavou uma i le tausaga a sau o le, *Pe o o’u tu ea i nofoaga paia?*

A o matou feiloai ma alii talavou totoa i le lalolagi atoa, ua ou molimauina patino ai le faitau afe o outou ua faia lenei mea i le tele o auala. O loo outou tutu i nofoaga e sili ona paia i taimi taitasi tou te ulu ai i le malumalu e faataunuu papatisoga mo e ua maliliu. Ou te uunaia outou ia faaoga avanoa uma e maua e ulu atu ai i le malumalu ma ia ola agavaa e le aunoa e fai lenei mea. O aso taitasi a o outou faataunuu o outou tiute i le Atua, ua outou tutu i nofoaga paia ma ua i ai i se tulaga e sii ae ai isi. Tou te tutu i nofoaga paia a o outou tapena, faamanuia, ma tufa le faamanatuga i Aso Sa taitasi. Tou te tutu i nofoaga paia ao outou faasoa atu le talalelei ma pe a outou galulue o se auauna e tumau—o se tasi e mafai, naunau, ma agavaa i taimi uma e auauna ma faamalosi atu i isi.

I le avea ai ma se tasi e umia le Perisitua Arona, ua tuuina atu ia te oe le tiute e lapatai atu, faamalalamalama atu, apoapoai atu, aoao atu, ma valaau atu i tagata uma ia o mai ia Keriso (tagai i le MF&F 20:59). Na saunoa Peresitene Harold B. Lee (1899–1973): “E le mafai ona e sii ae se isi tagata seiiloga e te tu i se tulaga e maualuga atu nai lo le tulaga o loo ia tu ai. . . . E le mafai ona e faamumuina se afi i se isi agaga vana ua mumu saesae i lou lava

agaga.”¹ Alii talavou, o le uiga o lenei mea e tatau ona faaaauu pea ona e galue e faamalosi lau molimau ma ia e naunau e faasoa atu i taimi uma.

Ua ia te outou se tiutetauave paia o le avea ma se tufugaaao o le Alii. A o e tatalo ma suesue i tusitusiga paia, taumafai e tasi poloaiga, ma faalogo i musumusuga a le Agaga, o le a faapea ona e tu ai i tulaga maualuluga atu. O se taunuuga, po o fea lava e te i ai e mafai ona avea ma se nofoaga paia. Ma, afai e tulai mai ni tulaga, o le a e maua le malosi, lototele, ma le mafai e sii ae ai isi. O le a e maua le mana ma le puipuiga ua folafola mai e le Alii ia i latou o e tutu i nofoaga paia.

Ou te fiafia i le saunoaga a Peresitene Thomas S. Monson e uiga i nei folafolaga ina ua ia faamautinoa mai ia i tatou a tatou faalatalata atu i le Alii, “o le a tatou lagona Lona Agaga i o tatou olaga, foai mai ia i tatou le naunau ma le lototele e tutu malosi ma mausali ai i le amiotonu—e ‘tutu . . . i nofoaga paia, ma aua le masi’i ese’ (MF&F 87:8).

“A o feagia’i mai matagi o suiga ia i tatou ma faaaauu ona fai ifo le ute o amioga lelei i le lalolagi i luma tonu o o tatou mata, tau ina ia tatou manatua le folafolaga faapitoa a le Alii ia i latou o e faalagolago ia te Ia: ‘Aua e te fefe; aua ou te ia te oe: aua le fetepatepai; aua o A’u o lou Atua: ou te faamalosi oe; e moni, ou te fesoasoani ia te oe’ (Isaia 41:10).”² ■

FAAMATALAGA

1. Harold B. Lee, “Stand Ye in Holy Places,” *Ensign*, Iulai 1973, 123.
2. Peresitene Thomas S. Monson, “Tutu i Nofoga Paia,” *Liahona*, Nov. 2011, 84.



“TUTU A I
NOFOAGA
PAIA, MA AUA
LE MASI’IESE...”

(TAGAI I LE MF&F 87:8).



NOFOAGA PAIA I LOU OLAGA

Saunia e Elaine S. Dalton

O Le Peresitene Aoao o Tamaitai Talavou

O le autu o le Mutuale o le tausaga lenei ua valaaulia ai oe e laa ese mai le lalolagi ae laa atu i totonu o le malo o le Atua. E pei ona aoao mai Peresitene Boyd K. Packer, Peresitene o le Korama a Aposetolo e Toasefulu-lua, ua tatou nonofo i teritori o le fili.¹ O le “Ia outou tutu i nofoaga paia” o le ki lea i le laveaiina.

O leni autu ua uunaia mai ai ni fesili taua: O le a se nofoaga paia? O fea e i ai se nofoaga paia? E mafai faapefea ona tatou tutu i nofoaga paia? E faapefea ona tatou faia ia nofoaga e masani ona tatou aumau ai ia sili atu ona paia? A o tatou sailia tali i nei fesili, o au tali o le a taiala ai au fegalegaleaiga, au filifiliga o gaoioiga, ma ou laei, upu, ma amioga.

Ua e tautino e faamalosi lou aiga ma le auaiga. Taumafai ia fai lou aiga o se nofoaga paia, e faatumulia i le Agaga o le Alii. E mafai ona e lagolagoina tatalo faaleaiga ma le suesueina o tusitusiga paia.

E mafai ona avea lou potu ma nofoaga paia e valaaulia ai le Agaga. A faapea e vaai le perofeta i lou potu, mata na te vaai i ai o se nofoaga paia? E te vaai i ai foi [o se nofoaga paia]?

E mafai ona tatou tutu i nofoaga paia pe a tatou o i le lotu. Ua aoao mai tusitusiga paia e faapea o uarota ma siteki o Siona o nofoaga paia ia o le a avea “mo se puipuga, ma mo se sulufaiga mai le afa” (MF&F 115:6).

O le nofoaga aupito sili ona paia i le lalolagi o le malumu. Na saunoa Peresitene Thomas S. Monson: “A’u uo talavou e, o e o i ai o outou tausaga o le talavou, ia i ai

pea lava pea a outou vaaiga i le malumalu. Aua lava nei faia se mea o le a taofia ai oe mai le ulufale atu i ona faitotoa ma ‘ai ai i faamanuiaga paia ma le faavavau iina. Ou te faamalo atu ia te outou o e o atu soo i le malumalu ma faia ai papatisoga mo e ua maliliu.”² Ia outou agavaa e le aunoa ia maua se pepa faataga aoga o le malumalu, e tusa lava pe mamao ese se malumalu.

Soo se mea lava o loo e i ai o i ai le Agaga e mafai ona avea o se nofoaga paia. Na aoao mai Peresitene Harold B. Lee (1899–1973) o nofoaga paia e sili atu ona faatatau i le *ituaiga* olaga o loo i ai se tagata nai lo le *mea* o nofo ai.³ Afai e te ola agavaa mo le mafutaga tumau a le Agaga Paia, o lona uiga o loo e tu i se nofoaga paia.

O malumalu uma lava o loo i ai ni faaupuga ua tusia ai “E paia i le Alii.” Ia saili ia tutu i taimi uma i nofoaga paia. A o outou ola i tulaga faatonuina, tatalo i aso uma, ma faitau tusitusiga paia—ae maise lava le Tusi a Mamona—o le a e lagona le mafutaga a le Agaga Paia. Ua folafola mai e le Alii lava Ia ia te oe, “Aua e moni Ou te fai atu ia te outou, e i ai mea silisili o loo faatali mai mo outou” (MF&F 45:62). Ou te ioe ma molimau atu e moni leni mea! ■

FAAMATALAGA

1. Tagai ia Boyd K. Packer, “Pe Faapefea ona Ola i le Teritori a le Fili,” *Liahona*, Oke. 2012, 34–37.
2. Tagai ia Thomas S. Monson, “O Le Malumalu Paia—o se Sulu Taiala i le Lalolagi,” *Liahona*, Me 2011, 92.
3. Tagai i le *Doctrine and Covenants Student Manual: Religion 324 and 325*, 2nd ed. (Church Educational System manual, 2001), 196.



Saunia e Adam C. Olson

Mekasini a le Ekalesia

O MEA NA AOAOINA E AGUNG

MAI LE PATEMINITONE

*Ua iloa e se talavou Initonesia o le i ai o
le faamoemoe e taofia ai o ia mai le fiu.*

O se aso susū masani i Jogjakarta, Initonesia, ma sa sisina le afu o Agung mai ona fulu-fulumata a o faatalitali o ia i le faate'a a lana paga o loo la tauva. Sa pipii lava ai o le taaloga pateminitone, ma e lagona e le talavou e 15 tausaga le finafinau ina ia manumalo.

Ina ua uma se finauga malosi, sa ta mamaoese e lana paga tauva le fulumanu ma sa le mafai ona papai atu i ai Agung. O le le manao e fo'i e foai le ai i se tauvaga vavalalata faapena, o lea na oso atu ai Agung mo le fulumanu ae peitai sa le'i au i ai—ma o lona sese e atu i le malae sima na toto ai [vae ma lima].

E faigofie ona iloa e fiafia o ia i taaloga finau o le pateminitone. Ae peitai e le moemiti Agung e avea o se tagata taalo faapolofesa i le pateminitone. O le a le filifili o ia i le va o le faate'aina o le fulumanu i le Olimipeka ma le faia o se misiona. O lana lava tautinoga, e le lelei tele o ia i le taaloga.

Ae aisea la e taumafai malosi ai lenei talavou laitiiti e tele lana ataata? Faamoemoe.

“Ou te talitonu e mafai ona lelei atili [la'u taalol],” o lana tala lea.

O Se Pogai mo le Faamoemoe

O le faamoemoe o le pogai lea tatou te faia ai le tele o mea. Tatou te faamalositino aua tatou te



faamoemoe e mafai ona tatou malolosi ma maloloina teisi atu. Tatou te faataitai pea le faaaogaina o se mea fai musika aua tatou te faamoemoe e mafai ona tatou iloa ona tata lelei. E aoao pea e Agung le taalo pateminitone aua e faamoemoe e mafai ona ia lelei atili ai.

“Afai e leai so’u faamoemoe ia lelei atu la’u taalo ma ia ou manumalo, o le a faigofie lava ona ou fiu,” o le tala lea a Agung.

O le faamoemoe o se elemene taua o le ata o le faaolataga. O le faamoemoe ia mafai ona faamagaloina i tatou e taitai atu ai ina tatou salamo ma toe taumafai pea pe a tatou toilalo i le tausia o se poloaiga.

O Le Osofaiga a Satani i le Faamoemoe

O auupega e lua e sili ona lelei a Satani e faasagatau mai ai ia i tatou o le masalosalo ma le lotovaivai. Sa le mafai ona ia faasalaveia le fuafuaga a le Tama Faalelagi i le taofia o le Togiola. Ae e mafai lava ona ia taumafai pea e taofi aafiaga faamamaina o le Togiola i o tatou olaga pe afai e mafai ona ia faoa o tatou faamoemoe e mafai ona faamagaloina i tatou.

“E mana’o Satani ina ia leai so tatou faamoemoe,” o le tala lea a Agung, “aua a tatou fiu, ona tatou mamao ese

lea mai lo tatou Tama Faalelagi.”

Peitai, a manumalo Satani i le faalotovaivaia o i tatou, o loo i ai ni auala e toe maua ai le faamoemoe.

Mauaina o le Faamoemoe

A tatou manaomia le faamoemoe mo le lumanai, e mafai ona tatou toe vaai i le taimi ua tuanai. E faaoga e Agung se faataitaiga mai le aoga lea sa aoaoina ai o ia i lena lesone. “Ua ou iloa afai ou te suesue malosi, e mafai ona faamanuiaina a’u suega,” na ia fai mai ai. “Ona o lena aafiaga, ua i ai lo’u faamoemoe afai ou te koleni malosi, e mafai ona ou alualu i luma i le pateminitone,” o lana tala lea. “O lo’u aafiaga ua aumaia ia te a’u le faamoemoe.”

A tatou manaomia le faamoemoe ia Iesu Keriso, e mafai ona tatou maua i o tatou aafiaga ua mavae i le mana o le Togiola (tagai i le Roma 5:4) ma aafiaga o isi, e aofia ai aafiaga e te ono faalogo i ai i le sauniga faamanatuga, se lesone i le Aoga Sa, i le *Liahona*, po o tusitusiga paia (tagai i le Iakopo 4:4–6).

A o tatou suesue i saunoaga mautinoa a perofeta, tatalo mo le meaalofo faaleagaga o le faamoemoe, ma iloa le mana o le Faaola i o tatou olaga, o le a faateleina lo tatou faatuatua ia te Ia, e pei foi o lo tatou faamoemoe o le a fesoasoani mai o Ia ia i tatou i le lumanai.¹

Aua Le Fiu

E iloa e Agung atonu o le a le mafai lava ona avea o ia ma se tagata taalo faapolofesa, ae ua ia iloa afai lava e tumau pea lona taumafai, e i

ai le faamoemoe e mafai ona ia alualu i luma.

Ua ia iloa o le mana sili o le faamoemoe o lena: “Pau o le mea ia aua lava nei e fiu, o loo i ai le faamoemoe,” sa ia fai mai ai.

I le olaga, o le Togiola a Iesu Keriso o le punavai taua lea o le faamoemoe. Ona o le Togiola e mafai ai ona tatou salamo pe a tatou faia se mea sese. O le uiga foi o lena mea, ona o le Togiola, ua tatou le toilalo ai i le suega o le olaga pe a tatou faia se mea sese sei vagana ua faau lo tatou taumafai e salamo ma usitai.

O le mafuaaga lena e faaauau ai pea ona valaaulia e Agung ia lona tamā i le lotu i Aso Sa uma. O le mafuaaga lena e taumafai ai lava e tu atu mo le mea sa’o, e tusa lava pe le faia e ana uo. O le pogai lena na te faia ai le malaga e tasi le itula le umi o le alu ma le fo’i mai i le uila i taimi uma e alu atu i le falelotu mo le seminare, Mutuale, sauniga i le Aso Sa, vasega sauniuni a faifeautalāi, ma fesoasoani e faamama le falelotu.

“E le faigofie le taumafai e faapei o Iesu,” o le tala lea a Agung. “O nisi taimi ou te lagona ai le lotovaivai, ae peitai ou te le fo’i ai. Ona o Lana tau-laga mo a’u, ua i ai lo’u faamoemoe e mafai ona ou lelei atili.”

Ona o le Togiola ua faapea ona i ai le faamoemoe. Ona o le faamoemoe, e mafai e le Togiola ona sui o tatou olaga. ■

FAAMATALAGA

1. Tagai ia Dieter F. Uchtdorf, “O Le Mana e Le I’u o le Faamoemoe,” *Liahona*, Nov. 2008, 21.



O SE FOLAFOLAGA O LE FAAMOEMOE

“Talu ai ona o loo faamaoni pea ma tausia e le Atua Ana folafolaga i aso ua mavae, o lea e mafai ai ona tatou faamoemoe ma le mautinoa o le a tausia e le Atua Ana folafolaga ia i tatou i le taimi nei ma le lumanai.”

Peresitene Dieter F. Uchtdorf, Fesoasoani Lua i le Au Peresitene Sili, “O Le Mana e Le I’u o le Faamoemoe,” *Liahona*, Nov. 2008, 23.

Aoaoga

O le malamalama faateleina tatou te maua ai le avanoa e aveia ai ma faatosinaga sili atu i le ausiaina o faamoemoega a le Alii.

Faatasi ai ma se naunautai ma le popole tele mo le manuia o o latou agaga, sa aoao atu ai e Iakopo ia tagata o sa Nifae “e uiga i mea o i ai nei, ma mea o le a oo mai” (2 Nifae 6:4). O ona tagata nei, ma sa ia alofa ia i latou. Sa ia aoaoina i latou i le po o ai moni i latou ma folafolaga a le Alii e uiga ia i latou. A o ia aoaoina i latou e uiga i le Faaola, sa ia alaga atu: “E, le silisiliese naua o le paia o lo tatou Atua! Ona ua silafia e ia mea uma, ma ua leai se mea ua le silafia e ia” (2 Nifae 9:20; faaopoopo le faamamafa).

E taua le manatua o lena mea pe a e mafaufau i le taua o aoaoga. O seneturi na muamua atu, i se isi itu o le lalolagi, sa “saili [ai Tama Aperaamo] i faamanuiaga o tama” sa manao “foi ia aveia ma se tasi ua mauaina le malamalama tele, ma aveia o se soo sili atu o le amiotonu, ma maua se malamalama sili atu” (Aperaamo 1:2).

O outou uma o atalii ma afafine faapelepele o le Atua¹ ma “o fanau a perofeta; ma o outou o . . . le feagaiga lea na faia e le Tama ma [Aperaamo]” (3 Nifae 20:25). E pei foi o Aperaamo, ua i totonu ia te outou le gafatia e “aoaoina atoatoa atili” a o aoaoina outou i mea ua

“tatau mo outou ona malamalama i ai” (MF&F 88:78).

Ua faailoa mai e le Alii o le malamalama manaomia e aofia ai “mea o i le lagi ma o i le lalolagi, ma o i lalo o le lalolagi; o mea sa i ai, o mea o i ai, o mea ua vave ona oo mai; o mea o loo i le atunuu, o mea o i isi atunuu; o taua ma faafatiatamaiga o atunuu, ma



Elder
Craig A. Cardon

O Le Fitugafulu



faamasinoga o loo i luga o le lauelele; ma se malamalama foi i atunuu ma malo” (MF&F 88:79).

Aisea? Aisea e matua taua ai le maua o le aoaoina? Sa tuuina mai e le Alii Lava Ia se vaaiga matagofie:

“Ina ia mafai ona outou saunia i mea uma pe a Ou toe auina atu outou e faalatele le valauga lea ua Ou valaaulia i ai outou, ma le misiona lea ua Ou tofia ai outou” (MF&F 88:80).

I lenei lalolagi ua faateleina le faigata, o le aoaoina o se tasi lea o ausiagi aupito taua o le olaga. Ma e ui ina moni e faapea o le tele o le aoaoina o le mea masani o le a taitai atu ai i avanoa mo le faateleina o tau faalelalolagi, ae o le taua sili atu o le malamalama faateleina o le avanoa lea tatou te maua e avea ai ma faatosinaga sili atu i le ausiaina o faamoemoega a le Alii. E pei ona faamalamalamaina i le *Mo Le Malosi o le Autalavou*: “O le aoga o se vaega taua i le fuafuaga a le Tama Faalelagi e fesoasoani ai ia te oe ia avea ai e faapei o Ia. E finagalo o Ia ia aoaoina lou mafaufau ma ia atiae ou tomai ma taleni, lou malosi e faatino lelei ai ou tiutetauave, ma lou gafatia e talisapaia ai le olaga.”²

Sa faapena foi ona aoao mai e le

Perofeta o Iosefa Samita: “I le atamai e i ai le mana. O le Atua e tele atu lona malosi i lo isi uma lava, aua o loo ia te Ia le atamai tele.”³

Mo pogai lelei, o aoaoga aloaia e manaomia ai oe, mo ni tausaga, ia e fesootai i se vaaiga lautele o tomai ma mataupu, o nisi o na mea atonu e te le masani ai pe atonu foi e te le fiafia e suesue i ai. Ae ui i lea, e tatau ona e filiga i au suesuega, aua o lenei mea e faalateleina ai lau vaai ma faateleina ai le gafatia o lou mafaufau e aoao i isi foi eria. Ioe, o lo’u fesootai atu i se vaega tele o tomai ma mataupu autu e mafai ai ona e maua le avanoa e faailoa ai na tomai ma mataupu ia e i ai moni sou fiafia i ai. Faatasi ai ma lenei fiafia, a o faaauau ona e faalateleina au aoaoga, o le a e maua le avanoa e tulitulimatagauina



ai i le loloto sili atu na mea e te fiafia moni i ai.

Sa faasoa mai e Peresitene Henry B. Eyring, Fesoasoani Muamua i le Au Peresitene Sili, se fautuaga taua sa ia maua mai lona tamā lea sa fautuaina ai o ia e lona tamā e tulitulimatagau ia aoaoga “e te manaotele i ai ona afai e te le o mafaufau i se mea, o le mea lena o loo e mafaufau i ai.”⁴ Sa ma fautuaina ma Sister Cardon le ma fanau ia tulituliloa se aoaoga ma se matata latou te fiafia i ai o le a faapea ona latou mananao e “musamusa i le galuega.”

Sa lapataia e Iakopo lona nuu mai “vaivaiga, ma le valelea o tagata!” Sa ia faamalamalama mai, “Pe a aoaoina i latou ua latou manatu ua popoto i latou, ma latou le faalogologo ai i le fautuaga a le Atua.” Ona ia faaopopo mai lea o le upumoni mamalu: “Peitai e lelei le aoaoina pe afai latou te faalogologo i fautuaga a le Atua” (2 Nifae 9:28–29).

Ia aoaoina ma faalogo i le Alii. O le a Ia faamanuia ma faalauolaola oe i le ausiaina o Ona faamoemoega. ■

FAAMATALAGA

1. Tagai i le “O Le Aiga: O Se Folafulaga i le Lalolagi,” *Liahona*, Oke. 2004, 49.
2. *Mo Le Malosi o le Autalavou* (tamaitusi, 2011), 9.
3. *Aoaoga a Peresitene o le Ekalesia: Iosefa Samita* (2007), 282–83.
4. Tagai Gerald N. Lund, “Elder Henry B. Eyring: Aoaoina e ‘Aafiaga Iloga,’” *Liahona*, Ape. 1996, 28.



AOAO PE'A

[LE TAINA O LE PIANO]

Sa ou manao e togi le solo. Mata o le a i ai se aoga o nei taumafaiga uma?

Saunia e Willis Jensen

“Ua ou le toe fia alu i lesona ta piano,” na ou fai atu ai i lo’u tina. Ua ou aoga mo ni nai tausaga ma ua ou lelava i le aoao soo [o le taina o le piano]. Sa ou sauni e togi le solo. Ma le isi sa ou le lelei tele ai. Talu ai ou te maua i le faaaitauli o le tau le lelei o le faalogo ma e fai a’u masini e fesoasoani i la’u faalogo, o lea ou te le’i mafaufau ai lava o a’u o se tagata e i ai se taleni tau musika. O taimi uma lava e umi se taimi e tau aoao ai le fati o se pese.

Sa le’i tele se tala a lo’u tina na fai mai ae sa na ona fai mai, e tatau ona faaaauu pea ona fai a’u lesona seia oo ina mafai ona ou taina viiga. Ina ua tuanai le tele o lo’u faitio ma le tele o le faamalosiuga mai o’u matua, sa ou filifili loa o le a ou le fiu.

Faatelevave i luma i ni nai tausaga ma le faitau afe o maila i se falelotu i atumauga o Kuatamala tutotonu. I le avea ai ma se faifeautalaitai, sa ou auai i se konafesi faaleitu. Sa ou vave taunuu ma ou tau atu ai i se piano iina, o lea sa ou saofai ifo ai loa ma amata tata ni viiga. O le tele o uarota ma paranesi sa i ai ni piano uila laiti

sa faigata ona tata ai, o lea sa matuai ou fiafia ai lava e tata i se piano mo’i. Sa iu ina talosagaina au e ta pese a le aulotu mo le konafesi.

O le a le mea na suia o’u uiga faaalia i le va o o’u tausaga o lo’u talavou ma le taimi na avea ai au ma se faifeautalaitai? Sa ou lagonaina le mana o le Agaga e ala i musika.

A o ou faamisiona, sa ou maua ni avanoa se tele e faaaoga ai tomaitai faamusika sa ou aoaoina. Sa ou faamemelo i le tele o avanoa e pese ma ta ai le piano ma tata i le toetoe lava o vaiaso uma i sauniga faamanatuga. O le a ou manatua pea le faalogologo atu i na tagata faamaoni o le ekalesia i Kuatamala o peseina viiga. Sa ou aoaoina atu i le au paia viiga fou latou te le’i masani ai. Sa ou aoaoina atu ni lesona amata o le taina o le piano. Matou te pepese ma a’u soa i tagata sa matou aoaoina. E tusa lava pe sa pa’ulua a matou pese, sa i ai lava iina le Agaga e pai atu i loto o tagata.

Sa ou aoaoina e le afaina po o a au taleni; e mafai lava ona e aoao e atinae tomaitai faamusika. O le a le avea a’u ma se ta piano iloga, ma o

le toatele o le au paia i Kuatamala o le a le i ai lava i le Afaipese a le Tapeneko. Ae sa le’i afaina. Sa mafai lava ona matou lagonaina le Agaga e ala i musika. Ou te faafetai lava ona sa uunaia a’u e o’u matua e fai pea a’u lesona ta piano, ma ou te faafetai ona sa faaaauu pea ona ou aoao pea. ■

ATIINA AE OU TOMAI MA TALENI

“O le aoga o se vaega taua i le fuafuaga a le Tama Faalelagi e fesoasoani ai ia te oe ia avea ai e faapei o la. E finagalo o la ia aoaoina lou mafaufau ma ia atiae ou tomaitai ma taleni, lou malosi e faatino lelei ai ou tiutetauave, ma lou gafatia e talisapaia ai le olaga. O le aoga e te mauaina o le a taua tele ia te oe i le olaga faaletino ma le olaga a sau.”

Mo Le Malosi o le Aulavou (tamaitusi, 2011), 9.



TUTU

I NOFOAGA PAIA

“Soo se mea e te i ai e i ai le Agaga e mafai ona avea ma se nofoaga paia.”

(Elaine S. Dalton, “Nofoaga Paia i Lou Olaga,”
Liahona, Ian. 2013, 51; tagai foi i le MF&F 87:8.)

VAAIA O [UIGA] LELEI O TAILI

Saunia e Karinne Stacey

Sa le mafai ona ma onosaia le tasi ma le isi. Mata e ono mafai ona avea i maua o se uo?

I le vasega fa, sa ou i ai i le vasega sa sili ona lelei sa i ai. O mea uma e uiga i lona vasega sa atoatoa—vavana ai Taili [ua suia le igoa]. Sa agaleaga o ia i le toetoe o tagata uma, e aofia ai ma a'u. Sa ou vaai o ia tuleia isi i le auala savali o le fale faafiafia, ma sa ia tuleia foi a'u i nisi o taimi. Ou te alu i le fale ma le tagi ona sa ou le malamalama pe aisea e taufaafefe ai ia te a'u.

Sa leai se isi na fai ma ana uo. Sa na o ia lana laulau i le taimi o le malologa aua e leai se isi e fia nofo latalata ia te ia. Sa ou faamatala i lo'u tina e uiga ia Taili, ma sa ia tuuina mai ia te a'u ni upu o le poto e suia ai olaga: "Atonu o loo ia manaomia se uo."

Sa oo mai lenei mea i se tulaga na o'u te'i ai. E mafai faapefea ona faaali le amiolelei i se tasi e le taitai fetuutuunai pe a valaau mai ia te a'u se upu faatiga? Ae peitai, sa ou filifili

ma le le naunau i ai ia ou agalelei teisi atu ia Taili ma taumafai e malamalama ia te ia. A o faasolo ina ou masani lelei ia te ia, sa ou iloa ai o le mea moni o ia o se tagata lelei. E lei umi ae ou iloina o lona olaga sa sili atu ona leaga nai lo le mea na mafai ona ou mafaufauina. Sa faigata se aiga sa nofo ai, ma e taumafai lava e aloaloese mai soo se talanoaga e aafia ai le upu "aiga."

I se tasi aso i le taimi o le malologa, sa matou saofafai ai ma a'u uo. Talu ai ona sa agaleaga Taili i isi, o lea sa i ai ni isi o teineiti sa faapena ona agaleaga atu foi ia te ia. Sa amata ona latou taufaaililili ia Taili, ma talanoa leotelele ina ia mafai ona ia lagonaina mai i latou. Sa latou faia ni ala e pei o le, "Sau tatou nonofo—TOE AFE!" "O le a lona manogi? Aue, o Taili!" ma le "Aua nei e sau ia i matou!" Sa ou saofai iina ma faalogo i ai.

Ona ou faalogoina lea o se leo itiiti i lo'u mafaufau: "Fai se mea." Sa ou tu i luga ma lagonaina le tele o mata na tilotilo mai ia te a'u. "Taofi!" na ou fai atu ai. "Aisea o le a tou faia ai na faamatalaga i soo se tagata? Tau lava o le fai faalelei o ia!" Sa filemu tagata uma. A o ou saofai ifo, sa ou tilotilo atu ia Taili. Sa faliu ma vaai mai ia te au ma se agaga faafetai moni.

I le vasega ono sa oo mai lo'u aso fanau e 12 ai o'u tausaga, ma sa ou manao e fai se pati ma ni nai a'u uo. Ina ua fesili mai tina pe ou te manao

e valaaulia se isi tagata, sa ou lagonaina lona lava leo itiiti i lo'u mafaufau: "Valaaulia Taili."

"Ou te manao e valaaulia Taili," sa ou fai atu ai i lo'u tina.

"E mo'i?"

Sa luelue lo'u ulu. Ina ua uma le pati o le aso fanau, sa fusia i matou ma a'u uo, na aofia ai ma Taili, i se tulaga lea na oo ai ina matou faatasi-tasi i Aso Faraile uma i masina mulimuli e tolu na toetoe o le aoga. Sa sau Taili i taimi taitasi na. Sa avea i maua o se uo sili ona lelei.

O lenei ua ou i ai i le vasega valu ma ua ou siitia atu i se isi setete, ae e masani lava ona ma talanoa ma Taili, o le o loo avea pea ma se tasi o a'u uo lelei. O nisi taimi e fesili mai ai isi a'u uo pe na faapefea ona ma vavalalata.

"I le vasega fa sa avea o ia ma se tagata taufaafefe, ma sa tele lava ina ita le tasi i le isi," o la'u tala lea.

"Ia, ona faapefea lea ona avea ouluga ma uo lelei?"

"Sa ou vaavaai mo uiga lelei ia te ia. E tofu tagata uma ma ni uiga lelei ia i latou, ma sa ou aapa atu e su'e ona uiga lelei." ■





Saunia e Elder Robert D. Hales

O Le Korama a Aposetolo e Toasefululua

O sui o le Korama a Aposetolo e Toasefululua o ni molimau faapitoa a Iesu Keriso.

E mafai faapefea ona ou maua se MOLIMAU?



O le mauaina o se molimau e amata i le suesue



ma tatalo



ona ola lea i le talalelei i le onosai ma le faapalepale



ma le valaaulia ma le faatalitali i le Agaga.



O le soifuaga o Iosefa Samita o se faataitaiga sili lea ona lelei o lenei faagasologa.

O Se **Fuafuaga** mo lo **Matou** **Aiga**

*“E mafai na faavavau aiga i le ala a le Tama”
(Tusipese a Tamaiti, 98).*

Saunia e Marissa Widdison

Mekasini a le Ekalesia
E faavae i se tala moni

Sa ou nofonofo i luga o le moega o Tina ma Tama, i lo'u misia tele o i la'ua, ae

tatagi loa le telefoni.

“Ei, Levi. E te iloa?” o le tala lea a Tama. “O lou tuafafine o Nola sa fanau mai ananei i le aoauli!”

Sa mafai ona ou iloa sa fiafia Tama, ae sa ese lava foi lona leo—e pei sa popole.

“O le a lona mamafa?” sa ou fesili atu ai, ma mafaufau pe sa ou manao moni e iloa le tali.

Sa são Tama mo sina taimi.

“E sili laitiiti atu lava ma le lua pauna [0.9 kg],” o lana tala lea. O le taimi la lenei sa mautinoa lava lona leo popole. Sa tatau ona fanau Nola i le vaitau o le Kerisimasi, ae o lea ua fanau mai ia Setema. “E lamo'imo'i tele o ia,” o le faaauau mai lea a Tama. “Manatua e tatalo mo ia, Levi. Ma tatalo foi mo i tatou ina ia mafai ona tatou talitonu ua silafia e le Tama Faalelagi le mea e sili ona lelei mo lo tatou aiga.”

Ina ua tuu i lalo le telefoni, sa ou alu atu i le umukuka ma aumai se taga pi sa fuafua Tina e fai ai se supo. Fai mai le taga na toetiiti lava tutusa le mamafa ma le mamafa o Nola i le taimi lenei. Sa ou uuina i o'u lima, ma taumafai e vaai faalemaufau po o a foliga o se pepe e faapena le tele.

“E lei leva nei ona i ai lona agaga ma le Tama Faalelagi,” o o'u mafaufauga na, i le manatuaina o mea sa ou aoaina e uiga i le olaga i le muai olaga ma le ata o le faaolataga. Sa ou iloaina e tusa lava pe iu ina oti Nola, o le a mafai ona matou toe vaai ia te ia aua sa faamauina uma



faatasi i matou o se aiga. Ae sa ou faamoemoe foi o le a matou mafuta ma ia iinei i le lalolagi.

I le aluga o nai isi masina na sosoo ai, sa tele lava ina i ai Tina ma Tama i le falemai. Sa o mai Tinamata ma Tamamatua i lo matou fale e fesoasoani e vaai a'u ma o'u uso ma o'u tuafafine laiti. Sa anapopogi ma tatalo le uarota mo lo matou aiga, ma sa aumai e tamaitai agalelei mai le Aualofa ni meaai i afiafi mo i matou i nisi o taimi. Sa fia iloa e tagata uma pe na a mai Nola.

I se tasi afiafi, sa valaauina mai ai i matou uma e Tina ma Tama i totonu o le potu malolo. Sa la fai mai o le a o Tama ma le epikopo e fai se faamanuiaga o Nola. Ina ua aluese atu Tama ma lona suti ma le fusiua, sa faapotopoto mai e Tina i matou uma i talaane o le nofoa e fai se tatalo.

“Faamolemole ia faamanuia Tama a o ia tuuina atu se faamanuiaga faaleperisitua ia Nola,” o le tatalo lea a Tina. Sa faasolo ina vaivai lona leo. “Ma faamolemole, pe afai E te finagalo ai, ia mafai ona sau o ia i le fale ma ia maloloina.”

A o matou tatalo, sa mafai ona ou lagonaina le faatumulia e le Agaga Paia o le potu i le toafilemu ma le alofa. Sa pei sa ta'u mai e le Tama Faalelagi ia te a'u, e tusa lava pe o le a le mea e tupu ia Nola, o vaega uma lava ia o Lana fuafuaga.

O se taimi mulimuli ane o lena po, sa sau ai Tama ma faamatala mai ia i matou e faapea sa tupu se mea matagofie lava i le falemai. O le mea masani lava o le potu o Nola e malomaloa ma pisapisao. Sa tele masini ma faailo e i ai e tatagi ma moli emoemo, ma o taimi uma e nanati solo ai tausimai ma fomai e fesoasoani i pepe mosimosi iina.

Ae ina ua taunuu atu Tama ma le epikopo, sa ese lava. Sa filemu masini uma. Sa nofonofo tausimai i talaane o pepe, e faitautusi pe vaai foi i latou. Sa mafai e Tama ma le epikopo ona tuuina atu se faamanuiaga o Nola e aunoa ma se mea na faalavelave ai.

Ou te le iloa pe o le a tuputupu ae Nola iinei i le lalolagi pe toe foi atu e nonofo ma le Tama Faalelagi i se taimi e le o mamao. Ae ua ou iloa e faafofoga ma tali mai le Tama Faalelagi ia tatou tatalo, ma ou te lagona le toafilemu pe a ou manatua ua i ai Sana fuafuaga mo tagata *uma* o lo'u aiga. ■



Sau e vaavaai i se nofoaga taua i le talafaasolopito o le Ekalesia!

O FALE E 2

SA NOFO AI IOSEFA SAMITA

Saunia e Jan Pinborough Mekasini a le Ekalesia


O Palamaira, Niu Ioka, o le nofoaga lea sa amata ai le **Toefuataiga** o Le Ekalesia a Iesu Keriso o le Au Paia o Aso e Gata Ai i le 193 tausaga ua mavae. Sa asiasi atu Luka, Rasela, ma Iulia S. i lenei nofoaga faapitoa e aoao atili ai e uiga i le mea sa nofo ai le Perofeta o Iosefa Samita ma le ala sa ia fesoasoani ai e toefuatai mai le Ekalesia i le lalolagi.

O LE FALELAU

O le falelaau lenei sa fausia ia foliga i le fale sa nofo ai Iosefa mai le 12 i le 19 o ona tausaga.

1. *O Iosefa e toalima ona uso ae toatolu ona tuafafine. Sa o se fale pumoomoo mo ni tagata e toa 11!*

2. *Sa masani ona faapotopoto le aiga i le laulau ai e faitau le Tusi Paia. Ina ua 14 ona tausaga, sa faitau Iosefa i le lakopo 1:5: "A e afai ua leai se poto i so outou, ina ole atu ia i le Atua." Sa i ai sana fesili taua e fesili atu i le Atua.*



3.

I le taeao po o se tasi aso o le tautotogo i le 1820, sa savalivali atu ai Iosefa i se togalaau e latalata i le latou falelaau ma tatalo ai po o le fea o lotu e tatau ona auai ai. Sa faaali mai le Tama Faalelagi ma Iesu Keriso ma ta'u mai ia te ia e aua nei auai i se lotu o na lotu. Sa fetalai mai Iesu o le a fesoasoani Iosefa e toe aumai le Ekalesia a le Alii i le lalolagi.



4.

O tama uma e toaono o le aiga sa momoe i se potu i le fogafale i luga. I se tasi po i le 17 o tausaga o Iosefa, sa faaali faatolu mai ai le agelu o Moronae ma ta'u mai ia te ia e uiga i papatusi auro o le a faali-liuina e Iosefa ma lolomiina o le Tusi a Mamona. Sa maua e Iosefa ia papatusi i le fa tausaga mulimuli ane.



O LE FALE FAATAFAFA

Ina ua 19 tausaga o Iosefa, sa siitia atu lona aiga i se fale fou. Sa nofo ai iina i le taimi sa ia mauaina ai papatusi auro mai le Mauga o Kumora.

5. *Sa o mai nisi o tagata e taumafai e gaoi ia papatusi auro. Sa nana e Iosefa i lalo o piliki i le pito i luma o le magalafu lenei.*



6. *Sa momoe tuafafine o Iosefa o Sofarania ma Katerina i le potumoe laitiiti lenei. I se tasi o po sa afifi ai e Iosefa ia papatusi i se ie ma nana i le va o teineiti e toalua i luga o lo la moega.*



Iesu Keriso ma le Uluai Faaaliga

O Le Uluai Faaaliga—ina ua vaai Iosefa Samita i le Tama Faalelagi ma Iesu Keriso—o le amataga lea o le toe foi mai o le Ekalesia a Iesu Keriso i le lalolagi.

Sa aoaoina e Iosefa Samita mai le Uluai Faaaliga o le Tama Faalelagi ma Iesu Keriso o ni tagata eseese e toalua.


O le tasi lea o taimi e tolu o loo tusia i tusitusiga paia e faapea na faailoa mai ai e le Tama Faalelagi ia Lona Alo, o Iesu Keriso (tagai i le Iosefa Samita—Talafaasolopito 1:17).

O isi taimi o le taimi na asiasi atu ai le Faaola i sa Nifae ma le taimi na papatisoina ai o Ia (tagai i le 3 Nifae 11:7; Mataio 3:17).

O La Tatou Itulau



O Carolina L., 11 tausaga, mai Venesula, sa ola ae i Le Ekalesia a Iesu Keriso o le Au Paia o Aso e Gata Ai ma sa manao lava e alu i le Malumalu o Caracas Venesuela. Ia Mati 2012 sa asiati atu ai o ia i le malumalu mo le taimi muamua lava. Sa ia lagonaina ai le fiafia tele.



Ina ua ou alu i le malumalu, sa malie ma manaia lo matou taimi faatasi ma lo'u tama ma lo'u uso o Ryan, a o o lo'u tina ma ana uo i le sauniga. Sa matuai

o'u faaloalo lava a o o'u i ai i totonu o le potu faatalitali o le malumalu. Sa ou fiafia i lo'u i ai i totonu o le maota o le Tama Faalelagi ma lagona Lona alofa ma Lona agalelei e ala i le Agaga. Ou te fiafia i le maota o le Alii.

Jorge M., 6 tausaga, Costa Rica



O le ata tusi lenei o le Malumalu o Asunción Parakuei. Ua ou fiafia lava aua e le o toe umi ae faamauina i matou o se aiga e faavavau. Ou te faafetai i le Tama Faalelagi mo le aumaia o se aiga mo a'u.

Angelo N., 5 tausaga, Parakuei



E i ai so'u aiga e sili ona faapitoa. O le lotu e ono itula le mamao mai ia i matou, ae matou te o i ai pe a mafai ona matou o. E faamanuia e lo'u tama le faamanatuga mo i matou i Aso Sa uma lava, ae e faiaoga lo'u tina ia te a'u i le Peraimer. E tasi i le tausaga ona matou o i le Malumalu o Recife Pasila. O le a ou alu i se misiona pe a oo i lo'u matua e talafeagai ai. Ou te suesue i tusitusiga paia ma tatalo i aso uma. Ou te taumafai e faafiafia le Tama Faalelagi e ala i le aveva o a'u ma se tama lelei. Ou te alofa tele i le talalelei.



Kevin L., 8 tausaga, Pasila



Ma te fiafia lava ma lo'u uso laitiiti o Omega, e vaai i le malumalu. A asiati le matou uarota i le Malumalu o Monterrey Mekisiko, matou te o ese i le vaeluapo

ma malaga mo le ono itula ina ia oo iina. Ou te iloa o le malumalu o le nofoaga lea e mafai ona faavavau ai aiga.

E le o toe umi ae matou siitia i Tuxtla Gutiérrez. E i ai se malumalu iina, ma o le a mafai ona matou asiati i ai e la aunoa. Ou te faafetai mo malumalu.

Helem N., 4 tausaga, Mekisiko



Ina ua ou ulufale i le Malumalu o W Quetzaltenango Kuatemala, sa ou lagonaina le filemu tele. I le taimi o le faapaiaiga, sa matuai ou fiafia lava. Sa loloto le oo ifo o tautalaga i lo'u loto.

Juan G., 11 tausaga, Kuatemala



Solene S., 6 tausaga, Pasila



Sauni

Saunia e Merillee Booren

E faavae i se tala moni

“Aua ua le foaiina mai e le Atua ia te i tatou le Agaga e mata’u ai; a o le Agaga e faamalosi ai” (2 Timoteo 1:7).

Sa feminoiai solo i luma ma tua Mele i lona nofoa a o faalogologo atu i isi tamaiti o lana vasega Peraimeri o feauauai e faitau mai tusitusiga paia. Sa talo-talo o ia ina ia le oo mai lona taimi e faitau ai.

O Mele e i ai se faaletonu i lona aoaoina e ta’u o le dyslexia [tiselesia] po o le faafaigata ona malamalama i le gagana tusitusi.

A tilotilo o ia i mataitusi i luga o se itulau, e foliga mai e taufetuli solo ia mataitusi ma sui tulaga e tutu ai. A faitau leo-tele o ia, o ana upu e lemu lava ma o isi taimi e le fetau ai. E masani ona ia faitauina ni upu e le o i ai.

e Faitau



O le latalata mai lava o le avanoa e faitau ai Mele, o le faateteleina foi lena o lona fefe. Ina ua oo mai la i lona taimi, sa le mafai e Mele ona toe tatali.

“E tatau ona ou alu i le faletaele,” sa ia fai mai ai ma le faanatinati a o oso ese mai lona nofoa, ma faapea ona salalau ai ana tusitusiga paia i luga o le fola. Sa momoe atu Mele i le auala savali e agai i le faletaele. Sa fiafia o ia ona sa gaogao. Sa tutu o ia i se tulimanu ma amata loa ona tagi.

O ni nai minute mulimuli ane, sa ia faalogo atu ai o valaau mai e Sister Samita lona igoa a o sau o ia i totonu o le faletaele. “Mele, o le a le mea ua tupu?”

Sa le iloa e Mele le tala e fai. Sa matuai ma lava o ia. Sa leai se tasi o isi tamaiti sa i ai lenei faafitauli. “E le mafai ona ou faitau!” sa tagi ai a o sulu lona ulu i lalo o ona lima sa piilima.

“E le mafai ona e faitau?” Sa fesili atu ai Sister Samita, ma lona le malamalama. “Sa ou vaai o e tuuina atu ni lauga i le Peraimeri. Ou te iloa e mafai ona e faitau.”

Sa lulu e Mele lona ulu. “Ou te taulotoina a’u lauga. Ou te faataitaia faafia ina ia ou le taumafai e faitauina i luma o tagata. E le mafai ona ou faitau leotele, ma a o ou faia, e tele ni mea sese ou te faia. Ou te le

manao e talie mai isi tamaiti ia te a’u.”

“Auoi, Mele, Talofa e. Ou le a ou le tofia oe e te faitau leotele seiiloga ua ou iloa ua e sauni,” o le tala lea a Sister Samita. “Ma ou te le talitonu o le a ata se isi o le tatou vasega ia te oe. O i latou o au uo.”

“E talie tamaiti o le aoga ia te a’u,” o le musumusu mai lea a Mele.

Sa soloiese e Sister Samita loimata o Mele. “Toe foi mai i le vasega. Vaai la i ai,” o lana tala lea.

Sa la toe savavali faatasi atu i le potuaoga. Sa saofai le uo a Mele o Pesi i le nofoa e sosoo ma Mele, ma faamafolafola itulau felefele o tusitusiga paia a Mele. Sa nofo i lalo Mele, ma sa toe tuu atu i ai e Pesi ana tusitusiga paia ia te ia.

“O ai e manao e sosoo le faitau?” o le fesili lea a Sister Samita.

“O le taimi o Mele,” sa fai mai ai se tamaiti o le vasega.

Sa tau musu Mele, ae sa fetilotilofa’i solo o ia i tamaiti o lana vasega ma vaaia ai a latou ataata agalelei. Sa lue mai le ulu o Sister Samita ma ataata foi. Sa fefe Mele, ae sa ia maua lana vaega ma amata lona ona faitau.

Sa lemu le sau o ana upu. Sa

i ai ni nai ana mea sese, ae ina ua tau le mautinoa, sa musumusu malie atu Pesi e ta’u le upu sa’o i le taliga o Mele. Sa le’i lelei tele le faitau a Mele e pei o isi tamaiti o lana vasega, ae sa leai se tasi na ata pe taufaalili ia te ia. Ona oo lea i le taimi o le isi tagata, ma alu ai lava le lesona.

A o latou savavali atu i le potu o le Peraimeri ina ua uma le vasega, sa musumusu atu Sister Samita ia Mele e faapea sa matuai mitamita lava ia ia. Sa fiafia Mele sa le’i taumafai e toe nana lona faafitauli o le faitautusi. “O le a faaauau pea ona ou faataitai,” sa ia mafaufau ai. Ma sa ataata o ia, ma le iloa sa i ai ni ana uo lelei i le lotu e lagolagoina o ia i le ala. ■

E mafai ona e faaaogaina le lesona ma le gaoioiga lenei e aoao atili ai e uiga i le autu o le Peraimeri i le masina lenei.

E Alofa le Tama Faalelagi ia te A'u, ma O Loo I Ai Sana Fuafuaga mo A'u

Sa sasala i le ea le manogi o kuki tao a o fesoasoani ia Natanielu ia Tinamatua e asu le paluga i luga o apa tao kuki. Sa ataata atu Tinamatua ia te ia. “O ai e alofa ia te oe?” na ia fesili ai.

Sa mafaufau Natanielu i le fai soo e Tinamatua o ituaiga kuki e sili ona fiafia i ai o ia ma teuina i taimi uma

ni pepa aua na te iloaina e fiafia o ia [Natanielu] e tusitusi ata. Sa ia tali atu “o oe.”

Sa fai mai Tinamatua, “E sa’o, ua leva ona ou iloaina oe nai lo se isi lava tagata e ese mai i lou tina ma lou tama. Ae o loo i ai le isi tagata ua leva atu ona ia iloaina oe nai lo a’u.”

“O ai le isi?” o le fesili lea a Natanielu.

“O le tagata sa alofa ia te oe ae e te le’i sau i le lalolagi,” o le tala lea a Tinamatua.

“Oi,” na fai atu ai Natanielu. “O le uiga o lau tala o Tama Faalelagi.”

“Ioe,” sa fai atu ai Tinamatua, ma tago fusi mai Natanielu.

Sa ataata o ia. O le iloaina sa alofaina o ia sa lagonaina ai le mafanafana o totonu [o lona loto].

O le tausaga lenei i le taimi o fetufaaiga, o le a e aoao atili ai e uiga i le upumoni matagofie o oe o se atalii/afafine o le Atua. E silafia ma e alofa le Tama Faalelagi ia te oe. O loo i ai sa Na fuafuaga e fesoasoani e te toe foi atu ai i se aso e nonofo faatasi ma Ia. ■





Pese ma le Mau

- “O A’u o se Atalii o le Atua”
(*Tusipese a Tamaiti, 2–3*)
- Roma 8:16



Faiga o le Pa'ukiona

1. Gagau i le afa se fasipepa 8 x 8-inisi (20 x 20 sm). Ona toe gagau lea i le afa ia faalua.
2. Faaaoga le mamano e oti ai se pa'ukiona tama po o se teine. Oti ese le pito samasama.
3. Faaaoga vali po o penivali e valivali ai faatusa o loo i luga o pa'ukiona. E mafai ona e valivali faalanu eseese ia faatusa e faaali ai mea tulaga ese e uiga ia te oe lava.
4. I le ogatotonu o le pa'ukiona, tusi ai, "e alofa le Tama Faalelagi ia te a'u" e faamanatu atu ai ia te oe e iloa e le Tama Faalelagi mea uma e uiga ia te oe ma e alofa tele o la ia te oe.



Manatu mo Tautalaga i le Aiga

- E pei lava ona eseese siepi ma tetele o pa'ukiona, ua i ai foi i tamaiti ni uiga faapitoa ua tulaga ese ai tamaiti taitoatasi. A uma ona fai pa'ukiona, ona auuai lea e pasi faataamilo ia pa'ukiona a aiga taitasi, ma ta'u ni uiga faaalua faapitoa o lena tagata ma faailoa atu i ai le alofa. Ona ta'u atu lea i tagata taitasi e iloa ma alofa le Tama Faalelagi ia te ia.
- E mafai foi ona pasi faataamilo se faaata ma tuu atu i tagata taitoatasi o le aiga e tilotilo i ai a o outou talanoaina nei manatu: O oe o se atalii o le Atua. E alofa tele lou Tama Faalelagi ia te oe. Sa e nofo i le lagi faatasi ma la ae e te le'i sau i le lalolagi. O le mafuaaga lena tatou te ta'uina ai o la o le Tama Faalelagi. E manao o la ina ia e fiafia ma toe foi atu ia te la i se aso. E faapefea ona e iloa e alofa le Tama Faalelagi ia te oe?



Molimau a Evelina i le Malumalu

Saunia e Miche Barbosa ma Marissa Widdison

E faavae i se tala moni



Sa fiafia lava Evelina e sau i le Peraimerī. O taimi uma lava e sii ai lona lima e fai ia tatalo. E fiafia foi o ia e fesoasoani i ona faiaoga.



Ae o le aso lenei, o le aso muamua lea o Evelina e tuuina atu ai se tautalaga. A o savali atu o ia i le pito i luma o le potu, sa pei e feminoia'i solo lona manava. Ona amata lea ona topetope le tata o lona fatu. Patū-patū. Patū-patū. Patū-patū.



“Talofa,” o le tala lea a Evelina ina ua taunuu i le pito i luma o le potu.
 “O lo’u igoa o Evelina. Na faatoa o atu lo’u aiga i le malumalu ina ia mafai
 ona matou toe faatasi e faavavau.”



Sa faamatala atu e Evelina i tamaiti o le Peraimeri e uiga i le ofu pa’epa’e
 sa ia ofuina. Sa ese foi le pa’epa’e o le malumalu ia. Sa ia ta’u atu ia i latou
 sa faamauina faatasi e faavavau o ia ma lona uso ma ona matua.



“Ou te iloa e alofa le Tama Faalelagi ia i tatou,” o le tala lea a Evelina. “Na te faatagaina i tatou e o atu i le malumalu ia faatasi ai e faavavau ma o tatou aiga.”

Sa toe foi Evelina e saofai i lalo. Sa ia lagonaina le fiafia. Sa pei na susulu atu se malamalama mafanafana i lona tino. Sa fiafia o ia ona sa alu i le malumalu. ■

Molimau i le Malumalu

Sa talanoa Evelina e uiga i le faamauina o lona aiga i totonu o le malumalu. Vaai pe mafai ona e maua nisi o mea o loo i le potu o Evelina sa talanoa i ai i le taimi o lana lauga i le Peraimeri. E mafai ona e sueina ma isi foi aitema natia?



TALA FOU O LE EKALLESIA

Asiasi i le news.lds.org mo se faaopoopoga o tala fou ma mea e tutupu i le Ekalesia.

Fesoasoani i le Autalavou la Avea ma Tagata Aoao ma Faiaoga Malolosi

Saunia e Michael Barber

Fatu Mataupu Aoaoina, Matagaluega o le Perisitua

O le mataupu aoaoina fou a le autalavou o le, Sau, Mulimuli Mai Ia Te A'u: Punaoa e Aoao ai mo le Autalavou, o loo faamamafaina ai ni auuala se fa e mafai e matua, faiaoga ma taitai ona fesoasoani lelei ai i le autalavou ia liua i le talalelei.

I se tala faaletusi paia e uiga i soifuga talavou o Iesu Keriso, ua tatou iloa ai o le Faaola ina ua 12 tausaga sa maua atu “i le malumalu, o nofo i totonu o le au aoao o loo faalogologo ia te i latou, ma tuufesili ia te i latou.

“Ua matua ofo uma lava e na faalogo ia te ia i lona potu ma ana upu e tali” (Faaliliuga Iosefa Samita, Luka 2:46–47 [i le Luka 2:46, vaefaamatalaga c]).

Mai lona laitiiti sa auai malosi ai le Faaola i le aoaoina mai ma le aoao atu o le talalelei. I le malumalu sa aoao atu e le Faaola mataupu faavae o le talalelei ia i latou o e sa manatulia e faapea na sili mamao atu le atamamai ma le aoaoina nai lo o Ia. Ae sa Ia malamalama o le aoaoina ma le aoao atu o le talalelei o se vaega o le “galuega a Lona Tama” (Luka 2:49) ma e tonugalemu i Lana misiona paia i luga o le fogaeleele.


E le fesiligia, o Iesu Keriso o se tagata tulaga ese i le aoaoina ma aoao atu o le talalelei, e ui lava i lona talavou; ae sa tuputupu ae o Ia i lona gafatia ona malamalama ma aoao atu

aoaoga faavae. Ua ta'u mai e mau ia i tatou sa “alualu pea [o Ia] mai lea alofa tunoa i lea alofa tunoa, seia oo ina maua e ia le atoatoaga” (MF&F 93:13). A o faatulaga pea lava pea e

autalavou, ua saunoa ai le Au Perisitene Sili, “Ua valaauina outou e le Alii e fesoasoani i le autalavou ia liua i le talalelei.”¹ A o tatou suesue ma faataitai i le galuega a le Faaola, o le a mafai ona tatou lagolago atu ma le mataalia i a tatou talavou i la latou faigamalaga e aoao, ola, ma aoao atu le talalelei a Iesu Keriso. E pei foi o le Faaola, e mafai ona tatou saunia i tatou lava faaleagaga, tali atu i manaoga a o tatou talavou, uunaia i latou



KERISO I FAMAU, SAUNIA E WALTER RANE © IRI



O sauniuniga faaleagaga—suesue, tatalo, ma le anapogi—e fesoasoani uma i le faiaoga ma le tagata aoao ia lagona uunaiga a le Agaga.

le autalavou o aso nei o latou olaga ma mea ua latou iloa e moni, e mafai foi e i latou ona liua moni i le Faaola ma Lana talalelei ma tuputupu ae i le potu i “lea fuaitau i luga o lea fuaitau, ma lea mataupu i luga o lea mataupu” (2 Nifae 28:30).

I se taiala o tusi ma mea e faa-aoga fou mo mataupu aoaoina a le

ia iloa upumoni o le talalelei, ma lu'i i latou ia liua ao latou faia ma le faatuatua ia mea.

Saunia Faaleagaga.

A o le'i amataina Lana galuega i le lalolagi, sa saunia faaleagaga e le Faaola o Ia lava e ala i le maelega e suesue, tatalo, ma anapogi. Sa “taitai

atu o ia e le Agaga i le vao e mafuta ai ma le Atua” ma “anapogi mo le fasefulu ao ma le fasefulu po” (Faa-liliuga Iosefa Samita, Mataio 4:1–2 [i le Mataio 4:1, vaefaamatalaga e]). I le faaiuga o Lana anapogi, sa fetai ai le Faaola ma se soloaiga o faaososoga mai le fili. O ana suesuega i tusitusiga paia sa faatino muamua sa fesoasoani ia Iesu e tali atu ai i faaososoga taitasi i fuaiupu mai tusitusiga paia (tagai i le Mataio 4:3–10). O tapenaga faaleagaga sa mafai ai e Ia ona le gata ina faafetauia ma le manuia ia faaososoga i Lona soifuaga atoa, ae ia aoao atu ai foi ma le mamana le talalelei i Lana galuega atoa.

O le aoaoina o le autalavou e manaomia ai ni tapenaga se tele atu nai lo o le tatope o le vaai i se tusi lesona ae o le a oo i le taimi e amata ai ona aoao atu. Ua poloai mai le Alii, “Aua le saili e talai atu la’u upu, ae ia muamua saili ia maua la’u upu” (MF&F 11:21). Tatou te saunia faaleagaga e ala i le suesueina ma le agaga tatalo o tusitusiga paia ma saunoaga a perofeta soifua e iloa ai aoaoga faavae moni. A o tatou tapena i lenei faiga, e faamautu mai e le Agaga Paia le moni o le aoaoga faavae ma uunaia i tatou ia manatua aafiaga o le ola ai i aoaoga faavae ia e mafai ona tatou faasoa atu.

A o aoao atu i tamaitai talavou i le taua o faaaliga faaletagata lava ia, sa uunaia Estefani Melero mai le Siteki a Lima Peru Surco e faasoa atu lona aafiaga i le sailia o lana moli-mau i le 14 o ona tausaga. Sa moli-mau atu o ia i tamaitai talavou a o

tatalo faatauanau o ia ia iloa le moni o le talalelei, sa pei e musumusu atu se leo i lona loto i upu e le’i galo lava ia te ia: “Estefani, ua e iloa e moni. Ua e iloa lava.”

A o tatou suesue ma ola i aoaoga faavae tatou te aoao atu, e sili atu nai le na ona avea o i tatou o ni faiaoga—e avea i tatou ma molimau o le upumoni.

Fesili e Mafaufau Loloto i Ai:
O a nisi mau o loo faaaliga ai auuala

sa Ia aoaoina. Sa amata le faamatalaga a le taulealea i se fesili: “Se a le mea ou te faia ou te maua ai le ola e faavavau?” Ina ua uma ona aoao atu e le Faaola le taua o le usiusitai i poloaiga, sa tali le taulealea, “Ua ou tausia ia [poloaiga] uma talu lava ina ou ititi.” O le iloa sa le’i i ai lava i le loto o le taulealea le “mea e tasi,” sa luita ai e Iesu le alii ia faatau atu ana mea uma sa i ai, avatu i e matitiva, ma mulimuli atu ia te Ia. (Tagai



E fefaamalosiaua’i e le autalavou le tasi ma le isi pe a latou fefaasoa’i o latou aafiaga o le ola ai i le talalelei.

na saunia ai e le Faaola o Ia lava e aoao atu? O faapefea ona faaosofia e au taumafaiga ia saunia e aoao atu le mataalia o lau savali?

Taula’i atu i Manaoga

I Ana fegalegaleaiga ma se taulealea mauoa, sa faaali atu e le Faaola sa Ia malamalama i manaoga o i latou

i le Luka 18:18–23.) A tatou tatalo mo faaaliga ma nofouta i manaoga, faamoemoega, ma faanaunauga a le autalavou, o le a tatou—e pei ona sa faia e le Faaola—iloa le ala e aoao atu ai ma luita ai i latou ia ola i le talalelei i ni auuala patino ma anoa.

Na saunoa Peresitene Boyd K. Packer, Peresitene o le Korama a

Aposetolo e Toasefululua, e faapea o o tatou “tagata talavou ua tausia i le itu a le fili.”² I le avea ai ma matua ma faiaoga, e ao ona tatou malamalama i faigata o loo feagai ma o tatou talavou. Fai mai Kevin Toutai, o se faiaoga o le Aoga Sa i le Siteki a Columbine Colorado, “O luitau o loo feagai ma le autalavou e le mafai ona aoaoina mai se tusi lesona. O faaaliga patino na tatou te maua a o o atu faiaoga ma mafai ona saunia o tatou tagata

talavou e tau ma Satani i aso taitasi. Ua ou vaai e le mafai ona e tu atu i le Aso Sa ma se tusi lesona ma fai se lesona.”

O le fesoasoani i le autalavou ia aoao ma ola i le talalelei e aofia ai taumafaiga tuufaatasi a matua, taitai, faufautua, ma faiaoga. A o tatou sailia musumusuga mai le Agaga Paia, e mafai ona tatou aoao atu ma le mataalia aoaoga faavae o le a saunia ai le autalavou mo faasoosoga ma luitau latou te feagai.

O matua e nafa tonu lava ma le fesoasoani i a latou fanau ia iloa upumoni o le talalelei, ma ua i ai i tamaitai ma alii talavou taitoatasi se tiutetauave patino ia liua atoatoa. O taitai ma faiaoga o le autalavou e lagolagoina nei taumafaiga.



ATA NA TUSIA E CHRISTINA SMITH

Fesili e Mafaufau Loloto I Ai:
O le a le eseeseega o le lalolagi i le taimi nei ma taimi sa e talavou ai? O a ni luitau o e vaai o feagai ma le autalavou? O le fea o aoaoga faavae o le talalelei, afai e malamalama i ai, o le a fesoasoani ia i latou e tau- lima manuia ai nei luitau?

Valaaulia le Autalavou ia Iloa Upumoni o le Talalelei

Sa aoao e le Faaola ia Ona soo i auala sa uunaia ai i latou ia iloa le upumoni ma maua ni molimau patino. A o aoao atu i Sa Nifae, sa fetalai o Ia:

“Ua ou iloa ua outou vaivai, ua le mafai ona outou malamalama i a’u upu uma ia na poloaiina ai au e le Tama e tautala atu ia te outou i le taimi nei.

“O lea, ia outou o atu i o outou fale, ma mafaufau i mea ia na ou fai atu ai, ma ole atu i le Tama, i lo’u igoa, ina ia outou malamalama ma saunia o outou mafaufau mo a taeao” (3 Nifae 17:2–3).

O aoaoga faa-Keriso e tele atu mea e aofia ai nai lo na o le tuuina atu o faamatalaga. E aofia ai le taiala- ina o le autalavou ia malamalama i aoaoga faavae mo i latou lava. E ui ina faasoosoina i tatou e lauga atu ia i latou e uiga i le talalelei, o le a sili atu lo tatou mataalia pe a tatou fesoasoani ia i latou ia maua e i latou lava ia tali, e mafai ai ona latou maua a latou lava molimau, ma aoao i latou i auala e maua ai tali pe a i ai ni isi o a latou fesili. E pei ona faamamafaina e mataupu ao- aoina a le autalavou, *Sau, Mulimuli Mai Ia te A’u: Punaoga e Aoao ai mo le Autalavou*, e mafai foi ona tatou valaaulia i latou e faasoa mai o latou

aafiaga o le ola ai i le talalelei i o latou tupulaga o mea ua latou iloa e moni.

Sa faamatala lata mai nei e Elder Kim B. Clark, Fitugafulu Eria ma o le peresitene o le BYU-Idaho, se tala e uiga i se korama o tiakono sa latou talanoa ma lo latou faufautua e uiga i le tatalo. Sa faafuasei ona sii le lima o le peresitene o le korama a tiakono ma fai mai, “E fia fai atu lau fesili i le korama. E toafia outou e mananao e tautino e tatalo i le taeao ma le po o aso uma o lenei vaiaso?” Sa sii uma i luga lima o tagata o le korama vagana ai se alii talavou se toatasi, o lē sa le talitonu e mafai ona ia faia le lu’i. Sa saofai le faufautua ma vaavaai atu i tagata o le korama o aoao atu ma molimau atu i lo latou uso e uiga i le tatalo, ma fesoasoani ia te ia ia maua le talitonu e talia ai le lu’i.

Fesili e Mafaufau Loloto I Ai:
O a ni auala ua e matauina ai faiaoga o faamalosiāu atu i tagata o le vasega ia fai ni sao iloga i le aoaoina [o le talalelei]? E mafai faapefea ona e fesoasoani i le autalavou o loo outou galuhue faatasi ia atiae ni faiga masani o le suesue i le talalelei? E ese mai talanoaga, o a nisi o auala e faaaoafia ai le autalavou i le aoaoina o le talalelei?

Uunaia le Liua

O le liua o se faagasologa i le olaga atoa e aofia uma ai le aoaoina ma le ola i le talalelei i aso uma. E sili atu nai lo na o le iloaina o le talalelei, o le liua e “manaomia ai lo tatou faia ma ia avea ai.”³ Ina ua uma ona aoaoina Ona soo e uiga i le lotoalofa o le Samaria agalelei, sa luuina i latou e le Faaola, “Ina alu ia, ma ia faapea ona fai” (Luka 10:37).

Sa ia uunaia i latou ia avea ma ni tagata e sili atu nai lo na o ni tagata e faalogo i le upu ma ia galulue ma le faatuatua i Ana aoaoga.

E ao ona tatou uunaia le autalavou ia ola maelega i le talalelei aua o le liuaina e le masani ona tupu i se taimi se tasi e aoao atu ai. O le liuaina e sili atu le taimi e tupu ai pe a malamalama le autalavou i aoaoga faavae moni ma faatulaga ni mamamu o le suesue i le talalelei ma le ola amiotonu, e pei ona tatou uunaia i latou e fai i le *Sau, Mulimuli Mai Ia te A’u*.

Fai mai Krista Warnick, o se peresitene o Tamaitai Talavou i le Siteki o Arapahoe Colorado, “O loo feagai le autalavou i aso nei ma se osofaiga o luitau ia ou te le’i faalogo i ai seia oo ina ua ou matua atu i le olaga. Sa ou atinaeina la’u molimau na tele lava ina ua ou aluese ma ou nofo na o a’u ma sa mafai ona ou galue ma faatino nisi o mea sa ou aoaoina i vasega a Tamaitai Talavou. O le tuuina atu i le autalavou o lu’i ma avanoa e faaaoa ai lo latou faatuatua o le a fesoasoani ia i latou ia atinae ia mea autu o a latou molimau a o talavou lava.”

O le luitau o le liua e le gata ina tatou aoao e uiga i le talalelei ae faapea foi ona tatou suia ona o mea ua tatou aoaoina. E tataua ona tatou fesoasoani i o tatou tagata talavou ia malamalama o lo latou “suiga tele” (Alema 5:14) o le loto e le faapea e mafai ona tupu i le taimi lava lena, ae o le a oo malie mai a o latou atinaeina e le aunoa ni faiga masani o le suesue, tatalo e le aunoa, ma le tausia o poloaiga. A o latou faia nei mea, o le a latou matauina o o latou manaoga, uiga, ma amioga ua suia e atagia ai le

finagalo o le Tama Faalelagi.

Fesili e Mafaufau Loloto I Ai:
O le a le tiute na fai e au taumafaiga o le aoao ma ola i le talalelei i lou lava liuaina? Na faapefea ona faamalosiā oe e matua ma faiaoga o le Ekalesia ma taitai?

Lagolagoina o o Tatou Tagata Talavou

O le *Sau, Mulimuli Mai Ia te A’u* ua fai ma sui o na o se vaega o le taumafaiga e lagolago le autalavou. E faaopoopo atu i le matafaioi faitoatasi a le talavou lava ia atili liua atoatoa, “ua i ai i matua le tiutetauave autu mo le fesoasoani atu i a latou fanau ia iloa le Tama Faalelagi ma Lona Alo o Iesu Keriso.”⁴ O i tatou o loo galulue faatasi ma le autalavou e mafai ona lagolago atu i matua ma mulimuli i le faataitaiga a le Faaola pe a tatou saunia faaleagaga, taulai atu i manaoga o le autalavou, valaaulia i latou ia iloa upumoni o le talalelei, ma tuu atu ia i latou avanoa e galulue ai ma le faatuatua ma ia liua. A o tatou taumafai e faataitai ia Iesu Keriso, e avea i tatou ma ni tagata aoao ma ni faiaoga lelei atu, ma tatou fesoasoani i taitai o le lumanai o o tatou lotoifale ma la tatou Ekalesia ia avea i latou lava ma ni tagata aoao ma ni faiaoga mamana. ■

FAAMATALAGA

1. *Aoao Atu o le Talalelei i le Ala a le Faaola* (o se taiala i le *Sau, Mulimuli Mai Ia te A’u: Punaoa Aoaoina mo le Autalavou*, 2012), 2.
2. Boyd K. Packer, “Fautuaga i le Autalavou,” *Liahona* ma le *Ensign*, Nov. 2011, 16.
3. Dallin H. Oaks, “O Le Luitau ia Avea ma se Tasi,” *Liahona*, Ian. 2001, 40; *Ensign*, Nov. 2000, 32.
4. *Tusitaulima 2: Taitaiina o le Ekalesia* (2010), 5.5.4.

Mo nisi faamatalaga e uiga i le mataupu aoaoina fou a le autalavou, asiiasi i le lds.org/youth/learn.

Faaaoga e le Ekalesia le Mataupu Aoaina Fou mo le Autalavou i le 2013

E amata atu i le masina leni, o le a amata ai e faiaoga January ma taitai i le Ekalesia aoa ona faaoga atoa le mataupu aoaina fou a le autalavou, *Sau, Mulimuli Mai Ia te A'u: Punaoa e Aoao ai mo le Autalavou*, sa muai faasilasilaina mai i se tusi a le Au Peresitene Sili ia Setema.

I le lds.org/youth/learn, e mafai ai e faiaoga ma taitai o Tamaitai Talavou, Perisitua Arona, ma le Aoga Sa ona maua ia lesona i gagana e 23. O lesona uma lava e mafai ona lolomiina. O i latou e le mauaina le Initoneti e tataua ona faafesootai o latou taitai perisitua i le lotoifale e iloa ai pe mafai faapefea ona faaogaina le *Sau, Mulimuli Mai Ia te A'u* i o latou eria.

“O le mataupu aoaina fou ua tuufaatasi ai aoaoga faavae atu o le talalelei faapea ma mataupu faavae mo le aoaina atu i le ala a le Faaola,” o le tusi lea a le Au Peresitene Sili. Ua i ai lo matou talitonuga o le a faamanuiaina

e mataupu aoaina fou le autalavou ia latou taumafaiga ina ia liua atoatoa i le talalelei a Iesu Keriso.

I le *Sau, Mulimuli Mai Ia te A'u*, ua tofu masina taitasi o le tausaga ma se autu o se aoaoga faavae, ma o vasega uma o le Aoga Sa, Tamaitai Talavou, ma le Perisitua Arona o le a aoaina lena autu i lena masina.

O lesona taitasi e i ai ni vasega tai fa: tapenapenaga faaleagaga mo faiaoga, manatu e faailoa atu ai le autu, manatu patino mo gaoioiga, ma se vaega e valaaulia ai le autalavou e faatino. Ua talosagaina faiaoga e saili musumusuga i le filifilia ma le fetuunaiga o lesona e faavae i manaoga o o latou tagata aooga.

O le uepi saite o loo aofia ai foi ni vitio aoga e faamalamalama ai le auala e faaoga ai nei mataupu aoaina fou, manatu mo le tapenaina o gaoioiga e aoao ai, ma se tusitaiala fou, *Aoao Atu o le Talalelei i le Ala a le Faaola*. ■

ATA NA SAUNIA E TJ THOMAS



A o auai i le galuega faatino o Mamona Lima Fesoasoani i Aferika, sa tuuina atu ai e tagata o le Ekalesia ni auaunaga taua, fausia ni sootaga faaletapuiga, faatupuina le silafia e uiga i le Ekalesia, ma atinae a latou molimau i le alofa mama.

Lona Ono o Aso o Auaunaga Faaletausaga i Aferika

O le Aso Toonai, 18 o Aokuso, 2012, sa vaaia ai le faitau afe o le Au Paia i le silia ma le ono o atunuu Aferika na faapotopoto i o latou lotoifale e auai i le lona ono o faatinoga faaletausaga o le Aso o Mamona Lima Fesoasoani i Aferika Atoa.

“Sa matuai o atu uarota ma paranesi e tuuina atu auaunaga taua,” na tusia ai e le faamisiona o le va i fafo o Elder C. Terry Warner i se imeli. “Sa latou sailia mai ni paaga; sa latou filifilia galuega faatino ia, e ui ina faigata, ae sa matuai taua. Sa latou o i ni vaega toatele ma le naunau e fesoasoani, ma sa latou faia moni lava ni uo mo le Ekalesia.”

Fai mai Elder Adesina J. Olukanni, faatonu o le va i fafo mo le Eria o Aferika i Sisifo, e uiga i le aso o auaunaga, “O le auala aupito faigofie lea e mafai ona matou tali atu ai i le valaau a le perofeta ina ia agalelei atu i o tatou tuaoi, ia tali atu i o latou manaoga, ia foai atu nai lo o le maua mai. O se auala aupito faigofie e talai atu ai le talalelei—e ala i faataitaiga.”

Ua Maua Nei le Mormon.org i Gagana e 20

Ua maua nei leMormon.org i le gagana Aramenia, Sepuano, Saina, Take, Iglisi, Farani, Siamani, Initonesia, Italia, Sapani, Kora, Lativia, Polani, Potukale, Rusia, Sipaniolo, Suetena, Takaloka, Tai, ma lurukueini.

Ua uunaia tagata taitoatasi e fatu a latou lava lautusi patino i le Mormon.org i a latou lava gagana e fiafia i ai ma faasoa atu i isi.



O Le Aoga Moni o le Alofa Tunoa

Sa matuai faagaetia lava a’u i tusiga e lua i le lomiga o Aperila 2012: O le tusiga a Elder David A. Bednar, “O Le Togiola ma le Malaga i le Olaga Faitino” (itulau e 12), ma le tusiga a Kristen Nicole Cardon, “Matagofie o le Alofa Tunoa” (itulau e 10). O a’u fesili e uiga i le aoga moni o le alofa tunoa i o tatou olaga i le tino ma i la tatou tausinioga mo le ola e faavavau sa taliina lelei ai lava. Ou te faafetai mo nei tusiga—ua matuai faateleina ai lava lo’u malamalama, ma ou te mafauafau loloto pea lava pea i ai.

Emmanuel Adu-Gyamfi, Ghana

Aoaiga

I le Savali a le Au Peresitene Sili ia Ianuari 2012, “Ola i se Olaga Faamanuiaina,” ua tatou le faaafiaina ai se vaega o le upusii ia Mary Anne Radmacher. O le upusii o loo maua i le itulau e 5 o le *Liahona*. O le uluai upusii a Ms. Radmacher e faitauina faapea, “O nisi taimi o le lototele o le leo filemu lea i le faaiuga o le aso e faapea mai, ‘O le a ou toe taumafai a taeao.’ ” O loo faaalua i le, faatasi ai ma isi lomiga a Ms. Radmacher, *Courage Doesn’t Always Roar* (2009). Matou te faamalie atu ona o le sasi.



O lenei lomiga e aofia ai tusiga ma gaoioiga e mafai ona faaaoga mo afiifi faaleaiga. O nisi nei o faataitaiga.

“O Le Migao i le Atua o le Amataga lea o le Poto,” itulau e 20: Mafauafau e talanoa i le poto o le lalolagi e faatusa i le poto o le Atua. Atonu e te manao e faitau le 2 Nifae 9:28–29 ma mafauafau i tulaga e eseese ai le poto o le lalolagi ma le poto e aoaoina e le talalelei. Filifili po o le fea itu o le a e faaogaina i tulaga taitasi.

“Autu a le Mutuale 2013,” itulau e 50: Faitau tusiga na saunia e Elaine S. Dalton ma David L. Beck i le autu o le Mutuale i le 2013. Mafauafau e palepalealuga ni auala e mafai ai e tagata taitoatasi o le aiga ona fesoasoani e fai le aiga o se nofoaga paia. Atonu e te manao e faaali se ata o le malumalu i lou aiga ma faatu se sini ia o atu o se aiga i le malumalu.

“Aoo Pea [le Taina o le Piano],” itulau e 56: Mafauafau e fai se faaaliga

taleni a le aiga. la fautuaina ia o mai saunia tagata taitoatasi o le aiga e faasoa mai se tomai po o se faafiafiaga. A uma lea ona faitau lea o le tusiga “Aoo Pea [le Taina o le Piano]” ma talanoa pe faapefea ona faamanuia i latou e siomia i tatou i le aoaoina ma le faasoaina atu o taleni.

“Molimau a Evelina i le Malumalu,” itulau e 70: Mafauafau e fatu se suega meaaoga o le “molimau a le aiga”. Tuu ni ata i le potu ma tuu atu i tagata o le aiga e ao mai ata latou te talitonu i ai (mo se faataitaiga: ata o lou aiga, o le malumalu, Peresitene Thomas S. Monson, papatisoga, o se lisiti sefuluai, talavou o loo fai faalelei ona lavalava). Faaiu i le talanoaina pe aisea e te talitonu ai i ia mea taitasi.

Lesona i le Pogisa

I se tasi aso ia Oketopa na fai mai ai le ma tama teine o Iulia, o lē sa masani ona lelava soo, “E le’i faia lava se tatou afiifi faaleaiga i le pogisa. E mafai ona tatou faia, faamolemole?” Sa ma mafauafau pe o le a faapefea ma po o le a foi se mea e mafai ona ma aoaoina ai o ia i le pogisa.

Sa tape uma loa moli, ma sa siomia i matou i le pouliuli atoa. Ona susue lea e lo’u toalua lana telefoni feaveai ma ata ona o loo aoao mai e uiga i le Malamalama o Keriso. Sa ia faaalua le ala e mafai ai e le Malamalama o Keriso ona aveese mai i tatou mai le pouliuli ma toe taitai atu ai i matou o se aiga ia te la. Sa tau le susulu le malamalama mai le telefoni, ae sa lava lea e mafai ai ona matou vaai.

A o faasolo ina otometi le pe o le telefoni, sa mafai ona ma faaali atu i le ma tama teine le mea e oo i ai o matou olaga pe a aunoa ma le Faaola, o Iesu Keriso. Sa malosi lava le Agaga, ma sa matuai ffilemu lelei lo ma afafine. E oo mai lava i le taimi nei o loo ia manatuaina lava le matou afiifi faaleaiga e sili ona fiafia i ai ma le savali na aoaoina ai.

Valquíria Lima dos Santos, Pasila

O LE LESONA I LE LIMA-MINUTE

Saunia e Christopher James Smith

O le faaiuga o lo'u tausaga mulimuli i le iunivesite, sa tatau ona ou auai atu ai i se sauniga o le faauuga lea e oofu ai le au faauu fou uma i ofu talaloa ma pulou faauu masani, maua o latou faailoga mai se tagata iloga o loo asiasi mai. Sa ou tulimatai atu i lenei taimi, o se faamanatuaga o le fa tausaga faigata o suesuega. O le taeao o le sauniga, sa ou maua ai se tusi mai le iunivesite ae peitai ou te lei tatalaina.

Sa amata le sauniga i le 1:30 i le aoauli, ma sa ou faatonuina le pueina o so'u ata ao lei amataina le sauniga. Ae paga, sa fai se laina mo le pueina o ata, ma sa ou vaai i le latalata atu o vae o le uati i le taimi e amata ai [le sauniga]. Peitai sa umi se taimi sa ou faatali ai ma o lea sa ou naunau ai lava e pue lo'u ata. Na iu ina uma ona pu'e ae toe 10 minute ao lei amataina le faauuga, sa ou tamoe i le nofoaga e fai ai.

Ae peitai, ina ua ou taunuu atu, ua tapunia faitotoa ma ua leoleoina e leoleo faitotoa. Sa ou talosaga ou te alu i totonu, ae sa mumusu leoleo faitotoa, ma fai mai ia te a'u sa tatau ona ou taunuu vave atu i le 15 minute ao lei amataina mo le faanonofoina i nofoa. O se taimi muamua lea ua ou faalogo ai i lea tulaga manaomia, ma sa ou tetee i ai. Ae e lei minoi ia leoleo. Sa ou galue mo le fa tausaga ina ia maua lenei faailoga, ae ua le mafai ona ou alu e aumai i le sauniga. Sa matou nonofo faatasi ma tagata maimoa i totonu o le faapaologa.

Ina ua ou taunuu atu i le fale ma tatala le tusi lea sa ou mauaina i lenei taeao, sa ou faitau ai i ni faatonuga manino ina ia nofoia lou nofoa ia le itiiti ifo ma le 15 minute ao lei amataina le sauniga po o le a taofia lo'u ulufale atu. Sa ou lagona le pei o taupou valelea i le faataoto a le Faaola:



Sa ou misia i le na o le lima minute le mea na faagata ai nofoa. E moni e le mafai e lenei taimi ona taofia a'u mai le auai atu i lo'u faauuga i le iunivesite.

“Ua latou o [taupou valea] e faatau, ona sau ai lea o le faatoafaiava; o e ua saunia foi ua latou ulufale atu faatasi ma ia i le tausamaaga: ona pupuni ai lea o le faitotoa.

“Mulimuli ane, ona o mai ai lea o isi taupou, ua faapea mai, Le Alii e, le Alii e, ia e tatala atu le puipui mo i matou.

“A ua tali atu o ia, ua faapea atu, E moni, ou te fai atu ia te outou, ou te le iloa outou” (Mataio 25:10–12).

E ui o le taofia mai mai se sauniga taua e ono foliga mai o se taunuuga tuga ma o se tulaga e ono mafaufauina o se mea sese laitiiti, ae ua ou iloa ina e faapena foi ia filifiliga ma taunuuga. Pe a ou pikiina i luga le tasi itu o se laau mai le palapala, ou te pikiina foi i luga ma le isi itu. E faapena foi i soo se filifiliga, sa ou filifili e le gata i galuega ae faapena foi ma taunuuga e faatatau i ai—ae peitai e le mailoa le taunuuga e tupu.

O Satani lea e manao tatou te mafaufau i filifiliga e aunoa ma se manatu i taunuuga. E masani lava ona ia faia e ala i le faaosoosoina o i tatou ina ia taulai atu i le fiafi faaletino, “o le manao o le tino” (2 Nifae 2:29), ma le faamalieina vave.


I le isi itu, e finagalo lo tatou Tama Faalelagi mo i tatou e taulai atu i le fiafia ma faamanu-iaga e faavavau. Na te faamoemoe mai ina ia tatou mafaufau i taunuuga pe a tatou faia ni faaiuga ma ia aveia taunuuga o se vaega o lo tatou unaiga: “Ma ua latou saoloto e filifili le saolotoga ma le ola e faavavau, e ala i le Puluva sili o tagata uma, pe filifili le faataga-taotauaina ma le oti” (2 Nifae 2:27).

E ui ou te le o fiafia i lo'u misia o le mauaina aloaia o lo'u faailoga, ae ou te faafetai mo le mea ua aoaoina ai au e lenei aafiaga i le tulaga o le faavavau—ou te le fia faia lava se filifiliga o le a taofia mai ai au i le faafeiloai atu i le auai mai o le Faatoafaiava. Nai lo le taofia i fafo i se faamatalaga faapea “Ou te le iloa outou,” ae o le a ou taumafai e faia ni filifiliga o le a faataga ai au ou te faalogo atu o Ia fetalai mai, “Ulufale mai ia i le fiafia o lou Alii” (Mataio 25:21). ■



IOSEFA SAMITA

Sa 14 tausaga o **Iosefa Samita** i le taimi sa ia **tatalo** ai e fia iloa po o le fea o ekalesia sa sa'o. Sa faali mai le Tama Faalelagi ma Iesu Keriso ia te ia, ma ia iloa ai sa leai se tasi o ekalesia sa i ai i le lalolagi sa i ai le atoaga atoa o le upumoni. Sa fesoasoani Iosefa Samita e toefuatai mai le talalelei moni a Iesu Keriso ma avea ai ma uluai perofeta o aso e gata ai. O se vaega o lana galuega, sa ia faaliliuina ai le Tusi a Mamona mai **papatusi auro** ma faatonuina le Au Paia e fausia le uluai malumalu i lenei tisipenisione, o le **Malumalu o Katelani**.



*S*a tusia e se faifeau a se isi faatua-
tuaga, ina ua maea ona feiloai ia
Peresitene Lorenzo Snow: “O lona
foliga o se mana o le filemu; o lona faa-
tasi ai o se tatalo mo le filemu. I le filemu
loloto o ona mata, sa le gata o le ‘nofoaga
o le tatalo le leoa,’ ae o le apitaga o le
malosi faaleagaga. . . . O se lagona ese
na segia ai a’u, faapea sa ou ‘tu i luga
o nofoaga paia.’” Tagai i “Piko (Pickles),
Tunipa, ma le Molimau: Musumusuga
mai le Soifuaga ma Aoaoga a Lorenzo
Snow,” itulau e 12.

O LE EKALESI A
IESU KERISO
O LE AU PAIA O ASO
E GATA AI